

E lab júu^ quiá'- Dsea` Jmáang` e cajme' JUAN

Lajíi' mi~ ná'-gui e nitiroo`jmigü'ba' e niseeng` Dsea`Jmáang`

¹ Jo júi'~ lati' mi~ uiim~ nisea` e sii` Júu^ do, jo e jo líng' Joo' Fidiéé'; jo cøøm` seeng` cõo'~ Fidiéé', cõ' íb` dseáng'- Fidiéé' cajo. ² Jo colim~ seeng` e Júu^ do cõo'~ Fidiéé' lajii'~ lati' mi~ uing`. ³ Jo la'eáng' cõo'~ e Júu^ dob cajméé` Fidiéé' lajalé" e sea` fí' jmigüí; joba' lajalé" e sea` fí' jmigüí cajméé` Fidiéé' coling~ cõo'~ e Júu^ do. ⁴ Jo la'eáng' cõo'~ e Júu^ daba' cuø` e seë`-naa' fí' jmigüí, jogui íb` cajo i líng' i Jíng" quiá'- Fidiéé' i cuø` e tíng' ngáng" jaléng" dsea` jmigüí. ⁵ Jo i Jíng" quiá'- Fidiéé' do jmóo` e lijneá' lacaang` lí` n# s'ó", jogui e n# s'ó" do ja` mí' caquí'~ jmíi~ fa' nijmé` e niyúng` i Jíng" quiá'- Fidiéé' do.

⁶⁻⁷ Jo malíi~gui caliséng` jaang` dseañu" i calisí Juan i seáng` dsea` jmíi; jo Fidiéé' caguíng" ír` jogui casíng`neíñ' e laco' dsea` do nini'r- júu^ quiá'- i Jíng" quiá'- Fidiéé' do, jogui e laco' ninú- jogui e já'- nilíng` jaléng" dsea` lajii'~ júu^ e niguiá` dsea` do. ⁸ Jo dsu' i Juan i seáng` dsea` jmíi` do ja` líiñ' dseáng'- i Jíng" quiá'- Fidiéé' do, cõ' líiñ' jaang` dsea` i casíng` Fidiéé' e laco' nini'r- júu^ quiá'- i Jíng" do jee~ jaléng" dsea` góor` dsea` Israel. ⁹ Jo cagüéng` i dseáng'- já'- Jíng" quiá'- Fidiéé' do fí' jee~ dsea` jmigüí e laco' nijmér- jial e niliseeng` dsea` fí' lí~ jneá' jí'.

10 Jo i dsea` i lãng` Júu` quiá'- Fidié` do niseem`bre lajii` latí` mi` uiing`; jo nañí` fa' la'eáang` cóo` i`bre cajmée` Fidié` lajalé` e sea' fi' jmigüf, jo dsu' jaléng` dsea` jmigüi` ja` já'- calíiñ` júu` quiá'- dsea` do. 11 Jogui dseáng'- fi' góo`bre cagüéiñ` cajo, dsu' ja` ca'íng` dsea` góor` ír. 12 Jo dsu' jaléng` i` dsea` i` ca'íng` ír` jogui i` já'- calíng` júu` quiá'r-, joba' cacuø'reiñ' fi' e ca'uíiñ'- do jóo' Fidié`. 13 Jogui líiñ' do jóo' Fidié` dsu' o' uii` e caliséiñ` fi' jmigüi` la, o'gui fa' lãng` ii` quiu' ta` quiá'r- e ca'uíiñ` lajo, dsuco' líiñ' do lajo uii` e 'ñiab' Fidié` cajméer` e ca'uíiñ'- do jóor`.

14 Jo e Júu` do ca'uíng` dseáng'- jaang` dsea` jmigüi, jo caliséng` jee` jneaa`aa' fi' jmigüi` la, jogui dsíng'- jmi'neáang` jneaa`aa', jogui jmang'- júu` já'- quie`. Jo mi` calicuíng`naa' e Júu` do i` lãng` jóo' Fidié` i` camíng` do, joba' caline`baa' jóng` jial dseáng'- jlo`^ niiñ-, jo dsu' e jo catíiñ` jii` dseáng'- 'ñia`bre e cacuø' Tiquiá'r` ír, co' dseáng'- eáam` 'né` dsea` do quiá'r-. 15 Jo lalab cajíng'- Juan i` seáang` dsea` jmii` do cuaiñ` quiá'- dsea` do mi` cajíiñ'- lala:

—Jo i` lab i` dsea` i` éeng` jnea` do ie` lami` café` a lala: “Jo i` dsea` i` nijáa` cøøng`guijiu laco'gui cagüéng` jnea` fi' jmigüi` la niing` guir eáang` laco' jnea~, dsuco' lajii` mi` nú'-gui eáang` e niliseeng` jnea`ba' e niseeiñ`.”

16 Jo co' eáam` guiúng` dsea` do cóo` jneaa`aa', joba' cuø'r` jneaa`aa' jalé` güea`^ quiá'r- cóo`gui jalé'gui e 'né` quí-ii' dseáng'- lalíng` e jii` ja` catíi`naa' lajo. 17 Jo la'eáang` cóo` Moi` cacuø' Fidié` jneaa`aa' júu` quiu' ta` quiá'r-; jo dsu'

la'eáang' cōo'~ Dsea` Jmáam~ba' e nicaline~naa' jial tíí' 'neáang' Fidiée' jneaa~aa' jogui la'eáang' cōo'~ íb' cajo e liti~ júu^ quiá'- Fidiée'. 18 Jo jíí'~ jaang` dsea` jmigüí' ja` mí' cangáaiñ` dseáng'- 'ñia' Fidiée', dsu' jíí'~ i Jōor' camáing'~ do i líng' Fidiée' cajo, jíí'~ íbing' i nicajmijnéeng` jial líng' Tiquiá'r^ Fidiée' uíí'~ e dseáng'- cōom` seeiñ` cōo'~ dsea` do.

*Mi~ café` Juan i seáang` dsea` jmí` cuaiñ` quiá'-
Dsea` Jmáang`*

(Mt. 3:11-12; Mr. 1:7-8; Lc. 3:15-17)

19 Jo cōo` jmíí~ jaléng' i dsea` i quie' nifí' quiá'- jaléng' dsea` Israel i seeng' fí' Jerusalén casííñ` cōo` tú~ máing'~ jmidsea` quiá'r~ cōo'~ gui jaang` gáng~ dsea` levita fí' lí~ táang` i Juan i seáang` dsea` jmíí` do e cangojmingí'r` dsea` do lala:

—¿i~ dsea` lin'?

20 Jōba' cañíí' i Juan do dseáng'- la líí' jo casíí'-reiñ' do lala:

—O' jnea~ i Dsea` Jmáang` i í' áa'na' i nisíng~ Fidiée' i nicá' nifí' quíí'-na'.

21 Jo cajmingí'-tu i dsea` do i Juan do calé' catú~ jo cajííñ'~:

—Jo ¿i~ dseáng'- líng' 'nə' jóng? ¿Su Líí' i café' cuaiñ` quiá'- Fidiée' malí'gui eáang'?

Jōba' cañíí'tu i Juan do jo cajííñ'~:

—U~, o' í' jnea~.

Jōba' calé' catú~ cajmingí'tu i dsea` do jo cajííñ'~ lala:

—¿Osi 'nə'bi i dsea` i caguíng' Fidiée' i nifé' cuaiñ` quiá'r~ i sijeeng'naa' fí' jmigüí' la?

Jōba' cañíí'tu i Juan do quiáíñ'- do jo cajííñ'~:

—U~, o' í' jnea~ cajo.

22 J_oba' i dseá do caléb' catú- cajmingí'r- i Juan do j_o cajíñ'-:

—J_o song o' lajogui, j_oba' çí~gui dseáng'- líng' 'n_u jóng? J_o c_o' dseáng'- la guím' 'né' lé'naa' júu^ i~ dseáng'- líng' 'n_u quiá'- i dseá i casíng' jnea'^ do, j_oba' çẽ fó' 'n_u uø' e lin'?

23 J_oba' cañí'tu i Juan do quiáiñ'- do:

—Jnea~ lán'n jaang' i fé' i cagüéng- fí' nĩ guóo' uó^ quiá, j_o quiee- júu^ quiá' Fidiée~ e catíng- 'nú' e fé' lala: “Nea~na' condsée' c_oo' fí', c_o' tí lí nijaáb' Fí'naa'” —lí^ laco' cajíng'- Fidiée~ fí' nĩ j_i quiá'r- e cajme' Saíí^, jaang' dseá i café' cuaiñ~ quiá'- Fidiée~ ie~ malií~gui eáang'.

24 J_oba' i dseá i casíng' dseá fariseo fí' lí táang' i Juan i seáang' dseá jmíi do cangosiiñ~ c_oo'~ dseá do 25 j_o cajmingí' tureiñ':

—J_o song ja' líng'gui' i Dseá Jmáang- i nisíng- Fidiée~ fí' la i nicá' nifí' qui~naa' o'gui Lí^ o'gui i dseá i fé' cuaiñ~ quiá'- Fidiée~, j_oba' çjialí' jmoo' ta~ seáang' dseá jmíi jóng?

26 J_oba' cañí'tu i Juan do quiáiñ'- do j_o cajíñ'-:

—Jnea~ seáan'n dseá jmíi j_i~ c_oo'~ layaang~ jmíi; j_o dsu' jee~ 'nú' niseem' jaang' i ja' mí cuíng'na'. 27 J_o lana tí lí nilicuím'ba' i dseá í, c_o' tí lí ninám'bre ta~ quiá'r-. J_o jnea~ fí' quini~ í ja' ee' quín'n, c_o' j_igui c_o' nisíi'~ nĩ' 'ñúú' lomíir- ja' quín'n.

28 J_o jalé' e la cangojée' fí' c_oo' fíi lí sii Betania e néé lí^ lí 'ngóo'~ gua Jordán, c_o' fí' j_ob lí táang' i Juan i seáang' dseá jmíi do ie~ j_o.

Jesús líiñ' i Jo'se' Jiuung~ quiá'- Fidiée~

29 Jo mí cajneá- coo`gui jmii~ lajo, i Juan do cangár- e nijaquíéeng' Jesús fí lí- siñ'. Joba' café'r` uii~ quiá'- dsea` do, jo casí'r- jaléng' i dsea` i teáng- cóo'r~ do lala:

—Fing na jøø-na', dob nijáa' i líng' i Jo'se" Jiu-ung~ quiá'- Fidiée` i íng- jalé' dsee- e røøng` dsea` jmigüi. 30 Jo i dsea` lab i éeng' jnea~ do ie~ lamí- café'-a lala: “Mí~ nisóong- jnea~, nijáa' jaang` i niing- gui eáang' laco' jnea~, dsuco' i dsea` í lajii'~ mí- ná'^gui eáang' e niliseeng' jnea~ba' e niseeiñ.”

31 Jo jii'~ jnea~ ja` mí caliñi`bii i~ dseáng'- dsea` do, jo dsu' cagá'-a fí jmigüi' la e gaseáan`n dsea` jmii' e laco' jaléng' dsea` góo`o dsea` Israel nilicuiñ` dsea` do.

32 Jo cajíng'-gui i Juan do lala cajo:

—Coo` jmii~ camó- jnea~ Jmiguí' quiá'- Fidiée` e cajgó- fí ñiff- jo cajé' fí yú'^ gui~ Jesús e líng- jaang` mee~. 33 Jo lajee` e ná'-gui lajo ja` mí ñi` jnea~ i líng' dsea` do, jo dsu' Fidiée` i casí' quié'-e e cagaseáan`n dsea` jmii' casí'r- jnea~ lala: “I dsea` i nimáan' i nijgié` Jmiguí' quié'-e fí yú'^ gui~, i dsea` í'bing' i niseáng- dsea` jmii' cóo'~ Jmiguí' quié'-e.”

34 Jo camób- jnea~ mí cangojée' jalé' e jo, joba' dseáng'- lajam'^ nita~ dsii- e Jesús líiñ' dseáng'- i Jóo' Fidiée` camíng'- do.

La'uii~ dsea` i ca'uíng- dsea` quiá'- Jesús

35 Jo mí cajneá- coo`gui jmii~ lajo, i Juan i seáang` dsea` jmii' do táaiñ` colíng~ cóo'~ gáng- dseañu' i nilíng' dsea` quiá'r-. 36 Jo lajee` job cangár- e cangíng' Jesús, joba' cajíñ'- casí'r- i dsea` quiá'r- do e fé'r' uii~ quiá'- dsea` i cangíng' do jo cajíñ'-:

—Fing na jóø̄-na', i dsea`ngóo' dob i líng' i Jo'se' Jiuung` quiá'- Fidié' i íng' jalé' dsee- e røøng` dsea` jmigüî.

³⁷ Jo dsifí' mi~ canúu- i dsea` gáng- do lajii~ e cajíng'- i Juan do, joba' lajmináb- cangolíñ- ti'leáaiñ' lacó' ngóo' Jesús. ³⁸ Jo mi~ calilí^ Jesús e líng' i` ngolíng- caluur~, joba' dsifib' cají'r' nir~ e cajøøiñ- i dsea` do jo cajmingí'- reiñ':

—¿I~ ñilíng-na' 'náng'na'?

Joba' cañíi' i dsea` do quiá'- Jesús jo cajíñ'-:

—Tífa', ¿jie' fí' quií'-?

³⁹ Joba' cañíi' Jesús quiá'- i dsea` do jo casí'- reiñ':

—Má-aa' cóo~ jnea~, jo lajob niliñí^na'.

Jo colim~ cangolíñ' cangojmiñir~ jie~ quiá'- Jesús, jo fí' job cajer' colíng~ lata~ e jmii~ jo, có' la ii~ quií~ e ca'lóob- ñingóo' ie~ jo.

⁴⁰ Jo jaang` lajee' i dsea` gáng- i canúu- júu^ quiá'- Juan i seáang` dsea` jmii~ do siir` Dí^ i nilíng` dsea` ngáang~ cóo~ jaang`gui dseañu' i sii` Simón, jo íb` i cangotáang- cóo~ Jesús do. ⁴¹ Jo dsifí' lajob cangó- Dí^ e cango'néeiñ' i rúíñ' i sii` Simón do, jo mi~ cadséng'neiñ' do lalab casí'r-:

—Janú', Simón, lana nicalicuím`baa i dsea` i cajíng'- Fidié' i nisíñ- fí' jmigüî la i sii` Dsea` Jmáang- i nicá' nifí' quií-ii' do.

⁴² Jo dsifí' lajob i Dí^ do cangojéeiñ' i rúíñ' i sii` Simón do fí' lí~ guiing~ Jesús; jo mi~ tí' lí~ cangá- dsea` do quiá'- Simón lalab cajíñ'- casí'- reiñ':

—Jo 'nub` i sii` Simón, jo lin' jóo' jaang`gui i sii` Juan, jo dsu' latí' lana nilisii^ Cefas osi Tú^ cóo~ jmíí' griego é.

Mi~ cató'- Jesús Lii~ cóo~ Natanael

⁴³ Jō mi~ cajneá~ cōō`gui jmi~ lajō, ca'f̂ dsí' Jesús e cangó~tur fí' lí' se' Galilea, jō fí' jōb cajíng' rúíñ' cōō'~ jaang`dseañu' i sii' Lii~, jō lalab casí'~ reiñ' do:
—Má~aa' cōō'~ jnea~.

⁴⁴ Jō i Lii~ do niseeiñ` fí' cōō` fii` e sii` Betsaida, jō dseá`góo`bre nilíng' i Dí' do cōō'~gui Tú^ Simón, cō' cōōb' fii` lí' seeiñ`. ⁴⁵ Jō dsifí' lajōb cangó~ Lii~ e cango'néeiñ'~ jaang`gui dseañu' i sii` Natanael, jō mi~ cajíng'neiñ' do, lala casí'~ reiñ':

—Lanab nicalicuíng`naa' i dseá` i ca'éeng` Moi' fí' ni~ jì` quiá'r~ malí~gui eáang', jōgui cajo i ca'éeng' jaléng' dseá` i café' cuaiñ~ quiá'~ Fidiéé' lí' laco'gui cajme'r' fí' ni~ jì` malí~gui eáang'. Jō i dseá' íb` i sii' Jesús i seeng' fí' Nazaret i líng' jōó' Sé^.

⁴⁶ Jō mi~ canúu~ Natanael e júu^ jō, jōba' cajíñ'~ lala:

—Ja` lí' dsii~ e fí' Nazaret nigüi'~ jaang` i ni'é`guiá~ cōō'~ dseá` rúng'.

Jōba' cañíi' Lii~ quiá'~ i dseá' do jō cajíñ'~:

—Má~aa' fí' lí' guiiñ~, jō lajōba' nilicuín' dseá' do.

⁴⁷ Jō mi~ cangá~ Jesús e nijaquíéeng' dseá' do fí' lí' siñ', jōba' cajíñ'~ lala e café'r' uii~ quiá'~ Natanael:

—I nab dseáng'~ lajang'^ jaang` dseá' góo`naa' dseá' Israel i ja` quie' júu^ ta~ júu^.

⁴⁸ Jō mi~ canúu~ Natanael e jō, jōba' cañíir` quiá'~ Jesús jō cajmíng'~r~ dseá' do lala:

—Jō ¿jial nicuín' jnea~ jial lán'n?

Jōba' cañíi' Jesús quiáñ'~ do jō cajíñ'~:

—Cō' lajúi'~ ná'~gui e nitó' Lii~ 'nu, jéem' nicamáng~ jnea~ 'nu' e guiin'~ uii' 'ma' güiñí'.

⁴⁹ Jōba' cañíi'tu Natanael quiá'~ Jesús jō casí'r~ dseá' do lala:

—Tifa', 'nub` dseáng' i líng' Joo' Fidié', jogui 'nub` cajo dseá` lin' dseata` dseá` féng' quiá'- jaléng' jneaa`aa', dseá` lí'í' dseá` Israel.

⁵⁰ Jōba' cañi'tu Jesús quiá'- i dseá` do calé` catú` jō casí'- reiñ':

—¿Su já'- lín' lana dsu' uí' e fá'a e camán` n 'nu` e guin'~ uii` 'ma` güñí'!? Jō dsu' jnea` fii`-i 'nu` e nábi nimó'` jalé` e niing`-gui eáang' e tiñ`-jmee`e.

⁵¹ Jō lalab cajíng'`-gui Jesús cajo e casí'r` lajaléiñ'` do:

—Jō lalab jmítāa` óóna' cajo e nimó`ba' jial jnéeng` fí` ñíí' fí` lí` guing` Fidié', jogui jial soo` jogui jgáang` jaléng'` ángeles quiá'- Fidié' fí` lí` sín`n, jnea` dseá` gáa'a fí` ñíí' e lín`n jaang` dseá` jmígüí`.

2

Mi` cajméé` Jesús la'uii` e quí'r` jmí`

¹ Jō mi` cangí` 'ní` jmí` lajō, jō ie` jō caliseá` cōo` jmí` e cung'` guó` dseá` fí` cōo` fii`jiu e sií` Caná e née' lí` se' Galilea. Jō ie` jō dob táang` Yá`, niquiá'^ Jesús, ² jō Jesús cóo'`-gui i dseá` quiá'r` do líiñ'` dseá` i simíng` quiá'- e jmí` e tí` do, jōba' fí` dob quijgeáaiñ` cajo. ³ Jō lajee` e teáaiñ'` e jmí` do, cōob` mi` cadseá` e jmí'^ mí'^ huíng` jó'^ e jmáiñ'` ta` do, jōba' niquiá'^ Jesús cajíñ'`- casí'r` dseá` do lala:

—Ngóo' cadseáb` e jmí'^ mí'^ huíng` jó'^ e jmáang` ta` do.

⁴ Jōba' cañi' Jesús quiá'- i niquiá'r` do jō cajíñ'`- casí'r` dseá` do lala:

—Neeá~, ¿jialí' fí' jnea` lana? Cō' lana ja` mí` catí'bi í' e nijmee` e lajii'` ta` e si'ín`n do.

⁵ Joba' cajíng' tu níquiá' Jesús e sír' i dsea` i jmóo` ta~ jmicóo' e sínúu` do:

—Jmee` na' lajaléb' ta~ quiu' i Jesús na.

⁶ Jo ie~ jo nitée~ jñúu` tu' cóo' e lí' cóo' layaang~ cuu~, jo e jo líng` ta~ e a~ jmii` e jmáng' dsea` Israel ta~ e lacq' jmiguiúng~ yaaiñ` fí' quini` Fidiée~, co' lajob quí' tñiñ` e jmóor`. Jo lacqo` e dsí' tu' cuu~ do ab~jiu la cincuenta si la setenta litro jmii`. ⁷ Jogui Jesús casí'r~ jaléng' i dsea` i jmóo` ta~ e sínúu` do lala:

—Jmirøøng` na' jmii` lacqo` lacqo` e tu' na.

Joba' dsifí' lajob cajmirøøng` i dsea` do dseáng' la có' e tu' do. ⁸ Jo mi~ cangí' jo, cajíng' tu Jesús casí' reiñ':

—Lana fñi` i 'nú' güiseáang'~jiu' e nicaguiée'` na' dsí' e tu' do, jo güica` na' quiá' i dsea` née' ni~ e jmii` la.

Joba' lajob cajméeiñ' do.

⁹ Jo i dsea` i quie' nifí' quiá' e jmii` do ca'í' bre capí' e do, jo dsu' jmí' mí' huíng` jó' nica'uíng' do, jo jí' ja` ñir' jial ca'uíng' do lajo. Jo jí' i dsea` jmóo` ta~ sínúu` dobing' i ñi' jial ca'uíng` jmí' mí' huíng` jó' e jmii` do, dsuco' yaam~bre cajmirøøiñ` jmii` e dsí' tu' do. Jo mi~ ca'í' i dsea` quie' nifí' e jmii` e ca'uíng` jmí' mí' huíng` jó' do, joba' dsifí' lanab cató'r~ i siming' i cacúng' guó' do ¹⁰ jo casí' reiñ':

—Lajim` dsea` cuør' la'uii~ e jmí' mí' huíng` jó' e jlo' gui, joba' mi~ tí' lí' nica'í' i dsea` simíng' do jmiguiúung` jiu e jmí' e jlo' do, joguiba' e niguié'r` e jmí' mí' huíng` jó' e uøng` gui do quiá' i dsea` simíng' do. Jo dsu' 'nu` nica'meá'ba' e jmí' mí'

huing` j0^ e jlo^gui do quia^- tı li~ ningoo' dseng-
jmı̃.

11 Jo e la cajmee` Jesús fı e fıı e sıi` Caná e nee' li~
se' Galilea. Jo e lab la'uii~ e quı̃r~ jmı̃ e dsigá dsıı'
dsea e cajmeer` fı jmı̃güı̃ la, jo laj0ba' cajmı̃neı̃ı̃
jial tıı' 'g0ı̃ı̃'. Jo jaléng^ dsea` quia'r- jáb^- calı̃ı̃-
júu^ quia^- dsea` do.

12 Jo mı̃ cangı̃ jo, Jesús cangór- fı coo` fıı e sıi`
Capernaum colı̃ı̃g~ cóo^~ niquia'r^ cóo^~gui jaléng^
rı̃ı̃ı̃' jogui cóo^~ jaléng^ dsea` quia'r- cajo; jo fı job
cajer' coo` tú- jmı̃ lajo.

*Mı̃ ca'u00ng` Jesús jaléng^ dsea` i jmoo` ta~ 'nı̃ fı'
guá^-*

(Mt. 21:12-13; Mr. 11:15-18; Lc. 19:45-46)

13 Jo mı̃ cangı̃gui lajo, co' nı̃jaquieem^bi e jmı̃
quia^- dsea` Israel e sıi` Pascua, joba' Jesús cagüı̃ı̃r'
fı Capernaum jo cangór- fı Jerusalén. 14 Jo mı̃ tı
lı cagüı̃er- fı jo, dsıfıb' cangór- fı guá^- fé' e sı' fı
jo, jo fı sigüı̃ job cadsı̃ı̃ı̃^ jaléng^ dsea` i teáng^
ta~ 'nı̃ı̃g^ jaléng^ güıtá^ cóo^~gui jaléng^ jo'se^ jogui
jaléng^ mee~. Jogui cangáı̃ı̃- cajo jaléng^ i neáng^
ta~ jmı̃sı̃ı̃g- cuu- e 'né- jaléng^ dsea` i dsıtáang^
fı e guá^- fé' do. 15 Joba' mı̃ tı li~ cangáng- Jesús
jaléng^ i dsea` í, dsıfı lalab casá'r- coo` tú- 'nı̃ı̃
jo catáı̃ı̃ı̃^ 'máang^ jo cóo^~ e job ca'u00ı̃ı̃ı̃ i dsea`
do colı̃ı̃g~ cóo^~ i jó^ nı̃u^ i jeeı̃ı̃ı̃^ do e 'nı̃ı̃ı̃ı̃.
Jogui cajı̃ı̃m` Jesús jalé^ mes~ quia^- jaléng^ i dsea` i
neáng^ ta~ jmı̃sı̃ı̃g- cuu- do, jo cagüı̃áb^- e cuu- do
fı nı̃ u00^ . 16 Jogui lalab cası̃ı̃ı̃- Jesús jaléng^ i dsea` i
jmoo` ta~ 'nı̃ı̃ı̃g^ jaléng^ mee~ do jo cajı̃ı̃ı̃ı̃^-:

-ıU00ng-na^ jaléng^ i mee~ na, jo ja` jmoo`na^
'moo^ fı guá^- lı~ jmı̃fıéng^ dsea` Tıquı̃e^e Fıdıeé^!

17 Jo dsifí' laj_o cadseng'⁻ dsí' i dsea` quiá'r⁻ do laj_i' e tó_o fí' ni' jì' quiá'⁻ Fidié[✓] lí' fé' lala: "Liguím⁻ jnea~ mi~ ja' jmi'gó' dsea` guá'⁻ lí' jmiféng'⁻ dsea` Tiquié[^]e."

18 J_oba' i dsea` Israel i quie' nifí' do cañir` quiá'⁻ Jesús j_o casí'⁻ reiñ' do lala:

—¿E~ quí'⁻ jmí~ nijmée'⁻ e laco' nilita~ dsi'naa' e cangín'⁻ fí' e cajmee'⁻ lajalé'⁻ e ná?

19 J_oba' cañí'tu Jesús quiá'⁻ i dsea` do:

—Íng'na' e guá'⁻ fé'⁻ e si' la, j_o jnea~ gui quí'⁻ baa jmí~ e nijmilíng[✓]túu có_o'⁻ 'ní' jmí~.

20 J_oba' cañí'tu i dsea` Israel do quiá'⁻ Jesús:

—Jial lí' e laj_o, có' tuló⁻ dsí' jñ^u j_i' calí'í' jnea'⁻ e calí' e guá'⁻ fé'⁻ na, j_ogui 'n^u fó' lana e có_o'⁻ 'ní' jmí^b lí' nijmilíng[✓]tu'.

21 Jo dsu' café'⁻ Jesús laj_o e éeng' 'ñia'r' có_o'⁻ ngúú' táam'bre mi~ cajíñ'⁻ cuaiñ~ quiá'⁻ e guá'⁻ fé'⁻ do. 22 Jo dsu' cartí' mi~ cangí' e cají'tu Jesús, j_o laj_ogui'ba' e cadseng'⁻ dsí' i dsea` quiá'r⁻ do laj_i' j_uú[^] e cajíng'⁻ dsea` do ie~ j_o, ie~ lamí~ cajíñ'⁻ e có_o'⁻ 'ní' jmí^b nilí'r' e nijmilíng[✓]tur e guá'⁻ fé'⁻ do. Jo j_ogui'ba' dseáng'⁻ já' calíng⁻ i dsea` quiá'⁻ Jesús do laj_i' j_uú[^] e silí' fí' ni' jì' quiá'⁻ Fidié[✓] có_o'⁻ gui jalé'⁻ j_uú[^] e cajíng'⁻ dsea` do lajee[✓] cateáaiñ' fí' jmigúí' la.

Niñib' Jesús jial líng' dsea` laj_i'ñ

23 Jo lajee[✓] táam'bi Jesús fí' Jerusalén, lajee[✓] jmí~ e qui'⁻ tíng' dsea` Israel e jmóor' jmí~ e sií' Pascua do, j_o lajee[✓] j_o jmigui^b' jalé'⁻ e quí'⁻ Jesús jmí~ cajmээр' fí' quini[✓] jaléng'⁻ i dsea` i siseáng'⁻ do ie~ j_o, j_oba' i fíim' i dsea` í' já' calíng⁻ j_uú[^] quiá'⁻ dsea` do. 24 Jo dsu' Jesús ja' ta~ dsí' có_o'⁻ i dsea` do có' nⁱcuím'breiñ' do guiá' jial lííñ' do laj_i'ñ. 25 Jo có'

niñí bre 'ñia'r' guiú- jial líng' dsea` jmigüí, joba' ja` 'neaiñ- dsea` jiéng' i nijmeá- júu` ír' jial í dsí' dsea` jmigüí.

3

Mi~ casñng- Nicodemo cóo~ Jesús

¹ Jo mi~ cangfiu lajo, lajee` e táam`bi Jesús fi Jerusalén, jo ie~ jo nitáang` fi jo jaang` dsea` Israel i sii Nicodemo i nilíng' dsea` fariseo, jo i dsea` í líiñ' jaang` dsea` i laniing- jee~ jaléng' dsea` góor` dsea` Israel. ² Jo cóo` lajee` e uø` cangór- e cango`eer` Jesús, jo mi~ caguiér- fi jo lalab casí'r- dsea` do:

—Tifa', nineb~ jnea` røø` e Fidiéeb` dsea` casíiñ` 'nu` fi jmigüí la e cañi'ée` jnea`, dsaco' jíi~ jaang` dsea` jmigüí ja` quí'r~ jmii` fa' líng~ ee` lí~ nijmér- e dsigá` dsí' dsea` jíi~ laco' quí~ 'nu` jmii` e jmoo` fíng song ja` jmicoo~ Fidiée` quiá'r-.

³ Joba' cañi` Jesús quiáiñ'- do jo cajíñ'-:

—E laba' jmítaa` o', e doñi` ii` dsea` i ja` niníng` tu calé` catú- e ni`uúñ- jaang` dsea` i m'íng- la'eáang' cóo~ Fidiée`, joba' ja` quí'- jmii` jóng fa' e dsea` do nicá` nifí quiá'r-.

⁴ Joba' cajmingí tu Nicodemo e cajmingí'r- Jesús jo cajíñ'-:

—¿Jial quí'- jmii` e jaang` dsea` yuu~ niquing` tur fi dsí' tu' niquiá'r` jo niníng` tur calé` catú`?

⁵ Joba' cañi` tu Jesús quiá'- Nicodemo jo cajíñ'- casí'-reiñ':

—E laba' jmíta~guí o' cajo, e doñi` ii` dsea` i ja` ngáang` la'eáang' cóo~ jmii` jogui cóo~ Jmiguí quiá'- Fidiée`, joba' ja` quí'- jmii` fa' e nilí'r` e Fidiée` nicá` nifí quiá'r-. ⁶ Co' doñi` ii` dsea` i níng`

quia' tiquia'^ niquia'^, joba' jii'~ dsea` jmigüib`
 líiñ'; jo dsu' jaléng' i dsea` i liseeng` la'eáang` cóo'~
 Jmiguí' quia'~ Fidiéé', joba' Jmiguí' job jée' quia'r~.
 7 Jo ja` güidsigá' o' dsu' uíi'~ e fíi' i 'nu` na, e lajim`
 dsea` 'né~ e niliseeng`tur e laco' ni'uíiñ` dsea`
 'míng` la'eáang` cóo'~ Fidiéé'. 8 Cofa' guí' fí' la
 fí' nab íí, jo lico' nuu`baa' e ii` dsu' ja` jnéeng` e
 jóø`naa' jie` fí' ngóo' osi jie` fí' jáa' é. Jo dseáng'~
 lajob líí' cajo cóo'~ i dsea` i uíng` dsea` 'míng`
 la'eáang` cóo'~ Jmiguí' quia'~ Fidiéé', co' ja' lí' dsea`
 jóør` jial mi` uíng` dsea` lajo.

9 Joba' cajming'í'tu Nicodemo cajming'í'r` Jesús
 calé' catú'~ jo casí'r` dsea` do:

—¿Jial cuóøng` e nilí' e fó' na, Tifa'?

10 Joba' cañí'tu Jesús quia'~ dsea` do jo cajíñ'~
 casí'~reiñ':

—¿Jaang` tifab' líng' 'nu` quia'~ dsea` Israel, jo ja`
 ngám'bi' jalé' e fá'a la? 11 Jo jnea` jmitaa` o' e
 lajii'~ e neb` jnea'^, jii'~ joba' fé'naa', jogui lajii'~ e
 nuu`naa' jogui ne'naa', lajii'~ e job júu` e guia'naa'
 jee` 'nú'; jo dsu' 'nú' ja` já'~ líng`na' lajii'~ júu`
 e fé'naa' do. 12 Jo song` 'nú' ja` já'~ líng`na' mi`
 fá'a júu` cuaiñ` quia'~ fí' jmigüi' la, joba' ¿jial já'~
 nilíng`na' jóng` mi` fá'a cuaiñ` quia'~ fí' ñifí'?

13 Jo jii'~ jaang` dsea` ja` mi' cajgóor` fí' ñifí',
 co' dseáng'~ lajii'~ 'ñiá'baa` dsea` gáa'a fí' jo; jo
 cagüén`n fí' jmigüi' la e lín'n jaang` dsea` jmigüi'.
 14 Jo lí'^ laco' cajmée` Moi` ie` lamí' cajmeaaiñ`
 jaang` mi' cóo'~ layaang` ñí' jo cateaaiñ` fí' yá'^ cóo`
 'ma', jogui dseáng'~ lajob 'né~ nidsing'íng` jnea`
 cajo, jnea` dsea` gáa'a fí' ñifí' e lín'n jaang` dsea`
 jmigüi', co' niteáng` dsea` jnea` fí' cóo` dse' 'ma`

cajo¹⁵ e laco' doñí' ii dsea` i ja' nilíng` júu^ quié` e quí' jmi~ e niliseeiñ` cøøng` cóo~ Fidié` lata`.

Dsíng` 'neáang` Fidié` jaléng` dsea` jmiçüü'

¹⁶ Jo co' eáam' 'neáang` Fidié` jaléng` dsea` jmiçüü', joba' cacuøøiñ` i Jóor' camíng` do e laco' cajúng` dsea` do cuaiñ` quiá' jaléng` dsea` jmiçüü'; jo lajoba' jaléng` dsea` i jáng` yaang` fí jaguó` dsea` do ja quí' jmi~ fa' e ni'náañ` quiá' Fidié`, co' cøøm` niliseeiñ` cóo~ dsea` do lata`. ¹⁷ Dsaco' Fidié` ja` casíñ` i Jóor' do fí jmiçüü' la e laco' ni'í` dsea` do í' e nidsilíng` dsea` fí lí` 'lí'^, co' casíñ` dsea` do fí la e lí'^ laco' nileáañ` dsea` jee` jalé' dsee` quiá'-biñ'.

¹⁸ Jo doñí' ii dsea` i jáng` 'ñia' fí jaguó` i Jóo' Fidié` do, joba' i dsea` í ja` ni'íñ` iihuí' uii` quiá' jalé' dsee` quiá'r` mi~ nití` í' lajo; jo dsu' i dsea` i ja` jáng` 'ñia' fí jaguó` i Jóo' Fidié` do, joba' i dsea` í ni'ím` bre iihuí' uii` quiá' jalé' dsee` quiá'r`, co' ja` mí cajáng` 'ñia'r' fí jaguó` i Jóo' Fidié` camíng` do. ¹⁹ Joba' lajaléng` dsea` i ja` jáng` yaang` fí jaguó` Fidié`, nibíñ` fí lí` 'lí'^ uii~ e eáang` gui catí dsíir' e cajméer` jalé' e ja` dseeng`; co' ie~ mí cagüéng` fí jmiçüü' la i Jíng` quiá' Fidié` do, ja` calijí~ jaléng` dsea` i dsea` í, co' e lí` nua` sò' dob cajmeáang` gui quiá'r` e laco' gui i Jíng` quiá' Fidié` do é. ²⁰ Jo jaléng` dsea` i jmóo` jmang` e 'lí'^ 'ní' ním` bre i Jíng` quiá' Fidié` do, jo jíí~ capí' ja` iñ` nidsiquiéeiñ` fí cáang` dsea` do, co' ja` iñ` e nilí'í'^ dsea` jmiçüü' jalé' e 'lí'^ e jmóor` do. ²¹ Jogui dsu' jaléng` i dsea` i seeng` cøøng` cóo~ júu^ quiá' Fidié` laco' catíng`, joba' tib' dsíir' e dsiquiéeiñ` fí quini` i Jíng` quiá' Fidié` do e laco' cuø` lí` quiá'r`

e jaléb' e jmóor` do cóøm` røø` laco'gui jii~ e iing~ Fidiée` e nilí`.

Mi~ café'tu Juan i seáang` dsea` jmii` do cuaiñ~ quiá'- Jesús

²² Jo mi~ cangí'guijiiu lajo, cangób-tu Jesús colíing~ cóo'~ jaléng' dsea` quiá'r- fí' lí' se' Judea, jo fí' job cajer' huóøm` jiiu e seáaiñ` jmii` jaléng' dsea` i guilíing- fí' do. ²³ Jo ie~ job cajo i Juan do táaiñ` ta~ seáang` dsea` jmii` fí' quiá'- coo` fii` lí' sii` Enón ca' lí' née' coo` fii` e sii` Salim, co' fí' job lí' sea` jmii` jmiguiúung`, jogui fíim' dsea` dsilíiñ- fí' jo e sáaiñ` jmii`. ²⁴ Jo jalé' e la calí- lajee` nú'-gui e nitáaiñ' i Juan do fí' dsí' 'nuñí`.

²⁵ Jo i líing~ i dsea` i ngí' cóo'~ i Juan do canaiñ` jiiñ` cóo'~ jaang`gui dsea` Israel cuaiñ~ quiá'- jalé' e quiá'- tiiñ` jmóor` e laco' liguiúiiñ- fí' quini` Fidiée`. ²⁶ Joba' cangolím`bre e cangosí'r~ i Juan do, jo lalab casí'r- dsea` do:

—Tifa', i dsea` i lamí~ táang` cóo'~ 'nu` lí' lí' ngóol` gua` Jordán do i ca'eeng- 'nu` do jogui i nicafée'~ uii~ quiá'- do, lana dsea` í` dob nitáaiñ` seáaiñ` dsea` jmii`, jo fíing`gui dsea` nidsiquí'r` ír` laco'gui 'nu`.

²⁷ Joba' lalab cañí' Juan quiá'- i dsea` do:

—Lajim` dsea` lí'r` jalé' e sea` quiá'r- dsu' uí'~ e Fidiée`bing' i jmicóo'~ quiá'r- e lí'r` jalé' e jo. ²⁸ Jo 'náb' dsea` nicanáa-na' røø` mi~ café'a e o' jnea` Dsea` Jmáang-, co' jnea` lín'n jaang` i casíing` Fidiée` i caguéng- jéeng`gui laco' dsea` do e laco' cagaguaiaa- guiá' fí' quiá'- dsea` do. ²⁹ Co'a' coo` lí' cung' guó' dsea`, jo i siming' do í'bing' i jée' quiá'- i simí' i cacúng'- guó' cóo'r~ do, jogui i dsea` i ngóo' caluu` i siming' do eám' lí'íáang` dsír' mi~ núur` e

síiñ' do. Jøgui dseáng'- lajob lí' quié- jnea~ lana, cø' dseáng'- eáam' íáang` dsii- mi~ núu'u lajo. ³⁰ Jø dsea` do eáang'gui ngóo' líniiñ-, jø dsu' jnea~ lí' lí ngóo' lí'uóng-guáí.

Dsea` i jaa' fi' ñifi-

³¹ Jø lalab cajíng'-gui Juan:

—Jø i dsea` i jaa' fi' ñifi- niing-guir jee~ jaléng' dsea` jmigüi; jogui i dsea` i líng' dsea` jmigüi, jmang'- júu^ quiá'- fi' jmigüi'ba' quier'. Jø i dsea` i jaa' fi' ñifi- do, niing-guir jee~ jaléng' dsea` jmigüi.

³² Jø íb` dsea` i fé' quiá'- lajii~ e nicangár- jogui lajii~ e nicanúur- fi' lí' guíng- Tiquiá'r' fi' ñifi-, jø dsu' jii~ jaang` dsea` ja` jí'r~ lajii~ júu^ e fé' dsea` do. ³³ Jø dsu' doñi' ii` dsea` i já'- líng' júu^ quiá'- dsea` do, joba' tí' nir~ e jmang'- júu^ já'-ba' fé' Fidié'.

³⁴ Jø i dsea` i nicasing' Fidié' fi' jmigüi' la, jmang'- júu^ quiá'- dsea` í'ba' fé'r, dsucø' Fidié'bing' i cuø' dsea` do lalíng' Jmiguí quiá'r-.

³⁵ Jø Fidié' eáam' 'neáaiñ` i Jøor' camíng'- do, jogui cacuø'r' dsea` do e óoiñ' ta~ e ninéé niñ' lajalé' e sea` fi' jmigüi. ³⁶ Jø doñi' ii` dsea` i jáng' yaang~ fi' jaguó` i Jøo' Fidié' do, joba' niliseeiñ` cøøng` cøo'~ dsea` do lata~; jø dsu' i dsea` i ja` iing~ jáng' yaang~ fi' jaguó` i Jøo' Fidié' do, joba' ja' qui'-

jmí~ fa' e niliseeiñ` cøøng` cøo'~ Fidié' lata~, cø' lí' lí latab~ niñiñ` ihuáí eáang' e cuø' Fidié' jaléng' i dsea` la'í.

4

Mi~ cangíng' Jesús fi' lí' se' Samaria

¹ Jø mi~ cangíng'gui lajo, lajee~ e táam'bi Jesús fi' lí' se' Judea, calilí' jaléng' dsea` Israel i líng' dsea`

fariseo e fñing'gui dsea` nidsiqui' quiá'- Jesús e sáaiñ` jmiñ` lacogui i dsea` i dsiqui' Juan i seáng` dsea` jmiñ` do. ² Jo dsu' e já'-, o' dseáng'- Jesús dsea` i seáng` dsea` jmiñ` do, co' dsea` quiá'- bre i jmoo` ta~ lajo e júu` sinú'r^ quiá'- dsea` do. ³ Joba' mi~ caliñi' Jesús lajii~ e í dsí' i dsea` Israel i lñing' dsea` fariseo do uii~ quiá'r-, joba' cagüi'ñ bre coling~ cóo'~ dsea` quiá'r- fí li~ se' Judea, jo cangolín-g-tur fí li~ se' Galilea.

⁴ Jo dseáng'- la guím` 'né- ngüñ- fí li~ se' Samaria lajee` e teáaiñ~ fí e ngoliñ` fí li~ se' Galilea. ⁵ Jo lajob caguiliñ- fí coo` fñ e neé dsí' li~ se' Samaria li~ siñ Sicar, fí quiá'- li~ röö` guoo'~ uo~ quiá'- 'li~ yuu~ Jacoo^ e cangüñ fí jaguó` i jóor' i siñ Sé^ do lajii~ mali'. ⁶ Jo fí job li~ lí coo` too` e a' eáang' li~ níng'~ jmiñ, jo fí job li~ calí- ojmi^ quiá'- 'li~ yuu~ Jacoo^. Jo nijaquíeng' guieñb'- mi~ caguié- Jesús coling~ cóo'~ dsea` quiá'r- e fí ojmi^ do, jo fí job cajmi'íng' dsea` do co' eám' nifñiñ' e ngir', jo dob caguár` cáang` e too` a~ jmiñ` do. ⁷⁻⁸ Jo lajee` jo i dsea` quiá'r- do cangoliñ^ e cangoleáar` jalé' e nidó'r- e fí fñ Sicar do. Jo e fí ojmi^ dob cajé Jesús ñia'r' lajee` jo, jo co'ná^ lajob caguié- jaang` dseamî i seeng` fí li~ se' Samaria e fí ojmi^ do, joba' lalab casi'- Jesús i dseamî do:

—¿Já^ cuó'`jiu' jnea~ jmiñ` dúu~u?

⁹ Jo co' jaléng' dsea` Israel dseáng'- ja` røø` seem`bre cóo'~ jaléng' dsea` i seeng` fí li~ se' Samaria, joba' i dseamî do cañir' quiá'- Jesús lala:

—¿Jial cuøøng` fo^ lajo? Co' jaang` dsea` Israel lñing` 'nu, jo ja` litñing` 'nú' fa' lñing~ ee` mñi~na' jnea', dsea` lí'naa' dsea` Samaria.

10 J̄oba' cañí'tu Jesús quiá' i dseam̄ do:

—Faco' j̄iñ~ ñí^ 'n̄a' jalé' e guiá~ e iing~ Fidiéé~ e cuø'r~ 'n̄a', jogui faco' ñí^ cajo i~ jnea~ dsea` i m̄í~i 'n̄a' jm̄iñ, j̄oba' faco' lajo, 'n̄ab` dsea` cat̄ín' e nim̄í~ jnea~ jm̄iñ jóng, j̄oba' jneab~ nicuøø^ø 'n̄a' e jm̄iñ cóo'~ e cuø' e seeng` dsea` lata~.

11 J̄oba' cañí' i dseam̄ do quiá' Jesús j̄o casí'r~ dsea` do lala:

—Fí'i, j̄í'~ coo' ja` quié^ 'n̄a' cóo'~ e niguí^ jm̄iñ fí dsí' e too` la, j̄o dsíng'~ a'. J̄oba' ¿e~ cóo'~ niqúín' e jm̄iñ e fó' e nicuø'^ jnea~ do? 12 J̄o 'l̄i~ yáa~ quí~ii' Jacóo^ caséer' e ojm̄í^ la quí~ii', co' fí lab lí cacár~ jm̄iñ e jm̄áiñ' ta~ cajo, jogui laj̄obi jaléng' j̄oor' cóo'~ gui jaléng' j̄o' núu^ i ca'eáaiñ, fí lab lí ca'uø'r' jm̄iñ e ca'íng' neiñ' do. J̄o ¿su 'n̄a' í o' e niing~ gui' laco' i dsea` í?

13 J̄oba' cañí'tu Jesús quiá' i dseam̄ do j̄o ca-jíñ'~:

—Jaléng' dsea` i í' jm̄iñ e uøø` dsí' e too` la niguiáb'tu jm̄ijm̄iññ~ calé' catú~; 14 j̄o dsu' i dsea` gui i ni'í' e jm̄iñ e nicuøø^øre do, j̄oba' j̄o t̄oo` jm̄iñ fa' e niguiá' gui jm̄ijm̄iññ~. Dsaco' e jm̄iñ j̄o lí lafa' e contøøm~ sea` jm̄iñ fí dsí' tu'r' cóo'~ e cuø' e seeiñ, j̄o e j̄o lí e contøøm~ seeiñ cøøng` cóo'~ Fidiéé~ lata~.

15 J̄oba' cañí'tu i dseam̄ do quiá' Jesús j̄o casí'r~ dsea` do lala:

—Fí'i, iim~ baa nicuø'^ jnea~ e jm̄iñ e fó' na e laco' j̄o niguiá' gui jm̄ijm̄iññ~ o'gui 'ne~ gui fa' e gáa' a tí la e gaquiee^ jm̄iñ.

16 J̄oba' cajíng'~ Jesús casí'r~ i dseam̄ do:

—Guóng' cateá` j̄o güitee~ dseañu' quí'~ j̄o ñilíng~ tu' fí la.

17 J̄oba' cañíi' i dseamî do quiá'- Jesús:

—Ja` cóo'~o dseáng' dseañu` quié` e.

J̄oba' cañíi'tu Jesús quiá'- dsea` do:

—Jáb'- laco' cafée'~ na, dseamî, e o' dseáng'- dseañu` quií'- i cóo'~ lana; 18 dsuco' lamî~ jéeng'gui 'ñíing-gui dseañu` i nicacúng'- guóo' cóo'~, j̄oba' i dseañu` i cóo'~ na lana ja` líiñ' dseáng'- dseañu` quií'-.

19 J̄o mi~ tí li~ canúu- i dseamî do e cajíng'- Jesús e júu^ j̄o, j̄oba' cañíir` quiá'- dsea` do lala:

—Fíi', lanab calilí^i e 'nu` lin' jaang` dsea` i fé' cuaiñ~ quiá'- Fidiée'. 20 J̄o jaléng' 'lii~ yúu~ quií'-ii', dsea` Samaria, quií'- tiiñ' e jmiféiñ' Fidiée' fí ni` e mó' la, j̄o dsu' jaléng'gui 'nú', dsea` Israel, fól'na' e j̄úí' fí Jerusalén li~ 'né` e nijmiféng'naa' Fidiée'.

21 J̄oba' cañíi'tu Jesús quiá'- i dseamî do j̄o casí'-reiñ':

—Já'- güilín' júu^ quié` e, dseamî, e nijaquíém' e nití' í' e 'nú' nililí^na' e ja` 'né` nigüilíng-na' fí e yú'^ mó' na e güijmiféng'na' Tiquí'ii' Fidiée', o'gui 'né` fa' e nigüilíng-na' cartí Jerusalén cajo e laco' güijmiféng'na' dsea` do. 22 Co' 'nú', jaléng' dsea` Samaria, j̄úí' ja` cúing'na' i~ i jmiféng'na' do; j̄o dsu' jaléng' jnea'^, dsea` lí'naa' dsea` Israel, nicuímbaa' i~ i 'né` jmiféng'naa' do, co' jee~ jnea'^, dsea` lí'ii' dsea` Israel, j̄ob li~ cagúing' Fidiée' jaang` i nileáng- dsea` jee~ jalé' dsee~ quiá'r-. 23 J̄o catb'e í' j̄o, j̄o dseáng'- lanab liy, e jaléng' dsea` i dseáng'- lajang'- júu^ i jmiféng' Tiquí'ii' Fidiée' 'né` nijmér- dseáng'- laco' sí'í^ la'eáang' cóo'~ Jmiguí quiá'- dsea` do, dsuco' dseáng'- laj̄ob iing~ Tiquí'ii' Fidiée' e nijmé- jaléng' dsea` i jmiféng' ír'. 24 Dsuco'

Fidiéẽ l̄iĩñ' Jmiguí, joba' jaléng' dsea` i jmféng' ír, 'né- nijmér- lajō la'eáang' cóo' Jmiguí quiáb'- dsea` do dseáng'- laco' sí'í.

25 Joba' cañí'tu i dseam̄ do quiá'- Jesús jō cajíñ'-:

—Niñib` jnea~ e tí lĩ nijáab' i cajíng'- Fidiéẽ i nisíñ- do i l̄ing' Dsea` Jmáang- i nicá` nifí' quí-ii', joba' mi~ tí lĩ nigüéeng- dsea` do fí' la, íguib dsea` i ni'é'- jnea^ jalé' e jō.

26 Joba' cañí'tu Jesús quiáíñ'- do jō cajíñ'-:

—Dsea` íbi jnea~ i sing' s̄ing` cóo' 'nú' lana.

27 Jō lajee~ gui'nang' fé' Jesús e job, mi~ caguilíng` i dsea` quiá'r- do i cangolíng` e cangoleáa~ e nidø'r-, jō mi~ cangáíñ- Jesús e táang` dsea` do s̄iĩñ` cóo' jaang` dseam̄, joba' eám' cangogá' dsír' mi~ cangár- lajō. Jō dsu' j̄i' jaang` dsea` do ja` cateá- dsír' fa' ee` nijming'í'r- Jesús uii~ quiá'- i dseam̄ i sing' do, o'si e~ quiá'- e s̄iĩñ' do é. 28 Jō ngí jō, jō dob caséé' i dseam̄ do e dsuu- quiá'r- do e lí' sí'í niguié'r' jm̄ do, jō caquim'- tur fí' jee~ fī; jō mi~ caguiéíñ'- fí' jō, canaaiñ' guiar' júu^ jee~ jaléng' dsea` góor` jō sí'reiñ' lala:

29 —Má-aa', jō majmicuíng`naa' jaang` dseañu' i nicamán-n i nicajmea' jnea~ júu^ quiá'- jalé'ba' e nicajmé-e jéeng'gui, jō jangám- íb' i dsea` i cajíng'- Fidiéẽ i nisíñ- fí' jmiguí la i l̄ing' Dsea` Jmáang- i nicá` nifí' quí-ii'.

30 Jō mi~ canúu- i dsea` góor` do e júu^ jō, dsifib' ca'uøøiñ' fí' jee~ fī col̄ing~ cóo' i dseam̄ do jō cangolíñ` fí' lĩ táang` Jesús. 31 Jō dsu' lajee~ ná' gui e niguilíñ'- do fí' lĩ táang` Jesús, i dsea` quiá'- Jesús do casí'r- dsea` do jō cajíñ'-:

—¿Já^ cø^'jiu' í^, Tifa'?

³² Jøba' dsea` do cañíir` lala:

—Seab` cøø` e jié`gui e 'né` nidøø'~ø e jii'~ 'nú' ja` ñí^na' jial líí'.

³³ Jø mi` tí` lí` canúu` i dsea` quiá'r` do e jø, jøba' canaaíñ` sñiñ` lajee` la'ó' yaaiñ` jø jmingí'~ rúíñ':

—Jangám` song líing` ii` nijaca` e nicagø'r'.

³⁴ Jøba' cañíi` Jesús quiá'` i dsea` quiá'r` do jø casí'~reiñ':

—'Né` nijmee` e lajii'~ e iing` i dsea` i casíing` jnea` do, jøgui e nijmité' e lajii'~ ta` e cangín`n quiá'` dsea` do, jøba' e jøb e líí` lafa' mi` gø'`ø ii` e lítaan`n guiá^'. ³⁵ Jø dsu' 'nú' fó'na' lala: "Né` bi` quiúung`-gui si' e nicuø` lajii'~ e cangojneá` do"; jø dsu' jnea`gui fñi` i 'nú' e 'né` cá`na' cuente e lajii'~ e sijnea` do nicalineáang`, jøba' nicuø' lí` jóng e nicatíb` í' e nisítíing'. ³⁶ Dsøco' i dsea` i jmóo` ta` e sitíing' lajii'~ e roo` do, jøba' ím`bre lajii'~ e catíiñ` quiá'` e ta` e jmóor` do. Cø' jalé' e roo` e sitíiñ' do líí` lacø' jaléng` dsea` i liseeng` cøøng` cøø'~ Fidiéé` lata`. Jø cø' lajòb líí', jøba' i dsea` i jni` do cøø'~gui i dsea` i sitíing' do, røøb` nili'íáang` dsíir' laji` tú` íiñ' do mi` caroo` e cajnír` do. ³⁷ Cø' e jáb'` dseáng'~ lajii'~ e júu` røø` e fé' lala, "I jjiém'" i dsea` i jni` do, jøgui i jjiém'`bi` i nisítíí` mi` niró'." ³⁸ Jø jneab` dsea` casín`n 'nú' e caguisítíing`na' lajii'~ e caroo` do e jii'~ 'nú' ja` caquié`na' ta` quiá'` jial cangojneá` jalé' e jø, cø' i jjiém'" i dsea` i cajmée' ta` jø, jøgui 'núb' dsea` i nicali'øøng` lajii'~ ta` e cajmée' i dsea` í'.

³⁹ Jø i fñim' dsea` i seeng` e fñi` Sicar do jáb'` calíiñ` júu` quiá'` Jesús la'eáang' cøø'~ júu` e cajmée' i dseamí` do ie` mi` cajíñ'` lala: "I

dseañuⁿ do nicajmea[']bre jnea[~] júu[^] quiá[']- jalé[']ba[']
e nicajmé⁻e jéeng[']gui.” ⁴⁰ Jo mi[~] tí['] lí[~] caguilíng⁻
i dsea[^] góo[^] i dseam[^] samaritana do fí['] lí[~] táang[^]
Jesús, joba['] camir['] jmi[']ee[~] fa['] nijé⁻bi dsea[^] do cóo[']
ír. Joba['] lajob cajmée[^] dsea[^] do, caje[']bre cóoiñ['] do
lajee[~] tú⁻ jmí[~], ⁴¹ jo i fím[']bi i dsea[^] í['] cajáng['] yaaiñ[~]
fí['] jaguó['] Jesús mi[~] canúur⁻ lajii['] júu[^] e fé['] dsea[^] do.
⁴² Jo lalab casí['] i dsea[^] do i dseam[^] dsea[^] góor['] do:

—Jo lana dseáng['] lajang['] júu[^] nijá[']- lí[']naa['] júu[^]
quiá[']- i dsea[^] na, co['] dseáng['] nicanú[']baa['] yee[~]naa[']
jial lí['] júu[^] quiá[']r⁻, jo o['] jii['] e júu[^] e cajmée['] 'na[']
jneá[^] do. Joba['] nine[~]baa['] jogui nita[~]bi dsi[']naa[']
cajo e dsea[^] íb['] i láang['] dsea[^] jmigüi['] jee[~] jalé['] dsee⁻
quiáiñ['].

Mi[~] cajmi[']leáng⁻ Jesús jaang['] siming['] jiuung[~]

⁴³ Jo mi[~] cangí['] e tú⁻ jmí[~] e caje['] Jesús cóo['] i dsea[^]
do, cagüi[']í[']bre e fí['] guóo['] uó⁻ lí[~] se['] Samaria do jo
ca[']íb⁻tur fí['] e ngóor['] fí['] lí[~] se['] Galilea. ⁴⁴ Dsuco['] lí[']
laco[']gui jii['] júu[^] e tíing['] Jesús, e jii['] jaang['] dsea[^] i fé[']
cuaiñ[~] quiá[']- Fidiée[~] fa['] jmi[']gó['] dsea[^] góor['] ír. ⁴⁵ Jo
dsu['] mi[~] caguíeng['] Jesús fí['] góor['] fí['] lí[~] se['] Galilea,
jalém['] i dsea[^] i seeng['] fí['] jo guiúb⁻ ca[']íñ['] dsea[^] do,
co['] jaléng['] i dsea[^] í['] cangolíim[^]bre fí['] Jerusalén e catí[']
jmí[~] Pascua, jogui cangá⁻bre jalé['] e quí['] jmí[~] e
cajmée[^] Jesús ie[~] jo.

⁴⁶ Jo lajee[~] jo caquim[']-tu Jesús fí['] e fí['] e sii['] Caná
do e néé['] lí[~] se['] Galilea e fí['] lí[~] cajmээр['] e ca[']uíng⁻
jmí['] mí['] huíng['] jó['] e jmí[~] do. Jo fí['] job niseeng[']
jaang['] dsea[^] nu[']luu[~] quiá[']- jaang['] dseata[~] dsea[^]
féng['], jo dsea[^] í['] niseeng['] jaang['] siming['] jiuung[~]
quiá[']r⁻ i niráang['] dsée['] fí['] e fí['] e sii['] Capernaum.
⁴⁷ Joba['] mi[~] tí['] lí[~] caliñí['] dsea[^] do e nitáang['] Jesús e

fi' fiñ jò e jaiñ' fi' li' se' Judea, jòba' cangó-bre fi' li' táang` dsea` do, jò camí'r` dsea` do jmi'ee' fa' e nidséiñ'- do fi' quiá'r- e nidsijmi'leáaiñ` i siming` jiuung` quiá'r- do, cò' ráaiñ' do e tí' li' nijúum-bre.
 48 Jòba' cañí' Jesús quiá'- i dsea` do jò cajíñ'-:

—Nú' ja` já'- nilíim`bi' fíng song ja` nimó^na' jalé' li' e quí' i jmi' jmó'o.

49 Jòba' cañí'tu i dsea` nu'luu~ do quiá'- Jesús jò casí'r- dsea` do:

—Fí'i, fa' jgiéè` o' e guó^ba' lajminá- fi' quié-e nú'-gui e nijúung` i jiuung` quié-e do.

50 Jòba' lalab cañí' Jesús quiá'- i dseañu' do jò casí'-reiñ':

—Quíng`tu fi' quií', cò' nica'láam- jòo'.

Jòba' lajob cajmée` i dseañu' do, caquim'-tur fi' quiá'r-, cò' jáb'- calíñ- lajii~ júu^ e casí'- Jesús ír'.
 51 Jò lajee` iuuiñ- fi' e ngaiñ' fi' quiá'-bre mi~ cajíñ' guiá'^ fi' i dsea` 'léeng` quiá'r- i jalíng- fi' jò, jò lalab cajíng'- dsea` do mi~ cajíñ':

—Nica'láam- jòo'.

52 Jò mi~ canúu- i dsea` do e júu^ jò, jòba' cajmingí'-reiñ' do e í' dseáng'- e ca'láang- i jòor` do.

Jòba' lalab cañí' i dsea` 'léeng` do quiá'r-:

—Lado guiéè- la ii- còo` e ca'lóob- caguá- iu~ guíiñ^ jò ca'láam-bre.

53 Jò mi~ canúu- i tiquíá'^ i jiuung` do e júu^ jò, jòba' dseáng'- calí'lí'r^ e dseáng'- e í' jòb mi~ casí'- Jesús ír` e nica'láam- jòor'. Jòba' i dsea` do colíng` cóo'~ jaléng` dsea` sinúu^ quiá'r- cajám' yaaiñ- fi' jaguó` Jesús ie~ jò.

54 Jo cóo' e nab catî tú e li e quí' Jesús jmí e cajméer' ie mi caqing' tur fí li se' Galilea e jaiñ' fí li se' Judea.

5

Mí cajmi'leáng Jesús jaang` dsea` i caang` tñ

¹ Jo mi cang'gui lajo, mi catî tu í e jmóo` dsea` Israel jmí fí Jerusalén, joba' fí job caqing' tu Jesús e ngotíñ' e jmí jo. ² Jo ie jo, e fí dsí' iá` cuu` e si' lacúng' Jerusalén do, quiéeng` coo` o'nú` fí li ng'ng' jaléng' jo'se' jiuung` i t'ng` dsea` Israel jngaiñ' mi tí jmí. Jo quiá' e o'nú` do silí coo` lí a` jmí e fe' eáang' e sii` Betzata cóo' jmí' hebreo. Jo e fí 'ni' e lí a` jmí do quiéeng` ñiá` ni'núu' jia, ³ jo fí job seeng` f'ng` dsea` dsée' e lí doñí ee` jmohuí` líñ'; do i tiuung`, dogui i jlúu', dogui i caang` tñ i teng' ni uó. Jo jaléng' í sijeeñ' e nijó' e jmí do. ⁴ Co' fé' dsea` e seab` mi jgáang` jaang` ángel fí dsí' e jmí do, joba' nijó' e jmí do mi nijgiáang` í; jo mi calí jo, i dsea` la'uii i ni'í fí dsí' e jmí do, joba' ni'leáam` bre jóng lí doñí ee` jmohuí` líñ'. ⁵ Jo jee` jaléng' i dsea` dsée' do ni quiéeng` jaang` dseañu' i nidsée' lajii' n'ngóo' guigui dsí jñiá` jii. ⁶ Jo mi caguié` Jesús fí jo, cangaiñ` i dseañu' i dsée' do e dob ráaiñ' jogui caliñir' e lajii' lí'ba' nidsée' i dsea` do, joba' cajming' reiñ' do jo casí' reiñ':

—¿lin' e ni'leáan' lajii' jmohuí` lin'?

⁷ Joba' cañi i dsea` dsée' do quiá' Jesús lala:

—Fí'i, ja` ii` seeng` fa' ii` nijmicóo' jnea` e ni'ú`u fí dsí' e jmí do mi cang' e nijó', jo co' lacoo` ya' mi iin` n ni'ú`u fí jo, dsea` jiém' dsijéeng` quié`e.

8 J_oba' cañíi` Jesús quiá'- i dsea` do:

—Ráan'-, j_o see- e 'ma` li~ dsín'^ na j_o guóng'.

9 J_o dsifí' lanab ca'láang- i dseañu` do, j_o cacó-bre e 'ma` li~ dsíiñ'^ do, j_o canaaíñ` ngíbre jóng. J_o ie~ j_o dseáng'- cangotíng` jmi~ e jmi'íng' dsea` Israel. 10 J_oba' mi~ cangá- i dsea` quie` nifí' quiá'- dsea` Israel e niquié` i dsea` ca'láang- do e 'ma` li~ dsíiñ'^ do, j_oba' lalab casí'r- dsea` do:

—Jmi~ e jmi'ím' dsea` lana, j_oba' ja` cuóøng` fa' e co'^ e 'ma` na.

11 J_o dsu' lalab cañíi` i dsea` i lami~ dsée'~ do quiá'- i dsea` góor` dsea` Israel i casí'- ír` laj_o:

—J_o i dsea` i cajmi'lée- quie`-e do casí'r- jnea~ lala: “Ráan'-, j_o see- e 'ma` li~ dsín'^ na j_o guóng'.”

12 J_oba' cajmingí'- tu i dsea` Israel do i dseañu` do j_o cajíñ'-:

—¿I~ gui i dsea` i casí'- 'nu` e nicó'^ e 'ma` li~ dsín'- do j_ogui e niguón'?

13 J_o dsu' i dseañu` do júi~ ja` ñir' i~ i cajmi'leáang- ír` do, co' ladsifib' cango'íng` tu Jesús jee~ i dsea` fíng' i siseáng' do ie~ j_o. 14 J_o mi~ cangí j_o, dob cadséng` tu Jesús i dsea` i cajmi'leáaiñ- do fí' dsíi' sináú^ guá'- fé' e si' fí' Jerusalén j_o lalab casí'- reiñ' do:

—Janú', lana nica'láam` ba' lajúi~ jmohuí' e lami~ lin', j_o jie~ mí ee-tu' dsee- calé' catú-, dsuco' fíng song cajmee-tu' laj_o, j_oba' huñg` guib nidsijée' quíi'- jóng.

15 J_o ngí j_o, cangób- i dseañu` i lami~ dsée'~ do e cangojmea'r' júu^ jaléng' i dsea` i quie` nifí' quiá'- dsea` Israel e Jesús sií i dsea` i cajmi'leáang- ír` do.

16 J_oba' jaléng' i dsea` Israel do ñingir' 'naíñ' Jesús e laco' nijmeáiñ' dsea` do ga` uíi~ e cajmée` dsea` do

e jo 'ñia' ie~ jmiñ~ e jmi'íng' jaléng' dsea`góor` dsea` Israel. 17 Jo dsu' Jesús lalab casí'r~ jaléng' i dsea`do:

—Tiquié`e ja` mí` catár` jíi~ cateá` ta~ quiá'r~, jogui lajõb jmóo` jnea~ cajo.

18 Jo mi~ canúu~ jaléng' i dsea` i quie` nifi` quiá' dsea` Israel do e cajíng'~ Jesús lajo, joba' eáang`guib ca'f dsíir' e nijngáañ'~ dsea` do, co' o' jíi~ e ca-jmi'leáañ~ i dsea` dsée'~ do 'ñia' ie~ jmiñ~ e jmi'íng' dsea`góor` dsea` Israel, co' lajõb cajo fé'r` e røøb` láañ` cóo'~ Fidié` mi~ fé'r` e Fidiéeb` dsea` líng` Tiquiá'r`.

Ja`jmóo` i Joo' Fidié` i cam#ng'~ do la tñiñ` 'ñia'r`

19 Jo co' niñib' Jesús jial' í dsíi' i dsea` do, joba' lalab casí'r~ dsea` do:

—E laba' jmítaa` óóna', e jíi~ coo` cuøøng` lí jmee~ jnea~ la tñiñ` 'ñiá'a, jnea~ dsea` lín'n i Joo' Fidié` cam#ng'~, co' dseáng'~ lajíi~ e móo`o e jmóo` Tiquí'ii', lajíi~ e joba' e jmóo`o cajo. Co' jalé' e móo` jnea~ e jmóo` Tiquí'ii', joba' e job jmóo`o cajo. 20 Co' Tiquí'ii' eáam`'neáañ` jnea~, jogui e'bre jnea~ jalé' e jmóor`; jogui ni'é'~bir jnea~ cajo jalé' e niing`~gui e laco' nidsi'gó` óó` 'ná' eáang`gui. 21 Co' lí' laco' jmóo` Tiquí'ii' e jmijí'tur jaléng'` líi~ jogui e cuør` e niliseeng`tuiñ', joba' lajõbi jnea~, dsea` lín'n Joor', lajõb jmóo`o cóo'~ jaléng'` dsea` i iin`n jmee` cóo'~ lajo. 22 Jo Tiquí'ii' ja` quidsir' í' quiá' jíi~ jaang` dsea` uii~ dsee` quiáañ'~, co' jneab~ dsea` nicang`n`n quiá'r~ e ta~ jo e catñn`n nijmee~ e lajo. 23 Jo cajmée` Tiquí'ii' lajo e lí' laco' laj#ng` dsea` nijmi'gór` jnea~ lí' laco'gui jmi'gó` dsea` ír`. Dsuco' i dsea` i ja` jmi'gó` jnea~, dsea` lín'n Joo' Fidié`, joba'

lajob cajo ja` jmi'gór` Tiquí'ii', dsea` i casíng` jnea` fí` jmi'güí' la.

24 'Jo e laba' jmitaa` óó'na', e doñi' ii` dsea` i já'` líng` júu` quié`-e jogui núu'r` júu` quiá'` i dsea` i casíng` jnea` fí` jmi'güí' la, joba' jaléng` dsea` í` niñim`bre e seeiñ` cøøng` cóo'~ Fidiéé` lata` jo ja` nidsiliñ` fí` lí` 'lí'`; co' lí' lafa' lamí` sijúum`-bre, jo dsu' lana lí' lafa' nicají'tur la'eáang' cóo'~ Fidiéé`.

25 Jogui dseáng'` jmita`baa óó'na' e tí` lí` nitib` í'` jo dseáng'` lanab liy e jaléng` dsea` i lafa' 'líng` uí'~ jalé` dsee` quiá'r` ninúr` júu` quié`-e, dsea` lín'n` Jóo' Fidiéé`; jogui jaléng` dsea` i ni'íng` e júu` jo, niliseem`bre la'eáang' cóo'~ jnea`. 26 Jo lí'` laco' Tiquí'ii' Fidiéé` 'ñia'`bre dsea` cuør` e seeng` dsea`, joba' lajob cajo dsea` í'bing` i nicacuø'` jnea`, dsea` lín'n` Jóor`, e laco' 'ñia'`baa dsea` cuøø`ø` dsea` e seeiñ`. 27 Jogui nicacuø'`bir jnea` e oo` ta` e niquidsii` í'` quiá'` jaléng` dsea` jmi'güí' uii` quiá'` jalé` dsee` quiá'ñ'`, co' jneab` dsea` cagá`-a fí` ñiff` e lín'n` jaang` dsea` jmi'güí'. 28 Jo ja` güidsigá` óó'na' quiá'` jalé` e fíi` i 'nú'` la, co' niguiéeb' jmi` mí` jaléng` dsea` i ni'líng` ninúr` júu` quié`-e 29 jo ni'uøiñ` fí` dsí'` ée` quiá'r`. Jo ie` jo jaléng` i dsea` i ca'ée` jmang'` e guiá`- nijí'tur e laco' niliseeiñ` cøøng` cóo'~ Fidiéé`, jo dsu' jaléng` i dsea` i cajmée` jalé` e ja` dseeng` nijí'tur e lí'` laco' ni'íñ` iihuí'.

Jie` fí` lí` jáa' fí` quiá'` Jesús cóo'~ jalé` e jmóor`

30 'Jo fíi`-túu` 'nú'` e jíi'~ cóo'~ cuøøng` lí'` jmee` jnea` la ñii` 'ñia'`a. Co' jnea` mi` quidsii` í'` quiá'` jaléng` dsea`, e jo jmóo`o` laco' ta` quiu'` Tiquí'ii' Fidiéé`, jogui dseáng'` røøb` jalé` e jmóo`o` do cajo. Jo ja` jmóo`o` la tñn` 'ñia'`a jalé` e jo, co' lajíi'` e

iing~ Tiquí'baa' e jmóo`o, co' dsea`íb` i casíng` jnea~
 fí' jmigüí' la. ³¹ Jo faco' jnea~ fá'a juguiá~ cuaiñ~
 quié~ e 'ñiá'a, joba' ja` e quíng' jíí~ coo` e júu^ do
 fí' quiniá' 'nú' jóng. ³² Jo dsu' seem` jaang`gui i fé'
 guiá~ uii~ quié~ e, jogui tab~ dsii~ e jalé' e júu^ do
 quíim' fí' quiniá' 'nú'. ³³ Jo 'núb' dsea` casíng`na'
 dsea` i cangojmingíi' i Juan i seáang` dsea` jmíi'
 do i dseáng' jnea~, jo tab~ dsii~ e jmang' júu^
 jáb' dseáng' fé' i Juan do. ³⁴ Jo dsu' jnea~ ja`
 'neán`n dsea` jiéng' i nijmé~ júu^ uii~ quié~ e i~
 dsea` líng' jnea~; jo fá'a e júu^ la e lí' laco' 'nú'
 nilí'na' leáng`na' jee~ jalé' dsee~ quí'na'.

³⁵ 'Jo jalé' júu^ e caguia' i Juan do lí' laco' cajlíi~
 quíi' e coo` e laco' e' dsea` fí'; jo 'nú' lajee~ cateá'ba'
 cajmi'íáang` óo'na' cóo'~ jalé' e júu^ e caguia' i Juan
 do. ³⁶ Jogui jalé' e jmóo` jnea~ do eáang`gui cuø lí~
 i~ jnea~, jo eáang`guib niing~ laco' e júu^ e cajíng'~
 i Juan do uii~ quié~ e; co' lajíi' e jmóo` jnea~, ta~
 job e cacuø' Tiquí'ii' Fidiéé~ jnea~ e nijmee~ e. Jo
 jalé' e jmóo`o do cuø lí~ e Tiquí'ii' Fidiéeb` dsea`
 casíiñ` jnea~ fí' jmigüí' la. ³⁷ Jo i Tiquí'ii' do, dsea`
 íb` i fé' juguiá~ uii~ quié~ e. Jo dsu' 'nú' ja` mí'
 canúu`na' júu^ quiá'r` o'gui mí' cañíng`na're cajo,
³⁸ o'gui seeng`na' e jmití'na' júu^ quiá' dsea` do,
 co' ja` mí' ca'íng`na' jnea~ dsea` casíiñ` fí' jmigüí' la.
³⁹ Jogui 'nú' dseáng'~ tá'~ camí'~ júub` jmitíng`na' e
 fé' fí' ni~ jì' quiá'~ Fidiéé~, co' sijeeng`na' e fa' lajob
 nilíi'na' jial cuøng` e seeng`na' cøng` cóo'~ dsea`
 do lata~; jo dsu' jalé' e júu^ do lajíi'~ uii~ quié~ baa e
 fé'. ⁴⁰ Jo dsu' 'nú' ja` iing`na' fa' nijáang`~ yaang`na'
 fí' jaguóo`o e laco' niliseeng`na' cøng` cóo'~ Fidiéé~.

⁴¹ 'Jo fíi`guíi' 'nú', ja` e lí' quié~ jnea~ jial lí'

jalé' e fé' dsea` jmigüü` uii~ quié~e, ⁴² dsu' nicuíim` jnea~ 'nú' guiú` jial líng`na', jo niñi`baa guiú` e ja` 'neáang`na' Fidiéé'. ⁴³ Jo jnea~ cagá~a fí` jmigüü` la cuaiñ~ quiá'~ Tiquié`e, jo dsu' 'nú' ja` líng`na' jnea~. Jogui faco' jaang`gui dsea` i nijáa` i ja` ii` seeng` i sá' quiá'r~, jo dsu' ni'íim`ba' i dsea` í. ⁴⁴ Jo çjial já'~ nilíng` 'nú' júu^ quié~e fíng song lico' jmiféng` rúng`na' lajee` la'ó' yaang~na' jo dsu' ja` jmi'goo`na' 'ñia' Fidiéé` dsea` fé'r` guiú` uii~ quií~na'? ⁴⁵ Jo ja` í^ óo`na' e jnea~ ni'nín~n 'nú' fí` quini` Tiquié`e, co' 'lii~ yúu~` quií~na' i sii` Moí~ dsea` ca'níiñ` 'nú' cóo'~ júu^ quiu` ta' e cajme'r` do, jo íb` i sijeeng` 'nú' i nijmicóo'~ quií~na'. ⁴⁶ Cofa' 'nú' já'~ calíng`na' lajii'~ júu^ e cajme' i Moí~ do fí` ni` jì` quiá'r~, joba' lajob` já'~ líng`na' jnea~ cajo, co' e fí` ni` júu^ jo cuaiñ~ quié~baa e fé'. ⁴⁷ Jo song` 'nú' ja` já'~ líng`na' e júu^ e cajme' í, joba' çjial cuóøng` e já'~ nilíng`na' lajii'~ júu^ e fíi` i 'nú' jóng?

Jo lanab` jii'~ líi` júu^ quiá'~ Jesús e casí'r~ dsea` i quié' nifí` quiá'~ dsea` Israel ie` jo.

6

Mí` cahéng` Jesús` ñia` mil dseañu`

(Mt. 14:13-21; Mr. 6:30-44; Lc. 9:10-17)

¹ Jo mi~ cangí` jo, coo` jmii~ cangó~ Jesús lí' lí` 'ngóo'~ e guiéé' e sii` Galilea do, jogui sii`bi cajo Tiberias. ² Jo fím' dsea` ngolíñ~ fí` lí` ngóo' dsea` do, dsuco' jéeng`gui nicangár~ jalé' e lí~ e quií~ dsea` do jmii~ e jmóor` mi~ jmi'leáaiñ~ jaléng` dsea` dséel~. ³ Jo mi~ caguié~ Jesús colíng~ cóo'~ dsea` quiá'r~ fí` lí' lí` 'ngóo'~ e guiéé' do, jo cangolíñ` fí` coo' yú'^ mó', jo mi~ caguilíñ~ fí` jo, dob caguár`

colüŋg~ cóoĩñ~ do. ⁴Jo nijaquíeeng' jmü~ Pascua ie~ jo e qui~ tñng` dsea` Israel e jmóor' fí' Jerusalén.

⁵Jo lajee` guing~ Jesús e fí' yá^ mó^ do, cangár~ e i fñng` dsea` nijalíng~ fí' lí~ guiiñ~, joba' lalab casí'r~ jaang` lajee` i dsea` quiá'r~ do i sií` Lii~ jo cajíñ~':

—¿Jie~ fí' nidsileá^aa' jalé^ e nidø~ i dsea` 'leáng~ i nicagüilíng~ la lana?

⁶Dsu' cajíng~ Jesús e jo e lí^ laco' niliñir' e~ nijíng~ i Lii~ do cuaiñ~ quiá~ e jo, co' niñí'bre guiá~ 'ñia'r' quiá~ jial nijmér~ cuaiñ~ quiá~ e do. ⁷Jo lalab cañí` Lii~ e casí'r~ Jesús:

—Nañí' fa' nili'lee~ cabøø~ iñí^ e nidsé~ lajì cuu~ e 'léeng~ dsea` lajee` guiáng~ sí', dsu' ja' nilíim`bi quiá~ lajüŋg` i dsea` na e nitíñ~ jmá~ capí^ la- jaang` lajaañ`.

⁸Jo mi~ canúu~ e júu^ jo i dsea` jaang`gui quiá~ Jesús i sií` Dí^, i líng` rúng^ Tú^ Simón, joba' lalab casí'r~ Jesús:

⁹—Lab sing' jaang` jiuung~ i quie' 'ñiá' iñí^ e lí' cóo~ mi^ cebada cóo~gui gáng~ 'ñu~ i nicuñg~, jo dsu' e la ja' jíe^ lí~ nidsibó^ jee~ i dsea` fñng` na.

¹⁰Joba' cañí'tu Jesús quiá~ i dsea` quiá'r~ do jo cajíñ~':

—Síí~go' jaléng^ i dsea` na güi'né'r' lí~ nigüear` lajaang` lajaañ`.

Jo e fí' mó^ jo ia' sea` nuu` rø^, joba' fí' job caguá` jaléng^ i dsea` do, jo jee~ i dsea` do quíng~ jíe^ ja' 'ñiá' mil dseañu'. ¹¹Jo mi~ cangí jo, ca'im^ Jesús e iñí^ e se' i jiuung~ do jo cacuø'r' gui'máang~ Fidiée~; jo mi~ cangí jo, canaañ` jmóor' guiée^ jee~ jaléng^ i dsea` i caseáng^ do ie~ jo. Jo lajob cajo cajméer` cóo~ i 'ñu` do, cajmée`bre guiée^ jee~

jaléng` i dsea` do car` jié` jíi` iĩn` do. ¹² Joba' mi` tí lí calítaang` i dsea` do guiá`, lalab cajíng` Jesús casí'r` i dsea` quiá'r` do:

—Sití`na' jalé` 'ná` e caseáng`-gui na, jo tea'na' líng', co' jíi` ca'ná` ja` 'né` nidsitøng`.

¹³ Joba' lajob cajmée` i dsea` do, casitím`bre jalé` e 'ná` e caseáng`-gui do quiá` laji` 'ñiá` e iĩn` cebada do, jo guitú` 'matá`gui carøng` cõo` e 'ná` e caseáng` do. ¹⁴ Jo mi` tí lí` cangá` i dsea` fíng` do e lí` e quí` Jesús jmí` e cajmée` do, joba' canaaiñ` síiñ` lajee` yaaiñ` jo fé'r`:

—I nab dseáng` dsea` i cajíng` Fidié` i nisíñ` fí` jmígüi` la i nifé` cuaiñ` quiá'r`.

¹⁵ Jo niñib` Jesús e i dsea` i fíng` do iĩñ` nitø`bre ír` la'úung` e lacõ' nicár` nifí` quiáiñ` do, joba' cajmi'nám`tu` 'ñia'r` jee` i dsea` do, jo cajgóor` calé` catú` cartí` yá' e mó' do e lacõ' niliúng` 'ñia'r`.

Mi` cangí` Jesús fí` ni` jmí`

(Mt. 14:22-27; Mr. 6:45-52)

¹⁶ Jo mi` tí lí` jaquíéng` e ni'í` núu` e jmí` do, i dsea` quiá` Jesús do catisím`bre fí` lí` née` e guiéé` do. ¹⁷ Jo mi` caguiliñ` fí` 'ni` e guiéé` do, cangotáam`bre fí` dsí` cõo` móo', jo canaaiñ` cua'bre e guiéé` do e teáaiñ` fí` ngolíñ` fí` Capernaum. Jo cõob` mi` ca'í` núu`, jo dsu' Jesús ja` mí` cajím`bi` rúñ` cõo` i dsea` quiá'r` do. ¹⁸ Jo lajee` ngolíng` i dsea` quiá` Jesús do e teáaiñ` fí` dsí` e móo' do, jo cõo` canaang` e í` guí` e teá` eáng`, joba' canaang` e rõo` jmí`.

¹⁹ Jo lajee` ñngolíñ` e fí` ni` jmí` do tíb`jiu` la` 'ñiá` osi jñúu` kilómetro, jo cõo` cangám`bre Jesús e nijaquíéng` dsea` do fí` quiá` e móo' do e nijaiñ`

ngir' fí' ni~ jmiĩ. Jo mi~ cangáng- i dsea` do Jesús e jang' dsea` do ngir' fí' ni~ jmiĩ, joba' cajá- e 'gó'bre. ²⁰ Joba' dsifí' lanab cajíng'- Jesús casí'r- i dsea` do lala:

—jnea~ la, jo ja` f00ng'~na'!

²¹ Jo i dsea` quiá'r- do e iáang` dsí'bre calíñ' dsea` do fí' dsí' e m00' lí~ teáaiñ' do; jo dsu' lajee` job e jii~ ja' lí~ lanab catíñ' lajaléiñ' do fí' u0- quiú' e fí' lí~ sí'í^ nitíñ' do.

Mí~ canaang` i dsea` fñng' do 'náiñ' Jesús

²² Jo mi~ cajneá- e jmii~ jo, jaléng' dsea` i sijeeng` Jesús lí'^ lí' 'ng00'~ cataang` e guiéé' do calilí'r^ e jaléng' i dsea` quiá'- Jesús do nicangolímbre c00' e m00' c00' 'ñia' e sí' do jééng'gui, jo dsu' Jesús ja` mí' cangaiñ' c00'~ i dsea` quiá'r- do. ²³ Jo lajee` job caguilíng- jíéng'gui dsea` i teáang'~ dsí' m00' i jalíng- fí' c00' fiĩ e sii' Tiberias, jo caguilíñ' fí' gu00'~ u0- quiú' quiá'- fí' lí~ cag0' i dsea` i fñng' do mi~ cangí' e cacu0' Fí'naa' Jesús gui'máang' Fidiéé'. ²⁴ Joba' mi~ tí' lí~ calilí'^ i dsea` fñng' do e jo` seeng` Jesús fí' do o'gui i dsea` quiá'r- do, joba' cajg00'-bre fí' dsí' c00' m00', jo cangolíñ^ cango'néem'~bre dsea` do fí' Capernaum.

Jesús láíñ' laco' e iní'^ e cu0' e seeng` dsea` lata~

²⁵ Jo mi~ tí' lí~ caguilíng` i dsea` fñng' do fí' lí'^ lí' 'ng00'~ cataang` e guiéé' do, joba' fí' job cajíñ' Jesús jo lalab cajmingí'r- dsea` do:

—Tifa', ¿lí~ cañing'- 'na' fí' la?

²⁶ Joba' cañí' Jesús quiá'- jaléng' i dsea` do jo cajíñ'-:

—E laba' jmítaa^ 00'na' e 'nú' 'náng'tu' jnea~ lana, dsuc0' lado guiéé- caquié'na' car`

caróm̄ba', jò dsu' ja` 'náng'na' jnea~ uiing~ quiá'-
 e nicangáng'na' e~ guóng' jalé' e li~ e quií'~i jmií~
 e nicajmé~e do. ²⁷ Jòba' fíi~i 'nú' ja` jmiquíng'li
 óó'na' cuaiñ~ quiá'- jalé' e gø' dsea` e ja` huøø^ ee~,
 co' 'nú' lí^ lí' né~ e guing~ óó'na' cuaiñ~ quiá'-
 jalé' e taang~ dsea` e sea` contøøng~, co' e jòba' e
 cuø' e seeng` dsea` cøøng` cóo~ Fidiée~ lata~. Jo e
 jòba' nicuøø^ jnea~ jaléng' dsea`, jnea~ dsea` gáa'a
 fí' ñifí~ e lín'n jaang` dsea` jmigüí, co' ta~ jòba'
 casíng` Tiquí'ii' Fidiée~ jnea~ fí' jmigüí la.

²⁸ Jòba' cajmingí'~ i dsea` do Jesús, jò casí'r~ dsea`
 do lala:

—¿E~ 'né~ nijmó^ jnea^ e laco' nilí'ti~ jalé' e iing~
 Fidiée~ e nijmó^oo'?

²⁹ Jòba' lalab cañí' Jesús quiá'- dsea` do:

—E lab e iing~ Fidiée~ e 'né~ nijmee~na', e
 ni'íng'na' jnea~, dsea` i casíñ' fí' jmigüí la.

³⁰ Jòba' cañí'tu i dsea` do quiá'- Jesús, jò casí'r~
 dsea` do lala:

—Jogui 'nu', ¿e~ li~ e quií'~ jmií~ cuøøng` lí' jmée'^
 qui~naa' la e laco' já'- nilí'naa' júu^ quií'~?, jogui
 ¿e~ jalé' jmoo` 'nu'? ³¹ Co' lalab júu^ sea` quiá'-
 'lií~ dsea` áang' quií'~ii' e cangíiñ' e cagø'r' iñí'^ e sií'
 maná lajee~ cangir' fí' ni~ guóo~ uø~ quiú' malíi~ gui
 lí^ laco'gui la fé' fí' ni~ jì' quiá'- Fidiée~ lí' fé': “Jo
 Fidiée~ dsea` cacuø' jaléng' i dsea` do iñí'^ e cagø'r'
 e jáa' fí' ñifí~.”

³² Jòba' lalab cañí' Jesús quiá'- i dsea` do jò
 cajíñ'~:

—E laba' iin~n jmítaa^ óó'na', e o' Moi~ i cacuø'
 i dsea` áang' quií'~na' do e iñí'^ e cajalí' fí' ñifí~ do,
 dsuco' ñiab' Tiquié^ e Fidiée~ dsea` cuø' e iñí'^ e já'-
 e jáa' fí' ñifí~ do. ³³ Dsuco' jnea~, dsea` gáa'a fí' ñifí~,

lín'n laco' e iñí' e cuø' Tiquí'ii' Fidié' do e laco' liseeng` dsea` cøøng` còo'r` lata~.

34 Jòba' ì dsea` do cam'r' Jesús lala jò cajíñ'~:

—Fí'ì, cuøø'~ jnea'^ contøøng` e iñí'~ jò.

35 Jòba' casí'~ Jesús jaléng' ì dsea` do jò cajíñ'~:

—Jneab~ dsea` lín'n e iñí' e cuø' e seeng` dsea` lata~; jogui ì dsea` ì já'~ líng` júu^ quié`e jogui nicajáng' yaaiñ` fí' jaguó'o, jòba' jò` tóo` jmí~ fa' niguiá'gui jmi'aaíñ` o'gui jmi'jmííñ`. 36 Jogui lí' laco' jí'~ e nicafí' ì 'nú', nañí' fa' nicañíim'ba' jnea~, dsu' ja` já'~ lím`bi' jnea~. 37 Jò jaléng' dsea` ì nicacuøng' Fidié' jnea~, jòba' jaléng' dsea` í` ím`bre jnea~; jogui jaléng' ì dsea` í` ni'íim'~baare cajo. 38 Co' jnea~ ja` cagá`a fí' ñíff` e cagajmée`e lají'~ e iin`n 'ñiá'a, co' cagá`a e lí' laco' cagajmée`e lají'~ e iing` Tiquié`e e nijmee`baa, co' íb` dsea` ì casíng` jnea~ fí' jmígüí' la. 39 Jò ì dsea` ì casíng` jnea~ fí' jmígüí' la iíñ` e ja` ni'íing` jí'~ camíng' ì dsea` ì nicacuøíñ' jnea~ do, co' lí' lí' iíñ` e nijmee`e e nijí'tur mî` tí' lí' jò. 40 Co' lají'~ e iing` Tiquié`e Fidié`e e jaléng' dsea` ì jáng' yaang` fí' jaguó'o jogui já'~ lííñ` júu^ quié`e, jnea~ dsea` lín'n Jòo' Fidié', jòba' iing` Fidié' 'ñia'r' e jaléng' ì dsea` í` niñíim`bre e niliseeiñ` cøøng` còo'r` lata~; jogui jnea~ nijmee`e e nijí'tur mî` tí' lí' nití' í' lajò.

41 Jò mî` tí' lí' canúu` ì dsea` Israel do e júu^ quiá'~ Jesús do, jòba' canaaíñ` éeiñ` dsea` do lajee` la'ó' yaaiñ`, co' dsea` do fé'r' e íbre dsea` lííñ` e iñí' e cajgó` fí' ñíff`. 42 Jòba' canaaíñ` sí' rúíñ' lala:

—Jò ¿su o' ì Jesús labí ì líng' ì jòo' Sé` do? Co' jneaa~aa' cuíim'baa' ì` niquíá'r` jogui ì` tiquiá'r`, jò ja` ne`naa' jiali' fé'r' e jáar' fí' ñíff`.

43 Jo mi~ canú~ Jesús e júu^ jo, joba' casí~reiñ' do lala:

—Túú'na' e éeng'na' jnea~. 44 Jo fñ~i 'nú' e jji~ jaang` dsea` cuøøng` lí` jáng` 'ñia'r' fí' jaguóo`o fíng song Tiquí'ii' Fidiéé` i casíng` jnea~ fí' jmigüi` la ja` nijajéeng` i dsea` í' fí' quini~; jogui` jneab~ dsea` nijmée'~e e nijí'tu` jaléng` i dsea` í' mi~ tí' lí' jo. 45 Jo lalab fé' fí' ni~ ji` quiá'~ Fidiéé` e cajme' i dsea` i café' cuaiñ~ quiá'r~ mali~gui eáang` ie~ lamí~ cajíñ'~ lala: “Fidiéeb` dsea` ni'é'r~ lajaang` lajaang` dsea.” Joba' jaléng` dsea` i ninú~ júu^ quiá'~ Tiquí'ii' do jogui` nilitiññ` guiá~ quiá'~ dsea` do, joba' cóo'~ jneab~ nijatáaiñ~ jóng.

46 'Jo dsu' ofa' fá'a e seeng` dsea` i nicangáng~ Tiquí'ii', co' lajji~ jnea~bing' i nicangáng~ dsea` do, jo íb` dsea` i casíng` jnea~ fí' jmigüi` la. 47 Jo e laba' jmitaa` óo'na' e jaléng` dsea` i já' líng` júu^ quié~e, joba' cøøng` liseeiñ` cóo'~ Fidiéé` lata~.

48 'Jo dseáng'~ jneab~ lín'n e iñí' e cuø' e seeng` dsea` lata~. 49 Jo jaléng` 'lñ~ yúu' quíi' 'nú' cagó'bre e iñí' e sii' maná do ie~ lamí~ cangir' fí' ni~ guóo'~ uø~ quiú' do, jo dsu' nañí' fa' cagó'r' e jo co' cajúm~bre mi~ catí' í' quiá'r~; 50 jo dsu' jnea~gui fá'a quiá'~ e iñí' e jáa' fí' ñifí~ do, co' ii' dsea` i ni'íng` e nidó'~ e jo, joba' ja` tóo` jmñ~ fa' nijúuiñ~. 51 Jogui` co' jneab~ dsea` lín'n e iñí' e nicajá~ fí' ñifí~ e lacó' cuø' e seeng` dsea` lata~, joba' doñí' ii' dsea` i ni'íng` e nidó'~ e iñí' jo, joba' dseáng'~ lata~ niliseeiñ` cøøng` cóo'~ Fidiéé`. Jo e iñí' jo lí' ngúu' táam'baa, co' e joba' nijáa'~a e lacó' cøøng` niliseeng` dsea` cóo'~ Fidiéé` lata~.

52 Jo mi~ tí' lí' canú~ i dsea` Israel do e júu^ jo,

jōba' canaañ` t̄ing' júu^ quiá'r- lajee` la'ó' yaaiñ`
uui~ quiá'- Jesús, jō jmingí'- rúñ` lala:

—Jō ¿jial cuøøng` e ì dseañu` na nicuør- ngúu`
táaiñ` e lafa' niquiee~naa'?

⁵³ Jōba' cañí'tu Jesús quiá'- ì dsea` do jō
casí'- reiñ':

—Dseáng'- e laba' jmitaa^ óo'na', e song 'nú' ja`
ni'ling'-na' jnea~ laco'gui mi~ jmitaang` yaang~na'
guiá- cóo~ e iñí^ do, o'gui ni'u^na' jmi'øøñ-, jnea~
dsea` cagá-a fí ñifí- e lán'n jaang` dsea` jmigüí,
jōba' ja` quí~ jmi~ jóng e nilí'na' e niliseeng'na'
cøøng` cóo~ Fidiée` lata~. ⁵⁴ Co' ì dsea` ì íng' jnea~
lí^ laco'gui mi~ jmitaang` yaaiñ` guiá- jogui í'r`
jmi'øøñ-, jōba' dsea` íb` ì niñíng` e niliseeiñ` cøøng`
cóo~ Fidiée` lata~; jogui jneab~ nijmee` e e nijí'tu
jaléng' í mi~ nití- í' lajō. ⁵⁵ Dsuo' mi~ íng' dsea`
jneá~, lí' coo` e gø' dsea` e laniing- íng^ ta~ quiá'r-,
jogui e jmi'øøñ- do, lí' coo` e í' dsea` e laniim- cajo.
⁵⁶ Co' ì dsea` ì íng' jnea~ lí^ laco'gui mi~ jmitaang`
yaang~ dsea` guiá- jogui ì í' jmi'øøñ- do, jōba' cøøm`
niliseeiñ` cóo~ jnea~, jogui lajōbi jnea~ cajo cøøm`
niliseen- cóo~ ír`.

⁵⁷ 'Jō Tiquí^'i' Fidiée` ì casíng` jnea~ fí jmigüí la
contøøm- seeiñ`, jogui la'eáang' íba' seeng` jnea~
cajo; jogui lajōbi jaléng' ì dsea` ì íng' jnea~ laco'gui
mi~ jmitaang` yaaiñ` guiá-, dseáng'- contøøm-
niliseeiñ` la'eáang' cóo~ jnea~. ⁵⁸ Jō fá'a e júu` na
cuaiñ` quiá'- e iñí^ e cajgó- fí ñifí-, co' e iñí^ la
ja` lí' laco' e iñí^ e sii` maná do e cagó' 'lí~ yáui~
quí-na' lajee` cangir' fí ni~ guóo~ uó- quiú-, co'
nañí fa' cagó'bre e jō, jō dsu' cajúm-bre mi~ catí
í' quiá'r-; dsu' jaléng' ì dsea` ì íng' jnea~ laco'gui

mi~ jmítaang~ yaaiñ~ guiá~ cóo~ e iñí^ do, joba' dseáng~ latab~ niliseeiñ` cøong` cóo~ Fidiée~.

⁵⁹ Jo lanab jii~ lí' júu^ quiá~ Jesús e ca'e'r' jaléng' dsea` i caseáng' e fi' sinúu^ guá~ quiá~ dsea` Israel e si' fi' Capernaum.

Seem` dsea` i ja` íng` júu^ quiá~ Dsea` Jmáang~

⁶⁰ Joba' mi~ tí' lí' canúu~ i dsea` do lajii~ e cajíng~ Jesús do, i fíim' jaléng' i dsea` do i lamí~ ngí cóo~r` do cajíñ~ lala:

—Dsíng~ huíng' e ni'íng~ naa' lajii~ e júu^ e fé'r' na, jo ja' lí' dsi'naa' e seeng` dsea` i ja~ nilíng' lajii~ júu^ quiá~r~.

⁶¹ Jo co' niñib' Jesús lajii~ e ée' i dsea` do quiá~r~, joba' cajmíng'~r~ dsea` do lala:

—¿Su 'ní' máam' 'nú' e júu^ quié~ e la? ⁶² ¿E~ ni'í' áa'na' fíng song nimáang~na' jnea~ e niníng'~túu fi' lí~ lamí~ guíin~n fi' ñífi~, jnea~ dsea` cagá~a fi' jo e lán'n jaang` dsea` jmígüi'? ⁶³ Jo e Jmíguí quiá~ Fidiée~ e cuø e seeng` dsea` lata~, jo dsu' ja` quí~ dsea` jmígüi' jmí~ fa' e nijmér~ e niliseeng` dsea` lata~; jogui jalé' júu^ e nicafí~i 'nú' na lí' la'eáang` cóo~ Jmíguí quiá~ Fidiée~, jogui cajo cuø e liseeng` dsea` lata~. ⁶⁴ Jo dsu' seem` 'nú' i ja` mí ca'ím~bi júu^ quié~ e latí' lana.

Jo cajíng~ Jesús lajo co' ñi'bre guiá~ latí' mi~ uíng~ i jaléng' i dsea` do i dseáng~ ja' ni'íng' ír', jogui i~ i nijáng' ír' fi' jaguó' jaléng' dsea` cøong' e quiá~ e nijúuiñ~.

⁶⁵ Jogui lalab cajíng'~ guí~:

—Jo uí~ e lajob lí', joba' nicafí~i 'nú' e jii~ jaang` dsea` cuøong` lí' jáng' ñia'r' fi' jaguó'o fíng song ja' nijajéeng` Tiquí'ii' Fidiée~ ír' fi' quini~.

66 Jo latí ie~ job, i fím' dsea` i lami~ ngí cóo'~ Jesús catiúum~bre dsea` do, jo caquium'bre e ngír cóo'~ dsea` do. 67 Jo co' calilíb'^ Jesús e jo, joba' cajmingí'r~ i dsea` guitúung` quiá'r~ do jo cajíñ'~:

—Jo ¿su la quie' 'náb' iing~na' nijmi'naang` yaang~na' quie' e cajo?

68 Joba' cañí' Tá^ Simón quiá'~ Jesús jo cajíñ'~:

—Fí'naa', dseáng'~ ja' í dsí'baa' e nidsitáng^naa' cóo'~ dsea` jiéng', co' jí'~ 'náb' dsea` cuø' júu^ quiá'~ jial seeng` dsea` cøøng` cóo'~ Fidié'~ lata~. 69 Joba' jnea'^, nicajáang'~ yee~naa' fí' jaguóo', co' dseáng'~ nitab~ dsí'naa' e 'náb' lin' dsea` i casíng` Fidié'~ fí' jmigüi' la e lin' dsea` güeang'^ quiá'r~.

70 Joba' lalab cañí' Jesús quiá'~ i dsea` quiá'r~ do:

—Jneab~ dsea` nicaguín'~n 'nú' e nilíng'na' dsea` guitúung` quie' e, jo dsu' jee' 'náb' quiigeáng` jaang` i nilíng` dsea` quiá'~ fí' i 'líng'^.

71 Jo mi~ cajíng'~ Jesús lajo, café'r' dsu' e éeiñ` i Judas i líng' jóo' Simón Iscariote, jo ja' e lí' e i Judas do quíim'~bir jee' i dsea` guitúung` do, dsu' dsea` í'bing' i nijáng' Jesús fí' quini' dsea` cøøng'~ e quiá'~ e nijúuiñ~.

7

Ji'gui jaléng' rúng' Jesús ja' já'~ líiñ` júu^ quiá'~ dsea` do

1 Jo mi~ cangí'gui lajo, dob ngí' Jesús fí' jalé' fí' e tée'~ lí' se' Galilea e jmóor' lají'~ ta' sinú'r^'. Jo ie~ jo ja' iñ~ dsér~ fí' lí' se' Judea, co' jaléng' dsea` góor` dsea` Israel i teáng~ nifí' i seeng` fí' jo 'náíñ' dsea` do e iñ~ nijngám'~breiñ'. 2 Dsu' ie~ jo nijaquíéng' jmí~ quiá'~ dsea` Israel e quí'~ tñiñ` jmo'r' 'núu'

má' 'ma~ e laco' jmiguiéng' dsír' jial mi~ cangir' fí ni~ guóo'~ uø~ quiú' malii~gui eáang', ³ joba' lalab cajíng'~ jaléng' i rúng' Jesús do jo casí'~ reiñ':

—Ja' guing~ já' fí la, jo fí lí se' Judeab guó'^, jo lajoba' jaléng' dsea i tí dsí' núu' júu^ quií'~ i seeng' fí jo nijøør~ jalé' e quií'~ jmii~ jmoo'. ⁴ Co' mi~ jaang' dsea' iin~ e nilicuí'gui dsea' quiá'r~, joba' fí lí jøø~ dseab' 'né~ jmér~ jalé' e jmóor' do. Jo co' 'nu' jmoo' jalé' e dsigá' dsí' dsea', joba' fí quini~ dsea' fii' 'né~ jmé'^ jalé' e jo.

⁵ Jo fé'r' lajo co' jii'gui jaléng' i rúng' Jesús do ja' já'~ líiñ' júu^ quiá'~ dsea' do. ⁶ Jo lalab cañí' Jesús quiá'~ i rúñ' do jo cajíñ'~:

—Ja'gui mí catí' í' quié~ e e nijmijnéeng' 'ñiá' a fí quini~ fii'ng' dsea', jo dsu' quií'~ 'nú' doñí' ee' jmii'~ cuøøng' lí güilíng~ na' jie' fí lí iing~ na'. ⁷ Jo fii' i 'nú' e ja' ee' uing~ sea' quiá'~ jaléng' dsea' jiéng' e nilí 'ní' níñ' 'nú', jogui dsu' jnea~gui contøøm~ 'ní' níng~ dsea', co' jnea~ jmóo' e líñ' dsea' røø' uii~ quiá'~ jalé' e ga' e jmóor'. ⁸ Joba' fii' i 'nú' e cuøøm' lí güilíng~ na' e jmii~ jo, jo dsu' ja' lí nii~ jnea~ lajminá~, co' nabi ja' mí catí' í' quié~ e e nijmee~ e lajo.

⁹ Jo lanab casí'~ Jesús i rúñ' do, jo dob cajer' fí lí se' Galilea, jo i rúñ' do cangolíim' bre fí lí tí jmii~.

Mi~ cangotíng' Jesús jmii~ quiá'~ 'nú' má' 'ma' fí Jerusalén

¹⁰ Jo mi~ cangí' e cangolíng' i rúng' Jesús do fí lí catí' jmii~, joguiba' cangó~ Jesús fí jo, jo ja' fii'ng' dsea' i ngolíng' cóo'r~, co' ja' iin~ dsér~ fí jo jee~ dsea' fii'ng'. ¹¹ Jo lajee' tí e jmii~ do, jaléng' dsea'

quie' nifi' quia'- dsea` Israel ngir' ta~ 'náng' Jesús, jo sñiñ` lajee` la'ó' yaaiñ~ jo fé'r` lala:

—¿Jie~ fi' iuung~ i dseañu` do?

¹² Jo eám' sñng` jaléng' i dsea` Israel i siseáng' do cuaiñ~ quia'- jalé' e jmóo` Jesús. Jo jee~ do quieéng` i liing~ dsea` i fé' lala: “Jaang` dseañu` i guiúm~ liiñ' do”; jogui jee~ dobi quieéng` dsea` i fé' cajo: “I dseañu` í ja` dseeng` éer`, jogui lico' ngir' ta~ jmigøong` jaléng' dseab`.”

¹³ Jo jee~ jaléng' i dsea` do jii'~ jaaiñ` teá` dsíir` nifé'r` uii~ quia'- Jesús, co' 'gó'bre fing ee` cajmée` i dsea` Israel i quie' nifi' do quia'r` song canúur` jalé' e sñiñ' do.

¹⁴ Jo ningóo' guiáam'~ e jmii~ do mi~ caguié~ Jesús fi' dsíi' sinúu` guá'~ fé' quia'- dsea` góor` dsea` Israel e si' fi' Jerusalén, jo mifíng` canaiñ` e'bre dsea` mi~ caguiér` fi' jo. ¹⁵ Jo eám' dsigá` dsíi' i dsea` quie' nifi' quia'- dsea` Israel do e núur` jalé' júu` 'goo` e guia' dsea` do, jo lalab sñiñ` lajee` yaaiñ~ jo fé'r`:

—¿Jial jmóo` i dseañu` na e tñiñ` ngáiñ' júu` quia'- Fidiée~, jo ja` ne`ee' fa' jié' li~ nicajmitñiñ`?

¹⁶ Joba' lalab cañíi' Jesús quia'- i dsea` do:

—O' dseáng'~ júu` quie` e lajii'~ e ee` e 'nú' la, co' e júu` la jáa' quia'- i dsea` i casíng` jnea~ fi' jmigüi' lab. ¹⁷ Jo doñi' ii' dsea` i guia' dsíi' e nijmitir~ laco' la iing~ Fidiée~, joba' dsea` í'bing' i niñi' su jáa' quia'- Fidiée` jalé' e ee` do osi lí' fá'a e la tñiñ` 'ñiá' baa é. ¹⁸ Dsuo' i dsea` i fé' la tñng` 'ñiá' jmóor` lajo e lí' laco' nijmiféng' dsea` í'bre; jo dsu' i dsea` i jmi'úung` e nijmiféiñ' i dsea` i casíi' quia'r` do, joba' i dsea` í' jmang'~ júu` jáb'~ quier', jo jii'~ jaang` ja` ii' cuøong` lí' cuø'~ dsee` ír', co' ja` dsee` sea` quia'r`.

19 Jo cajíng'⁻ gui Jesús:

—Jo e já'⁻ e Moi⁻bing' cacuø' 'nú' e júu⁻ qui⁻ ta⁻ quiá'⁻ Fidiéé' do, jo dsu⁻ jjí'⁻ jaang' 'nú' ja' jmití'na' e júu⁻ jo. Jo çjialí' e iing⁻na' nijngáng'⁻na' jnea⁻?

20 Jo mi⁻ canúu⁻ ì dsea⁻ do lajo, joba' cañír quiá'⁻ Jesús jo cajíñ'⁻:

—jì 'lim'⁻ jée' quií'⁻ 'nu'! Co' jnea'⁻ ja' í dsi'naa' fa' e nijngáng'⁻naa' 'nu'.

21 Joba' cañítu Jesús quiá'⁻ ì dsea⁻ do jo casí'⁻reiñ'⁻:

—Mí' 'noo' dsigá'bi áa' 'nú' cóo'⁻ lajji'⁻ e cajmé'⁻ e do 'ña'⁻ ie⁻ jmi⁻ e jmi'íng'⁻naa', jneaa'⁻aa' dsea' lí'í' dsea' Israel. 22 Jo ie⁻ mali⁻gui do Moi⁻ caqui⁻r' ta⁻ e nitó'⁻ cóo'⁻ e lí' fí' ngúú táang' lajji'⁻ yuu⁻ siñuu⁻ lí'⁻ laco' qui'⁻ tíng'naa', jo dsu⁻ e jo o' jjí'⁻ quiá'⁻ Moi⁻ jáa', co' jáa' tí' quiá'⁻ 'lí' yúu' quií'⁻ba'; jogui 'nú' tóo'ba' e lí' do fí' ngúú táang' jiuung⁻ siñuu⁻ quií'⁻na' mi⁻ catí' í' quiá'⁻r⁻ lajo, jo ja' e lí' quií'⁻na' nañí' fa' 'ña'⁻ ie⁻ jmi⁻ e jmi'íng'⁻naa'. 23 Jogui song 'nú' tóo'na' e lí' do quiá'⁻ jiuung⁻ siñuu⁻ quií'⁻na' dseáng'⁻ 'ña'⁻ ie⁻ jmi⁻ e jmi'íng'⁻ jneaa'⁻aa', dsea' Israel, co' dseáng'⁻ ie⁻ jmi⁻ jo catí' í' e nijmé'na', jo jmoo'na' lajo e lí'⁻ laco' nijmití'na' e júu⁻ qui⁻ ta⁻ quiá'⁻ Moi⁻, joba' lana ja' e uiing⁻ sea⁻ quií'⁻na' e jmiguíng'⁻ yaang⁻na' cóo'⁻ jnea⁻ uí'⁻ e cajmi'leáan'⁻ ì dseañu⁻ do 'ña'⁻ ie⁻ jmi⁻ e jmi'íng'⁻naa'. 24 Joba' fí'⁻i 'nú', ja' cuó'⁻na' dsee⁻ jaang' dsea⁻ quiá'⁻ lajji'⁻ e í' óo'na' e jmóor', co' 'né'⁻ jang'⁻ jmitá'⁻ óo'na' dseáng'⁻ røøb' su dseeng' osi ja' dseeng' é lajji'⁻ e jmóo' ì dsea⁻ í, jo lajoguiba' cuóøng' e ni'í'na' í' røø'.

Mí' cajíng'⁻ Jesús jie⁻ fí' dseáng'⁻ lí' jáar'⁻

25 Jo mi~ canúu~ i lling~ dsea` i neáng' fí Jerusalén do júu^ quiá'- Jesús, joba' canaain` jmingí'- rúin' jo jín'-:

—Jo ¿su o' i dseañu' nabi i ngí' dsea` 'náiñ' e quiá'- nijngáng'-neiñ'? 26 Jo jíi~ jaang' dsea` ja` i jnáng' quiá'r~, co' dob siñ' guiar' júu^ quiá'- Fidié~ jee~ dsea`. Jo jangám~ í' dsíi' jaléng' dsea` i quie' nifí' quí-ii' e dseáng'- já'-ba' e dsea` dob i Dsea` Jmáang~ i sijeeng'naa' i nicá' nifí' quí-ii'. 27 Jo jneaa~ guíi' ne'baa' røø' jie~ fí' lí' jáa` i dseañu' na, jo dsu' mi~ nití- í' e nijáa` i dsea` i sijeeng'naa' do, jíi~ jaang' dsea` ñir' jie~ fí' lí' nijáa` dsea` do.

28 Jo mi~ tí' lí' canúu~ Jesús lajíi~ e sáing` i dsea` do lajee~ e iuuiñ- e'r' dsea` fí' sinúu^ guá'- fé' e si' fí' Jerusalén, joba' cañír` teá' jo cajín'-:

—E já'- e nicuím'ba' jnea~, jogui niñí'bi' jie~ fí' lí' gáa'a. Jo dsu' jnea~ ja` cagá'-a fí' la e la ñii- 'ñiá'a, co' cagá'-baa dsu' júu^ e sinúu^ quiá'- i lajang'^ do e jíi~ 'nú' ja` cuíng'na' í'. 29 Jo dsu' jnea~ cuím'baare guíá~, co' cuaiñ~ quiá'-bre e cagá'-a fí' jmigüü' la, jogui dsea` í'bing' i casíng' jnea~ cajo.

30 Jo mi~ canúu~ jaléng' i dsea` Israel do júu^ quiá'- Jesús, joba' lamí~ iin~ nisám'bre dsea` do, jo dsu' ja` calí'r- fa' cajméer' lajo, co' ja` mí' catí' í' quiá'- dsea` do fa' e nidsingíiñ- lajo. 31 Jo lajee~ jaléng' i dsea` i teáng' núu^ júu^ quiá'- Jesús do, fíim' i dsea` í' já'- calíiñ- júu^ quiá'- dsea` do ie~ jo, jo lalab síiñ`:

—Mí~ nigüéeng~ i Dsea` Jmáang~ i sijeeng'naa' i nicá' nifí' quí-ii', ja` lí'^ dsí'naa' e nijmér- jmiguiú'gui jalé' e lí~ e quí'r~ jmí~ laco'gui la jmóo' i dseañu' la lana.

Mi~ cajmée` dsea` quijí` jial nisáin' Jesús

³² Jo mi~ canúu~ dsea` Israel i líng' dsea` fariseo lajúi~ e síng` dsea` uii~ quiá'- Jesús, joba' jaléng' i dsea` î cóo'~gui jaléng' fii~ quiá'- jmidsea` casíin` jaang` gáng~ íi~ quiá'- guá'- e laco' nidsiséiñ~ Jesús e fí' lí' iuung~ dsea` do. ³³ Jo co' niñib' Jesús e í' dsíi' i dsea` do, joba' cajíin'- casí'r~ jaléng' i dsea` teáng'~ do ie~ jo:

—Ja` huóø` eáng' nitaang~ jnea~ cóo'~ 'nú' fí' la, jo mi~ ningí' jo, niním'^túu cóo'~ i casíng' jnea~ e cagá~a fí' jmigüi' la. ³⁴ Jo ie~ jo, fíim' 'nú' ni'nang'~na' jnea~ jo dsu' jo` niguiéng'~na' jnea~, co' ja` quí'- jmíi~ e nigüilíng'~na' fí' lí' ninín'^n.

³⁵ Jo mi~ canúu~ i dsea` i quie' nifi' quiá'- dsea` Israel e jo, jo ladsifí' lanab canaaíñ' e jmíngí'- rúin' lala jo fé'r':

—¿Jie~ fí' lí' nidséng'~ i dseañu'~ na e jo` quí'- jmíi~ fa' e niguiéng'~naa're? Jo jangám~ song nidsér~ fí' guóo'~ uó~ lí' huíi~ fí' lí' neáang' jaléng' dsea` góo'~naa' dsea` Israel e nidsi'ée'r~ jaléng' dsea` i ja` líng' dsea` góo'~naa' i neáang' fí' jo. ³⁶ Jo ¿e~ guóng' mi~ fé'~ i dseañu'~ na e ni'náng' dsea` ír' jo dsu' ja` ii` niguié' quiá'r~, jogui e ja` cuóøng` ii` nidsilíng' fí' lí' niguiéiñ' do?

Jo lanab casíng' i dsea` quie' nifi' quiá'- dsea` Israel do ie~ jo.

Jial lí' mi~ íng' dsea` Jmíguí' quiá'- Fidié'

³⁷ Jo 'ñia' ie~ ngóo' cadséng~ jmíi~ e jmóo' dsea` Israel ie~ jo, jo dseáng'~ ie~ jmíi~ job e í' dsíir' e niing~gui lajee~ e jmíi~ e jmóor' do. Jo ie~ job casíng' 'ñia' Jesús fí' quini' jaléng' dsea` jo café'r' teá jo cajíin'-:

—Song *ii* 'nú' lí'na' e *jmijmüing*-na', *joba* ñilíng-na' fí' lí' sín'n la, *jo* nilí'ba' *jmü* e u'^na'.
 38 *Jo* lí' laco'gui la fé' Fidiée' fí' ni' jì' quiá'- lí' fé'r' lala: “*Jo* mi' já'- líng` dsea` júu^ quié`e, *jo* e *jo* lí' lafa' niníng' *jmü* fí' dsír'; *jo* e *jo* cuø' e liseeiñ` cøøng` cóo~ Fidiée' lata~.”

39 *Jo* cajíng'- Jesús lana uí'~ quiá'- *Jmiguí* quiá'- Fidiée' e ni'íng' jaléng' dsea` i' nijá'- líng` júu^ quiá'r-. *Jo* dsu' e *Jmiguí* do ja' mí' cagüea` jee` ír', co' ja' mí' casám'bi Jesús e nidséiñ'- fí' lí' cajár- fí' ñifí' e ni'uíng`-túr dsea` laniing-.

Mi' ca'naang` jaléng' dsea` quiá'- rúíñ' uii~ Jesús

40 *Jo* mi' canúu- i' dsea` do júu^ quiá'- Jesús, *jo* i' líng` i' dsea` í' canaiñ` sáiñ` lala:

—Dseáng'- i' dseañu' lab i' sijeeng`naa' i' nisíng- Fidiée' i' nifé' cuaiñ` quiá'r-.

41 *Jogui* i' líng`gui i' dsea` do fé'r`:

—I lab Dsea` *Jmáang*- i' sijeeng`naa' do i' nicá' nifí' quí-ii'.

Jo dsu' i' líng`guiiñ' do fé'r`:

—U~, o' Dsea` *Jmáang*- i' na, co' ja' cuøøng` e dsea` í' nijáar' e líiñ' jaang` dsea` i' seeng` fí' lí' se' Galilea. 42 Co' lalab fé' Fidiée' fí' ni' jì' quiá'r- e dseáng'- 'néb- e Dsea` *Jmáang*- líiñ' dsea` siju` dseata~ Daví'^, *jogui* 'né- e niníiñ'~ fí' Belén e fí' lí' calí- góo` dseata~ Daví'^.

43 *Jo* lajob jaléng' i' dsea` do ca'naam`bre quiá'- rúíñ' uí'~ Jesús. 44 *Jo* lajee' i' dsea` í' seem`biñ' do i' lamí' iing` nitøø` Jesús e nijníiñ- dsea` do, *jo* dsu' ja` calí'r- fa' cajméer` lajo.

*Jaléng` dsea` i quie` nifí` quía`- dsea` Israel ja` iñ`
Jesús*

⁴⁵ Jo mi~ caguilíng`tu i í~ quía`- guá`- i casíng` dsea` Israel i líng` dsea` fariseo do i lamí~ sí` nisáng` Jesús do, jo i dsea` fariseo do colíng` cóo` jaléng` fii~ jmidsea` cajming`r` dsea` do jo cajíñ`-:

—¿Jialí` ja` catee`na`re?

⁴⁶ Joba' cañí` i í~ do quíaiñ`- do lala:

—Jíi~ jaang` dsea` ja` mí` calicuíng`naa' i fé` jlo` laco' fé` i dsea` do.

⁴⁷ Joba' lalab cañí` i dsea` Israel i líng` dsea` fariseo do quía`- i í~ do:

—Jo ¿su la quie` 'núb` cajo nicaligóng`na` júu` quía`r`-? ⁴⁸ Co' jíi~ jaang` dsea` quie` nifí` quí`-ii' o`gui dsea` Israel i líng` dsea` fariseo caguaang`gui fa` ja` nicalíñ` júu` quía`- i dsea` do. ⁴⁹ Jo dsu` i dsea` i la 'nú` i ja` cuí` júu` quíu` ta` quía`- dsea` Israel, fí` lí` 'lib`^ catíng`na` quía`- Fidié`.

⁵⁰ Jo mi~ canúu` i Nicodemo do, jaang` dsea` Israel i líng` dsea` fariseo i cangó` cango`ee` Jesús coo` née`~, joba' dsea` í` lalab cañí`r` quía`- dsea` do:

⁵¹ —Lí`^ laco`gui la fé` fí` ní` jì` quía`- júu` quíu` ta` quí`-ii', e ja` cuøøng` nicuøø`naa' dsee` jaang` dsea` e jíi~ ja` mí` cane`ee' røø` jalé` e jmóor` do, su guíu` osi ja` dseeng` é.

⁵² Joba' lalab cañí` i dsea` do quía`- Nicodemo:

—Jo ¿su dsea` Galileab líng` 'nú` cajo? Jo jminá` jmitíng` júu` quía`- Fidié`, jo lajoba' nilíñ`^ e jíi~ jaang` dsea` i fé` cuaiñ` quía`- Fidié` ja` mí` cajáar` fí` lí` se` Galilea.

⁵³ Jo mi~ cangí` jo, lajaléng` i dsea` do caquiñ`- cangolíñ` fí` quía`r`.

8

Jaang`dseamf`i catáng`i iuung` ta`'lée`

¹ Jo mi~ cangf` e cangolíng` jaléng` i dsea` do, ca'ib` Jesús fí e cangór` fí cōo` yá^ mó` e sií Olivos. ² Jo mi~ cajneá` e jmii~ cōo`gui do, joba' caquim`-tur fí guá'- fé' e si' fí Jerusalén, jo mi~ caguiéiñ'- fí jo, fñm' dsea` i cangoquiéeng' fí li~ siñ', joba' caguár` lana jo mifíng` canaañ` e'bre i dsea` do júu^ quiá'- Fidiéé`.

³ Jo lajee` e guiing~ Jesús e e'r' i dsea` do, caguilíng` cōo` tú` mñng`~ dsea` Israel i líng` dsea` fariseo colíng` cōo`~ tifa' quiá'- júu^ quiu' ta~ quiá'- dsea` Israel, jo jéeiñ` jaang` dseamf` i nīnicatōñiñ`~ i iuung` ta` 'lée` cōo`~ jaang` dseañu' i o' quiá'r-. Jo mi~ caguilíñ` fí jo, dob casíñ` i dseamf` do jee~ i dsea` i teáng` do ie~ jo, ⁴ jo lalab casí'r- Jesús:

—Tifa', i dseamf` la nīcatōng`~naa're lajee` e guiáng`~ iuuiñ` ta` 'lée` cōo`~ jaang` dseañu' i o' quiá'r-. ⁵ Jo fí ni~ júu^ quiu' ta~ e cajme' Moi` fé' e jaléng` i dseamf` i jmóo` lajo 'né` niquiúng`- dsea` ir` cuub` cartí nijúuiñ`. Jogui 'nu`, ¿jial fó'?

⁶ Jo cajíng`- i dsea` do lana e lí' laco' 'nór' jial niguié'r e nicuø'r- Jesús dsee` fí quini` dseata~. Jo dsu' Jesús dsifí mi~ canúur` e jo lico' catúum`bre, jo mifíng` canaañ` jmo'r' fí jee~ 'lee` cōo`~ niguóor`. ⁷ Jo cō' ja` quiung` i dsea` do e jmíngi'-bir Jesús cuaiñ` quiá'- e jo, joba' casíng`tu` 'ñia' dsea` do jo cajíñ`- casí'r- i dsea` do:

—Doñí` iñ` 'nú' e lí' áa'na' e ja` ee` dsee` røøng`na' jii' cōo`, joba' teáng`na' i dseamf` na la'uii~ cuu~.

8 Jo mi~ cangî e cajîñ'~ lajõ, caléb'tu catúuiñ' fí ni' uó~, jõ canaañ' jmo'tur jee' lee' cóo'~ niguóor'.
 9 Jo dsifí' mi~ canúu~ i dsea` do lajii' e cajíng'~ Jesús, dsifí' lanab canaañ' dsilíñ' tá'~ jáiñ', jõ la'uii~ canaang` ngolíng` jaléng' i niyúu'gui, jõ cøøng`gui lajõ cangolíng` jaléng' i le'eáang`gui, jõ lajob cajméer` car` cató' uøøiñ` lajiiñ'. Jo coob` mi~ calilí'^ Jesús e ñia'bre catúung`guir cóo'~ i dseamî do, 10 joba' casíng'tu ñia'r', jõ miñing` cajming'í'r~ i dseamî do jõ cajîñ'~:

—¿Jie' fí ningotáang'~ i dsea` i lamí' ñíng` ñu' do? Jõ ¿su jii'~ jaañ' ja' ee` cajmeáiñ' ñu'?

11 Joba' cañí' i dseamî do quiá'~ Jesús jõ cajîñ'~:

—U~, jii'~ jaañ' ja' ee` cajmeáiñ' jnea~, Fíi'.

Joba' cañí'tu Jesús quiá'~ i dseamî do jõ cajîñ'~:

—O'gui jnea~ ee` nijmeáan'~ ñu' cajo, jõ lana guóng' fí' quií'~, jõ jõ` güibeáang'gui uø' dsee` melé^.

Jesús láiiñ' e jì e jneá' jee' dsea` jmigüí'

12 Jo mi~ cangî jõ, cangób~tu Jesús fí' lí' siseáng' dsea`, jõ lalab casí'r~ jaléng' dsea` do:

—Jnea~ lán'n e jì e jneá' jee' dsea` jmigüí'; joba' jaléng' dsea` i ngí' colíng` cóo'~ jnea~, niliseab` e jì do quiá'r~ co' e joba' e cuø' e seeng` dsea` lata~, jogui cajo jõ` tóo` jmi~ fa' niliseeng`guir fí' lí' ñu' sò'.

13 Jo mi~ canúu~ dsea` Israel i líng' dsea` fariseo e júu` jõ, joba' lalab cañí'r quiá'~ Jesús:

—'Ñu' lico' fó' jii'~ uii' quiá'~ jalé' e guiá' e jmoo' uøø'ba', joba' jalé' e fó' do ja' e quíng' jii'~ coo'.

14 Joba' cañí' Jesús quiáiñ'~ do jõ cajîñ'~:

—Quím' jalé' e júu^ e fá' jnea~, nañí' fa' ñiá'baa fá'a uii~ quie~ e ñiá'a, co' ñi'baa guiá~ jie~ fí' lí' cagá~a jōgui jie~ fí' lí' niníng'^túu cajo; jō dsu' 'nú'gui ja' ñi'na' jii~ coo` e jō. ¹⁵ Co' 'nú' ñi'na' í' quiá'~ jaléng` dsea` lí'^ laco'gui la' í' ó'na' yaam~ba'. Jō dsu' jnea~gui ja' jmóo`o lajō quiá'~ jii~ jaang` dsea` la ñii~ ñiá'a. ¹⁶ Jō song jmóo`o lajō dsu' laco' catám~ niquidsii' í', jō ja' ñiá'a niquidsii' í' cajo, co' Tiquí'ii' i casíng` jnea~ fí' jmigüí' la, íb' i jmicóo'~ jnea~ e quidsii' í' quiá'~ dsea` laco' catíng`. ¹⁷ Jō fí' ní' júu^ quiu' ta~ quí'~ 'nú' fé' e mi~ seeng` gáng~ dsea` i tí' ní' røø` quiá'~ lajii'~ e calí' do, jōba' quím' e júu^ do laco' sí'í'. ¹⁸ Jō jnea~ lín'n jaang` i tí' ní' quiá'~ jalé' e jmóo`o do, jōgui Tiquí'ii' dsea` i casíng` jnea~ fí' la líiñ' jaang`gui dsea` i tí' ní' quiá'~ jalé' e jō cajo.

¹⁹ Jōba' cajmingí'~ i dsea` do Jesús jō cajíñ'~:

—Jō zjngang~gui Tiquí'í'^ jóng?

Jōba' cañí' Jesús quiá'~ i dsea` do jō casí'~reiñ':

—'Nú' ja' cúing`na' jnea~, o'gui cúing`na' Tiquié'e cajo; co' faco' cúing`na' jnea~, jōba' cuím`ba' la quie' Tiquié'e cajo.

²⁰ Jō jalé' e júu^ na cajíng'~ Jesús lajee` e iuuiñ~ e'r' dsea` fí' dsí' sinúu^ guá'~ fé' e sí' fí' Jerusalén ca' e fí' lí' tée'~ guóo' e ta'r' cuu~ quiá'~ guá'~. Jō dsu' jii~ jaang` dsea` ja' i cateá'~ dsí' fa' casaiñ'~ dsea` do lajee` jō, co' ja' mí' catí'bi' í' e nijmé~ dsea` lajō.

“Ja' quí'~ jmü~ nigüilíng`na' fí' lí' niníng'^ jnea~”

²¹ Jō mí' cangí' jō, lalab casí'~tu Jesús i dsea` fíng` do:

—Jnea~, coob` mí' nití' í' e ninín'^n, jō 'nú' ní'nam'^ba' jnea~, jō dsu' 'nú' nijúum~ba' jee~

jalé` dsee` quí`na'. Co' 'nú` ja` quí`- jmí` fa' e nigüilíng`na' fí` lí` niníng`^ jnea`.

22 Jo mi canúu` i dsea` Israel i teáng` do ie` jo e júu` jo, joba' lalab cajíñ`-:

—Jangám` song í` dsí` i dsea` na e nijngáng`- 'ñia'r', joba' jíñ`- e ja` cuøøng` nidseá`^naa' cóo`r` fí` lí` nidséíñ`-.

23 Jo mi` calilí`^ Jesús e fé` i dsea` do lajo, joba' casí`r` dsea` do:

—'Nú` jii`- fí` lab jii`- lí` seeng`na', jo dsu' jnea` fí` yáb`^ gáa'a; co' jii`- dsea` jmigüi` lab líng` 'nú`, jo dsu' jnea` ja` lín`n` jii`- dsea` jmigüi`. 24 Jo uing` lajoba' fí`-i 'nú` e nijúum`ba' jee` jalé` dsee` quí`-na'; co' song ja` já`- líng`na' e jneab` dseáng`- lín`n` jii`- laco' fá`a e lín`n`, joba' jee` jalé` dsee` quí`-ba' nijúung`-na'.

25 Joba' cañí` i dsea` do jo cajmingí`r` Jesús lala:

—Jo, ¿i` dseáng`- líng` 'nu` jóng?

Joba' cañí` Jesús quiá`- i dsea` do jo casí`-reiñ`:

—Lí`^ laco'gui nicafí`-i 'nú` lamí` jéeng`gui, íb` jnea`. 26 Jo jmiguiab` jalé` e sea` e fí`-i 'nú` jogui e niquidsii`- í` quí`-na' cajo. Jo dsu' i dsea` i casíng` jnea` fí` jmigüi` la jmang`- e jáb`- jalé` júu` quiá`r`, jo lajii`- júu` e fá` jnea` jee` jaléng` dsea` jmigüi` røøb` laco' jii`- júu` e núu` jnea` e fé` i dsea` i dseáng`- casíng` jnea` fí` jmigüi` la.

27 Jo dsu' i dsea` do ja` cangáíñ` e Jesús fé`r` uii` quiá`- Tiquiá`r`. 28 Jo casí`- Jesús i dsea` do lala:

—Jo mi` nitáng`na' jnea` fí` yá`, jnea` dsea` cagá`a fí` ñifí` e lín`n` jaang` dsea` jmigüi`, joba' nililí`^na' jóng e jneab` dseáng`- lín`n` jii`- laco' fá`a e lín`n`, jogui jii`- cóo` ja` e jmóo`o la ñii`- 'ñiá`a, co' lico' fá`a lajii`- e nica`e` Tiqui`ii` jneab`. 29 Jo i dsea`

ḡ casíng` jnea~ do, seem`bre cóo~ jnea~ lana; jo ja` mi' catiúuiñ~ jnea~ 'ñiá'a jíi~ cateá, co' dseáng~ contøøm~ jmóo`o lajúi~ e iñ~ e nijmee~e.

³⁰ Jo mi~ tí li~ cató' e fé' Jesús e júu^ na, joba' fíim' dsea` já'- calíñ~ júu^ quía'- dsea` do ie~ jo.

Mi~ ca'e' Jesús jial líng' dsea` i silaang~ jee~ dsee~ quía'-

³¹ Jo mi~ cangí jo, casí'- gui Jesús jaléng' i dsea` Israel i já'- calíng~ júu^ quía'r~ do, jo cajíñ'- casí'- reiñ':

—Song 'nú' nijmití'na' lí^ laco' jíi~ e nica'ée~e 'nú' e nijmee~na', joba' dseáng~ dsea` quie~baa ni'uíng~na' jóng; ³² jogu' lajob niliñí'na' dseáng~ la'uíng~ jalé' júu^ quie~e, jo lajoba' ni'uíng~na' dsea` i silaang~ jee~ jalé' dsee~ quía'^.

³³ Joba' cañí' i dsea` do quía'- Jesús jo cajíñ'-:

—Jnea'^ lí'naa' dsea` siju~ 'li~ yúu~ Abraham, jo jíi~ cóo` née' ja` mi' calí'naa' dsea` 'léeng~ quía'- dsea` jiéng'; joba' jial lí' e fó' 'nu' e ni'uíng~naa' lafa' dsea` silaang~?

³⁴ Joba' lalab casí'- Jesús i dsea` do:

—E laba' jmitaa^ óo'na', e jaléng' dsea` i beáng' dsee~ yaang~ líiñ' lafa' dsea` 'léeng~, co' e dsee~ quía'r~ dob quiu' ta~ ír. ³⁵ Cofa' jaang` dsea` 'léeng~ quía'- dsea` ja` catíñ~ jalé' e sea` quía'- fiir~, jo dsu' jaang` jóo' dsea` catíim~bre lajalé' e jo. ³⁶ Jo lajob, song jnea~ calaan~ 'nú' jee~ jalé' dsee~ e nica'ee~na', joba' dseáng~ lajang'^ júu^ba' e nileáng` 'nú' jee~ jalé' e dsee~ quí'na' do. ³⁷ Jo niñib` jnea~ guiú~ e dsea` siju~ 'li~ yúu~ Abraham líng' 'nú'; jo dsu' 'nú' iing~na' jngang'^na' jnea~, co' ja` iing~na' íng'na' júu^ quie~e. ³⁸ Jo jnea~

fá'a lajii' e nica'e' Tiquié'e jneab~, jo dsu' 'nú' jmoo'na' lajii' e fé' tiquí'ba'.

³⁹ Jōba' cañii' i dsea`do quiá'- Jesús jō cajíñ'-:

—'Lii' yáuu' Abrahambing' líng' dsea`mí' áang' quí-naa'.

Jō dsu' Jesús cañiir` quiá'- i dsea`do jō casí'-reiñ':

—Facō' já'- e 'nú' líng'na' siju' 'lii' yáuu' Abraham, jōba' laco' cajmée' íb` catíng- e nijmee-na' jóng facō' lajō. ⁴⁰ Jō dsu' 'nú' iim~bi' e nijngang'^na' jnea~, nañi' fa' jmang'- júu^ jáb'- fá' jnea~ lí'^ laco'gui nica'e' Fidiée' jnea~. Jogui 'lii' yáuu' quí-na' Abraham dseáng'- ja' cajmée'bre lajō.

⁴¹ Co' 'nú' dseáng'- laco' jmóo` tiquí'ba' jmoo'na'.

Jōba' cañii' i dsea`do quiá'- Jesús, jō casí'r- dsea`do:

—Ja` lí' jnea'^ dsea` i ja` ñi' i~ tiquiá'^; co' jaam` Tiquí'naa' seeng~, jō íb` Fidiée'.

⁴² Jōba' cañii' Jesús quiá'- i dsea`do jō cajíñ'-:

—Facō' já'- e Fidiée' líng' Tiquí'na', jōba' 'neáam' 'nú' jnea~ facō' lajō, co' íb` dsea` i casíng` jnea~ e cagá-a fí' jmigüí' la, jogui lab sín`n lana. Co' jnea~ ja' cagá-a la ñii- 'ñiá'a, dsuco' dsea` íbing' i casíng` jnea~ fí' la. ⁴³ Jōba' fá' jnea~ e ja` mí' ngáng' 'nú' júu^ quié-e lana, dsuco' ja' iing~na' núu'na' e jō. ⁴⁴ Jō fii' i 'lim'^ líng' tiquí' 'nú'; jogui co' dsea` quiá'-bre líng'na', jōba' jmoo'na' lajii' e iin~. Jō latí' mi~ uiim~ e fii' i 'líng'^ jmóor` ta~ jngang' dsea~, jogui dseáng'- jii' coo` e jmóor` do ja' cōøng` cōo' júu^ quiá'- Fidiée', jogui dseáng'- jmang'- júu^ e o' já'-ba' quier'. Jō mi' fé'r' júu^ e o' já'-, jōba' dseáng'- fé'r' laco' la líb' jóng, co' jaang` dsea` adseaam` líiñ', jogui líiñ' tiquiá'^ jalé' e júu^ e o' já'- do. ⁴⁵ Jō jnea~ gui jmang'- júu^ já'-ba' fá'a,

dsu' ja' ja' línɡ`na' júu^ quié`e. ⁴⁶ Jo júi~ jaang` 'nú' cuóøng` lí fo`na' e jnea~ lín`n jaang` dsea` røøng` dsee~, co' jaang` dsea` i quié' jmag`- júu^ jáb'- línɡ' jnea~, joba' çjali' ja' ja' lím`bi' júu^ quié`e? ⁴⁷ Jo jaléng` i dsea` i línɡ' dsea` quiá'- Fidiéé` núu`bre jalé' júu^ quiá'- Fidiéé`; jo dsu' 'nú'gui ja' línɡ`na' dsea` quiá'- Fidiéé`, joba' ja' iing`na' núu`na' júu^ quiá'- dsea` do.

Niisem` Dsea` Jmáang` lajúi~ nú`gui e niliiseng` 'lii`yúu` Abraham

⁴⁸ Jo mi~ canúu` dsea` Israel lajúi~ e cajíng`- Jesús do, joba' casí'r` dsea` do lala:

—Nijáb'- júu^ qui`naa' e fé'naa' uii~ quií'-, e 'nú' lín' jaang` dsea` samaritano jogui e iuung` i 'línɡ` a'.

⁴⁹ Joba' cañí` Jesús quiá'- i dsea` do jo casí'- reiñ':

—U~, júi~ jaang` i 'línɡ` ja' i iuung` dsii` la, co' lajúi~ e jmóo`o e lico' jmi'goo` Tiquié`e Fidiéeb`; jo dsu' 'nú'gui ja' e jmi'goo`na' jnea~ júi~ capí`^ ⁵⁰ Jo dsu' jnea~ ja' fá`a e iin`n e nijmi'goo`na' jnea~, jo dsu' seem` jaang` i iing` e 'nú' nijmi'goo`na' jnea~, jo dsea` íb` i quidsí' í' laco' catíng`. ⁵¹ Joba' jmitaa` óo`na' e doñí' i` i núu~ júu^ quié`e, joba' dsea` í ja` tóo` jmi~ fa' e nijúuiñ`.

⁵² Joba' cañí` dsea` Israel quiá'- dsea` do:

—Lanaguib dseáng`- nicalita~ dsí`naa' e i 'lim` iuung` áa' 'nú'. Co' 'lii`yúu` Abraham cóo`-gui jaléng` dsea` i café` cuaiñ` quiá'- Fidiéé` mali~gui eáang` cajúm`bre, jogui dsu' 'nú' fó` e doñí' i` dsea` i núu~ júu^ quií'-, joba' ja` tóo` jmi~ fa' e nijúuiñ`.

⁵³ Jogui 'nú', çsu' í a' e niing`-gui' laco'gui i 'lii`yúu` Abraham do? Co' í nicajúm`bre, jogui jaléng`

dsea` i café` cuaiñ` quiá`- Fidiéé` maliñ`gui eáang` cajúm`bre cajo. Jogui`nua, ¿i` í` o` e lin`?

⁵⁴ Jōba' cañíi` Jesús quiá`- i dsea` do jō casí`-reiñ':

—Facō' jnea` jmi`goo`- `ñiá`a, jōba' ja` e quíing` jji`~ cōō` e jmóo`o do facō' lajō. Jō dsu' Tiquié`e Fidiéeb` dsea` i jmi`gō` jnea~, i dsea` i fó`na' i líng` Fidiéé` quíi`na' cajo. ⁵⁵ Jō dsu' `nú` ja` cuíing`na' dsea` í, dsu' jnea`gui guiúb`- cuín`nre, jōgui facō' jnea` fá`a e ja` cuín`nre, jōba' dsea` adseaam` lín`n jóng` lí` laco`gui la líng` `nú` facō' lajō. Jō dsu' jnea`gui guiúb`- cuín`n dsea` do jōgui jmiti`baa júu` quiá`r`. ⁵⁶ Jō i `liñ` yúu`~ quíi`na' Abraham do, eáam` cali`iáang` dsír` mi` caliñir` jalé` e nidsing`ng`- jnea~, jō cō' dseáng`- cangá`-bre e jō, jōba' eáam` cali`iáang` dsír`.

⁵⁷ Jō mi` canúu`- i dsea` Israel do jalé` e casí`- Jesús ír, jōba' cañíir` quiá`- dsea` do:

—`Nu` ja` mí` guóo`bi' cincuenta jji, jō fó` e cañim`ba' `liñ` yúu`~ Abraham.

⁵⁸ Jōba' cañíitū` Jesús quiá`- i dsea` do jō casí`-reiñ':

—E laba' iin`n jmitaa` óo`na' e niseem` jnea` lajji`~ mi` ná`-gui e niliseeng` `liñ` yúu`~ Abraham do.

⁵⁹ Jō mi` canúu`- i dsea` do e júu` jō, jōba' dsifí` lajōb` casitíiñ` cūu` cōo`~ e sí`í` nijngáiñ`- Jesús; jō dsu' dsea` do ladsifib` ca`méeiñ, jō cagüi`í`bre e fi` dsíi` sinúu` guá`- fé` do e sí` fi` Jerusalén.

9

Mi` cajmée` Jesús e calijné` jaang` dseañu` i tiu-ung`

¹ Jo mi~ cangîgui lajo, coo` née'~ cangîng' Jesús colîng~ cóo'~ ì dsea` quiá'r~ do fí' quiá'~ lí~ guîng~ jaang` dsea` ì tiuung~ latí' mi~ cangáang'~. ² Joba' ì dsea` quiá'~ Jesús do cajmingí'~ reîñ' lala jo cajíñ'~:

—Tifa', ¿jiali' cangáang'~ ì dsea` na e tiuuiñ~? ¿Su calíñ~ lana uí'~ dsee~ quiá'r~ ofa' uí'~ dsee~ quiá'~ sejmiï`bre é?

³ Joba' cañíi' Jesús quiá'~ ì dsea` quiá'r~ do jo casí'~reîñ':

—Ja` lí' lajo e uí'~ dsee~ quiá'r~ calíñ~ lana, o'gui uí'~ dsee~ e oo` sejmiir`. Co' calíñ~ lana e lí' laco' cuo' lí~ e lajib` quíi'~ Fidiée' jmiï` lí' jmér~. ⁴ Jo lajee' e jneá', 'né' jmó`baa' ta~ lí' laco'gui jíi'~ júu^ e sinú`naa' quiá'~ dsea` ì casîng` jnea~ fí' jmîgüî` la; dsuco' coob` mi~ ninú`, joba' jíi'~ jaang` dsea` jo` quí'~ jmiï` fa' nijmé`guir ta~. ⁵ Jo lajee' e táam`bí' fí' jmîgüî` la, joba' jneab~ lín`n e jí' e cuo' e jné' dsea` jmîgüî`.

⁶ Jo mi~ cangî e café' Jesús e júu^ na, jo cañíir' fí' ní' uó^, jo cóo'~ e jme'le'r' do cacáñ'~ jee' 'lee', jo cajméer` capí'~ jíi', jo cóo'~ e job casúur~ jminí' ì dsea` tiuung~ do. ⁷ Jo mi~ cangî jo, lalab casí'~reîñ' do jo cajíñ'~:

—Gua~ jo güirúu'~ jminí'~ fí' dsí' guiée' silîng' e siï` Siloé —jo e Siloé do guo'ng' Jaang` ì Casîng` Dsea`.

Joba' lajob cajmée` ì dsea` tiuung~ do, cangó`bre e cangorúu'r' jminir', jo nijné'~bre mi~ tí' lí' caquiñ'~ fí' jo. ⁸ Jo jaléng'~ dsea` ì neáang' jîng~ laco' lí~ guíiñ'~ do cóo'~gui jaléng'~ dsea` jiéng'~ ì ní'~ quiá'r~ lamí~ jéeng'gui e guíiñ'~ mir' cuu~, joba' jaléng'~ ì dsea` î jmingí'~ rúíñ'~ jo fé'r':

—¿Su o' i dseañu' nabi i lami~ gua` ta~ mi' cuu` do?

⁹ Jo i liing~ i dsea` do jíñ'~:

—Dsea` íbi na.

Jogui i liing~ gui fé':

—U~, o' í na, l'í^ lajjiu jnéem~bre.

Jo mi~ calilí^ i dsea` tiuung~ do e síng` dsea` uii` quiá'r~, joba' cañír` jo cajíñ'~:

—Jnea~bi dsea` í.

¹⁰ Joba' cajmingí'~ i dsea` do i dsea` lami~ tiuung~ do jo casí'~reiñ':

—Jo ¿jial cajmee'~ e calijné'tu'?

¹¹ Joba' cañíi` i dsea` lami~ tiuung~ do quiá'~ i dsea` do jo casí'~reiñ':

—I dseañu' i sii` Jesús dob cajmi'leáaiñ~ jnea~ e lico' cajméer` capí^ jíi` cóo'~ jme'e'r', jo cóo'~ e job casúur~ jminii~, jogui caquiur' ta~ jnea~ e ninii~ i nirúu'~u jminii~ e fí' guiéé' síng'~ e sii` Siloé do, joba' lajob cajmé~e. Jo dsifí' mi~ calí' rúu'~u jminii~, ladsifí' lanab calijné'e.

¹² Jo mi~ cangí jo, cajmingí'~tu i dsea` do i dsea` lami~ tiuung~ do jo cajíñ'~:

—Jo ¿jnan~gui i dseañu' í lana?

Joba' cañíi` i dsea` lami~ tiuung~ do jo casí'~reiñ':

—Ja` ñii~ jnaaiñ~.

Mi~ cajíng'~ i dsea` tiuung~ do i~ i cajmi'leáang~ ír`

¹³⁻¹⁴ Jo 'ña' ie~ jmii~ e cajméé` Jesús e jíi` do cóo'~ e calijné` i dsea` i lami~ tiuung~ do, ie~ jo dseáng'~ cangotíng` jmii~ e qui'~ títng` dsea` Israel e jmi'íñ'. Joba' jaléng' dsea` i cuí` quiá'~ i dsea` tiuung~ do cató~bre i dsea` í jo cangojeáang`neiñ' fí' quini~ dsea` Israel i líng' dsea` fariseo. ¹⁵ Joba'

mi~ caguiéiñ'- do fi' jo, i dsea` Israel i líng' dsea` fariseo do cajmingí'- reiñ' jial calí- e calijnéiñ'. Jo dsea` do cañíir` quiá'- i dsea` Israel do jo casí'- reiñ':

—Mó^, jíib` casúu- dsea` do jminii-, jo mi~ cangí' jo, cangorúu'~u, jo lajoba' calijné'e.

¹⁶ Jo mi~ canúu- i dsea` Israel i líng' dsea` fariseo e júu^ jo, joba' i líiñ'~ do cajíñ'-:

—I dsea` i cajmée` e jo ja` lí^ dsi`naa' líiñ' dsea` quiá'- Fidié~, co' ja` jmi'gór` e jmi~ e jmi'íng' jnea~aa', dsea` lííí' dsea` Israel.

Dsu' caguiaang-gui i dsea` Israel i líng' dsea` fariseo do fé'r` jo jíñ'-:

—Jo ¿jial quíi~ i dseañu` do jmi~ nijmér- jalé` e jo song jaang` dsea` dsee- dsea` quib' líiñ'?

Jo e jo ca'uíng- e lajee` la'ó' íbre canaaíñ` e jo sñiñ` røø. ¹⁷ Jo mi~ cangí' jo, cajmingí'-tur i dsea` i lamí~ tiuung- do jo casí'- reiñ':

—Jo laco' fó' na e ca'láam-ba'. Jo ¿e~ fó' uii` quiá'- i dsea` i cajmi'leáang- 'nu` do?

Joba' cañíi` dsea` do quiá'- i dsea` Israel i líng' dsea` fariseo do jo casí'- reiñ':

—Jnea~ lín-n e dsea` í líiñ' jaang` dsea` i fé' cuaiñ` quiá'- Fidié~.

¹⁸ Jo dsu' jaléng' i dsea` Israel i líng' dsea` fariseo do ja` iñ~ fa' já'- calíñ- e lamí~ tiuung- i dsea` i nijné' lana joba' catø'r- sejmií i dsea` do. ¹⁹ Jo mi~ caguiliñ'- do, joba' cajmingí'-reiñ' do jo cajíñ'-:

—¿Su jóo`ba' líng' i dseañu` la? Jo jmée'~na' jnea' júu^ røø, ¿su dseáng'- tiuuiñ- calisém`bre? jo song lajo, ¿jial calí- e lana nijné'r'?

²⁰ Joba' lalab cañíi` sejmií i dsea` i lamí~ tiuung- do jo cajíñ'-:

—Cuím` jnea` guiá` joo`naa', jogui ne`baa' røø` e tiuum`bre caliséiñ`; ²¹ jo dsu' ja` ne`naa' jial e calijné'r', o'gui ne`naa' i` i` cajmée` e calijné'r` cajo; jo nab cuóøng` nijmingí`na're 'ñia'r' co' nifém`bre, jo 'ñia`bre cuóøng` lí` jmeá'r` 'nú` júu` dseáng`-laco' calí`.

²² Jo cajíng` i` sejmiir` do lajo, co' 'gó`bre fing ee` cajmeáng` dsea` Israel i` líng` dsea` fariseo ír'. Co' i` dsea` í, røøb` nicasíiñ` e song seeng` dsea` i` jmicuíng` Jesús e líiñ` do Dsea` Jmáang` i` sijeeng` dsea` Israel i` nicá` nifí` quiá'r`, joba' jaléng` i` dsea` i` jmóo` lajo, jo` sea` fí` quiá'r` fa' e niquíng`guir jee` dsea` Israel o'gui cuóøng` fa' e nidsilíng`guir fí` guá`-quíá`-dsea` do cajo. ²³ Jo uíing` lajoba' cajíng`-sejmií` i` dsea` i` ca'láang` do e yaang` i` dsea` Israel i` líng` dsea` fariseo do 'né` nijmingí'r` i` jooiñ` do co' nifém`biñ` do.

²⁴ Jo i` dsea` Israel do calé` catú`-cató'r` i` dsea` i` lamí` tiuung` do jo lalab casí`-reiñ`:

—Fée` júu` já` fí` quini` Fidiée`, co' nineb` jnea` røø` e i` Jesús do líiñ` jaang` dsea` dsee` dsea` quib`.

²⁵ Joba' lalab cañí` i` dsea` lamí` tiuung` do quiá`-dsea` do jo cajíñ`-:

—Ja` ñi` jnea` su líiñ` dsea` røøng` dsee` osi o' lajo é, lajii` e ñii` quiá'r` e jnea` lamí` tiuum`baa, jogui lana nicajméer` e nicalijné`baa.

²⁶ Joba' i` dsea` do cajmingí`-tur i` dsea` i` ca'láang` do jo cajíñ`-:

—¿E` jíi` e cajmée` i` dsea` do quíi` e calijné`?

²⁷ Joba' cañíiñ` do quiá` i` dsea` do jo casí`-reiñ`:

—Nicañi`baa 'nú` lajii` e cajméer` quíe` e do, jo dsu' 'nú` ja` já` líng`na'. Joba' ¿jialí` iing`na`

e nifá'túu calé' catú- e jo? Ofa' iim~ba' é e ni'uíng-na' dsea` quiá'r- cajō.

²⁸ Jo mi~ canúu- i dsea` Israel i líng' dsea` fariseo do lado, joba' canaañ` s'f'r i dsea` i ca'láang- do júu` 'ní' jo s'f'reiñ':

—'Nu` lin' jaang` dsea` quiá'- i dsea` í, jo dsu' jnea'^gui dsea` quiá'- 'lí~ yáa'~ Moi~ lí'naa'. ²⁹ Co' jnea'^ ne~baa' røø` e Fidiéeb` dsea` casíiñ- cóo'~ Moi~; jo dsu' i Jesús do júi'~ ja` ne~naa' jie~ fí' lí' jáar'.

³⁰ Joba' lalab cañi'tu i dseañu' i ca'láang- do quiá'- i dsea` do:

—Ee'bi júu` jo, e ja` ní'na' jie~ fí' lí' jáar', dsu' jnea~gui, dsea` í'bing' nicacuø' jnea~ e calijné'e.

³¹ Jo ne~baa' røø` e ja` núu` Fidiéeb` júu` quiá'- jaléng' dsea` røøng` dsee-; co' lajúi'~ dsea` i jmiféng' íbre jogui i jmóo` lajúi'~ e iñ~, júi'~ dsea` í'bing' i núur` júu` quiá'- . ³² Jo ja` jié' lí' mí canú' júu` e seeng` dsea` i quí'~ jmí~ e nijmér- e nilijné' jaang` dsea` i tiuung- latí' mi~ caliséng'. ³³ Cofa' i dsea` la ja` jáar' e casí' Fidiéeb` quiá'r-, joba' júi'~ coo' ja` e quí'~ jmí~ lí' jmér- jóng faco' lajo.

³⁴ Jo mi~ canúu- i dsea` Israel i líng' dsea` fariseo e júu` quiá'- i dsea` i ca'láang- do, joba' cajíñ'- casí'-reiñ' lala:

—'Nu`, dsea` cangáan' e eáang' silí' dsee- 'nu`, jogui lana, çjialí' 'nu` ni'lin' e ní'é'^ jnea'^ jial' né- jmó'o'o'?

Joba' i dsea` Israel i líng' dsea` fariseo do caguíñ` i dsea` i lamí~ tiuung- do congua' e fí' dsí' sináa' guá'- quiá'r- do.

Lafa' tiuum- dsea` mi~ røøiñ` dsee-

35 Jo mi~ cangîgui lajo, caliñi' Jesús e caguim` dsea` Israel i líng' dsea` fariseo do fi' sinuu^ guá'- quiá'r- i dsea` i lamí~ tiuung- do, jo dseáng'- jo` íng'neiñ' do. Jo mi~ cajíng'tu rúng' Jesús cóo' i dsea` i lamí~ tiuung- do, joba' cajmingí'r- i dsea` do jo casí'-reiñ':

—¿Su já'- líng' 'n# júu^ quiá'- i dsea` i jáa' fi' ñiff- e líiñ' jaang` dsea` jmigüí'?

36 Joba' cañi' i dsea` do quiá'- Jesús jo cajíñ'-:

—Jméel~ jnea~ júu^ i~ i dsea` í, jo lajoba' já'- nilín'n júu^ quiá'r-.

37 Joba' cañi' Jesús quiáñ'- do jo casí'-reiñ':

—Nicañim`bi' dsea` í, jneab~ í cóo' i sin' siin'~ lana.

38 Joba' i dseañu' i ca'láang- do casí'r- uó- jnir~ fi' quiniñ' Jesús jo casí'r- dsea` do:

—Jáb'- lín'n júu^ quí'-, Fíi'.

39 Jo mi~ cangî jo, cajíng'tu Jesús casí'-reiñ' jo cajíñ'-:

—Jnea~ cagá'-a fi' jmigüí' la e lí'^ laco' niquidsii- í' quiá'- jalé' dsee- quiá'- dsea` jmigüí', jo lajoba' jaléng' dsea` i lafa' tiuung- uí'~ dsee- quiá'r- ni'uúñ- dsea` i lafa' i jné' tu calé' catú-, jogui i dsea` i í dsí' e jné'r', joba' ni'uúñ- dsea` i lafa' tiuung-.

40 Jo mi~ tí lí' canúu- e jo cóo' tú- míng'~ dsea` Israel i líng' dsea` fariseo i niteáang- cóo' Jesús ie~ jo, joba' cajmingí'r- dsea` do jo cajíñ'-:

—Jo, ¿su jnea'^ lí'naa' lafa' dsea` tiuum- jóng?

41 Joba' cañi' Jesús quiáñ'- do calé' catú- jo casí'-reiñ':

—Faco' 'ná' líng'na' lafa' dsea` tiuung-, joba' ja'e dsee- oo- na' quiá'- lajúi~ dsee- quí'- na' jóng. Jogui

dsuc̣o' 'náj' í óo'na' e lafa' jné'ba', joba' seab` dsee`
quí' na'.

10

Jaang` dsea` i jmóo` í` guiá` jo'se` quiá`-

¹ Jo mi~ cangî jo, casí'~ guí Jesús jaléng' i dsea` i
caseáng' do jo cajíñ'~:

—E laba' iin~n jmitaa^ óo'na', e doñí' i dsea` i
iing~ nicuá'~ íá' fí lí~ sijníng~ jo'se` quié~ e jo ja`
'nór' e ningíñ~ fí o'íá' quiá'~ e íá' do, joba' i dsea` í`
líiñ' jaang` i i` lée'. ² Jo dsu' i dsea` gui i í` fí o'íá`
quiá'~ e íá' do, joba' dsea` í` líiñ' jaang` i jmóo` í`
røø' jo'se` quiá'~. ³ Jo guí i dsea` i jmóo` í` jní` e lí`
teáng'~ i jo'se` do, náa'bre o'íá' e laco' ningíng`
i dsea` i jmóo` í` guiá` i jo'se` do. Jo i dsea` i
jmóo` í` guiá` i jo'se` do nitó'r' lajaang` lajaang` i
jo'se` do quiá'r~ lí^ laco' la siñ' do, jo jaléng' i
jo'se` do nicuí'bre' luu~ i fii~re' do. Jo i fii~re' do
uøøm`bre i jo'se` do e laco' dsijéng`neiñ' fí jee~
mó'. ⁴ Jo mi~ cató' e uøøiñ' do lajaléng`ne', joba'
'ñiab' i dsea` do quiér' nifí quiá'~ i jó' quiá'r~ do,
jo lajob nidsilíng` i jo'se` do laco' ngóo' fii~re', co'
guiáb~ nicuí'm`bre' luu~ dsea` do. ⁵ Jo dsu' jaléng' i
jo'se` do ja` dsiquí're' dsea` i ja` cuíng`ne', co' lí^ lí`
cuí'bre' mi~ níng`ne' i dsea` la'í, co' ja` cuí're' luu~
i dsea` la'í.

⁶ Jo Jesús casí'r~ i dsea` do cóo'~ júu^ lana, jo dsu'
i dsea` do ja` cangáíñ' e~ guøng` e júu^ e casí'~ Jesús
i dsea` do ie~ jo.

Jesús líiñ' jaang` dsea` i jmóo` í` guiá` jo'se` quiá`-

⁷ Jo lalab casí'~ guí Jesús i dsea` do jo cajíñ'~:

—E laba' jmitaa^ óó'na': Jnea~ lín'n e jní^ quiá'- e iá' e lí' dsitáng' i jo'se" do. ⁸ Jo jaléng' i dsea` i jmigóo` i nicajalíng~ lajii~ nú'- gui e nigáa' jnea~ do, jaléng' i dsea` í lúíñ' ì i 'léé', jo dsu' jaléng' i dsea` i lúng' lafa' jo'se" quié- e ja` calijí'r~ júu^ quiá'- dsea` do. ⁹ Jo jnea~ fá'túu e lín'n e jní^ do, joba' jaléng' dsea` i íng' jnea~ jogui ningúñ' fí' e jní^ quié- e do, joba' dsea` íbing' i nilí' nileáng` jee~ jalé' dsee- quiá'- . Co' jaléng' i dsea` do lúíñ' lafa' jo'se" quié- e i cuóøng` lí' dsitáng' jogui uóøng` jogui dsé'bre' e gø're'.

¹⁰ Dsu' lajii~ ta~ quiá'- jaléng' i ì do lico' jmóor` ta~ uóøng` jaléng' jo'se" quié- e jogui jmóor` ta~ íng~ neiñ' jogui jngang' neiñ' cajo; jo dsu' jnea~ gui cagüén- n fí' jmigüí la e lí^ laco' niliseeng` dsea` cøøng` cóo'~ Fidiéé` lata~ dseáng'- lí^ laco' síí'. ¹¹ Jo jnea~ lín'n jaang` dsea` i jmóo' í' guiá- jo'se" quiá'-, jo cartí' jáam' 'ñiá'a e laco' ja' ni'íng- jii~ jaang` i jo'se" quié- e do. ¹² Jo dsu' i dsea` gui i ja' jí' e ta~ jo, jo lico' lí' dsír' jii~ e 'léem'~bre, joba' fing caguié- jaang` ie'dsinúu^ lajee` e nír` i jo'se" do jo cuíi'bre jóng, jo dob tíúuiñ^ i jo'se" do. Jo lajob jmóor', co' ja' lúíñ' dseáng'- i dsea` i ní' guiá- jo'se" jogui co' o' jo'se" quiá'- guir cajo. Joba' cuó'bre fí' i ie'dsinúu^ do e nijmeáng'ne' jogui nicúng'ne' i jo'se" do jogui e nisojóng- i caguaang- gui do fí' la fí' na. ¹³ Jo tíuum- i dsea` do i jo'se" do, co' lico' lí' dsír' cuub-, jo ja' ee' fí' í' óor` quiá'- i jó' i jéeiñ' do.

¹⁴⁻¹⁵ Jo fí-túu 'nú' e jnea~ lín'n jaang` dsea` i jmóo' í^ guiá- jo'se" quiá'- . Jo lí^ laco' Tiquiéé` guiáb- cuíiñ' jnea~, joba' lajob jnea~ cajo guiáb- cuín`re; jogui lajobi cajo guiáb- cuíng` jnea~

jaléng[^] i líng[^] lafa' jo'se[^] quié⁻e, joba' lajob cajo jaléng[^] î guíab⁻ cúíng[^]re' jnea[~]. Joguí jnea[~], cartí jáam[^] 'ñiá[^]a e nijúun⁻n uí[^] jaléng[^] í e laco' ja ni'íng⁻ne'. 16 Jo dsu' seem[^]bi dsea[^] i nabi nilíng⁻ lafa' jo'se[^] quié⁻e i ngí' fí' caluu[^]bi lana. Jo co' ja mí líiñ[^] dsea[^] quié⁻e, joba' 'né⁻ nitø[^]baar cajo. Jo jaléng[^] i dsea[^] i nilíng[^] lafa' jo'se[^] quié⁻e do nilínúu[^]bre júu[^] quié⁻e, joba' coob[^] 'lé[^] ni'uíiñ⁻ lajee[^] lajiiñ[^], jo jíi[^] jneab[~] dsea[^] nijmee[~] e í' ír[^].

17 'Jo Tiquí[^]ii' eáam[^] 'neáaiñ[^] jnea[~] co' nijáang[^] 'ñiá[^]a e nijúun⁻n e laco' nijí[^]túu calé[^] catú⁻. 18 Jo jíi[^] jaang[^] dsea[^] sea[^] fí' quiá[^]r⁻ e nijngáañ⁻ jnea[~], co' 'ñiá[^]baa dsea[^] cuø⁻ø fí' 'ñiá[^]a e nilín⁻n lajo, co' seab[^] fí' quié⁻e e nijáang[^] 'ñiá[^]a e nijúun⁻n joguí e nijmee[~] e nijí[^]túu cajo, co' lajob ta[^] caquiú[^] Tiquié[^]e.

19 Jo mi[^] tí' lí[^] canúu⁻ dsea[^] Israel lajii[^] júu[^] quiá[^] Jesús, calé[^] catú⁻ canaaiñ[^] e jo' siiiñ[^] røø uí[^] e júu[^] e canúur⁻ do. 20 Joba' fíim[^]bre lajee[^] la'ó[^] ír[^] canaaiñ[^] siiiñ[^] jo sí[^] rúíñ[^] lala:

—¿Jialí[^] já⁻ nuu[^]na' júu[^] quiá[^] i Jesús na? Co' i 'lim[^] iuung⁻ dsíiñ[^] na. ¡Jaang[^] dsea[^] ngaam[^] líiñ[^] na!

21 Jo dsu' i líng[^]gui i dsea[^] do fé[^]r[^] jo jíiñ[^]:

—Jíi[^] jaang[^] dsea[^] lí[^]r[^] fé[^]r[^] dseáng[^] laco' fé[^] i dseañu[^] na faco' já⁻ e iuung⁻ i 'ling[^] dsír[^]. Co' jíi[^] jaang[^] dsea[^] i iuung⁻ i 'ling[^] dsí[^] lí[^]r[^] jmér⁻ e nilijné[^] jaang[^] dsea[^] tiuung⁻ laco'gui cajmée[^] i dseañu[^] na.

Ja' jíi[^] dsea[^] Israel júu[^] quiá[^] Jesús

22 Jo coo[^] née[^] mi[^] cang[^]gui lajo, coo[^] e jii[^] güíi⁻ lajee[^] e jmóo[^] dsea[^] Israel jmí[^] e jmiguiéng[^] dsír[^] e caligüeang[^] tú calé[^] catú⁻ e guá[^] fé[^] quiá[^]r⁻ e sí[^]

fi' Jerusalén, cō' lami~ jéeng'gui gab` cajmée` dsea` fi' dsí' jō; ²³ jō ie~ jō, dob táang` Jesús fi' cōō` ni'núú' quiá'- e guá'- fé' do, jō tá'- cōō` íng'~ ngir' e fi' cōō` ni'núú' quiá'- e guá'- do, fi' lí~ sii` ni'núú' quiá'- 'lí~ yúu' Salomón. ²⁴ Jō lajee` ngí' Jesús dob mi~ carí` dsea` Israel fi' lí~ siñ', jō cajmingí'r- dsea` do lala:

—Jō ¿lí~ catí' nijmée'^ júu^ røø` e su 'nù` dsea` ì casing` Fidiée` fi' la e lin' Dsea` Jmáang- ì sijeeng` jnea'^ do ì nicá` nifí' quí-ii'? Jō lana jmee`-du júu^, ¿su 'nù` í'?

²⁵ Jōba' cañí` Jesús quiá'- ì dsea` Israel do jō casí'-rein':

—Nicañí`-bñ 'nú' e íb` jnea~, jō dsu' 'nú' ja` já'- calíng`-na' júu^ quié-e. Cō' jaléb' e nicañí`- 'nú' e nicajmé-e, jmóo`o la'eáang' cōō' ta~ huí' quiá'- Tiquié'e, jō lajalé' e jō cuø` lí~ e íb` dseáng'- lán'n; ²⁶ jō dsu' 'nú' ja` já'- líng`-na' e íb` jnea~, cō' ja` líng`-na' lafa' jo'se' quié-e. ²⁷ Cō' ì dsea` ì líng' lafa' jo'se' quié-e do nicuí`bre lúu`u, jōgui jnea~ nicuí`m`baare' cajo, jōba' dsea` í jneab~ dsiquí`re'. ²⁸ Cō' jnea~ cuøø`-baa jaléng' ì dsea` í e seeñ` cøøng` cōō'~ Fidiée` lata~, jō ja` tóō` jmí~ fa' ni'náin` quiá'- Fidiée` o'gui fa' quí'- jmí~ e ì` nijéng'-tu' jaléng' ì dsea` í fi' jaguóo`o. ²⁹ Jō lají'~ e nicangín`n e nicacuø' Tiquié'e jnea~, e jō lí' e niing`-gui eáang' lajee` lajalé', jō jí'~ jaang` dsea` quí'r~ jmí~ fa' e niguí`-guir e jō. ³⁰ Jō jnea~ cōō'~ gui Tiquié'e jaam` dsea` lí'naa'.

³¹ Jō mi~ canúu- dsea` Israel lají'~ e cajíng'- Jesús, jōba' casítí'r` cuu~ calé' catú- e lami~ iin` niquíúin`- dsea` do cartí' nijngáng'-neiñ'. ³² Jō lalab cajíng'- Jesús quiá'- ì dsea` Israel do jō casí'-rein':

—Jmigiub' jalé' e quí'~i jmí~ e nicajmé~ e jee~ 'nú' la'eáng' cóo'~ güea'^ quía'~ Tiquié'e. Jo lajee~ lajalé' e jo, çjngang~ e catúng~ e nijngáng'^na' jnea~ cóo'~ layaang~ çyü~?

³³ Joba' lalab cañí' dsea` Israel quía'~ Jesús jo cajín'~:

—Ja' í dsi` jnea'^ e nijngáng'^naa' 'nu` uí'~ jalé' e guiá~ e nicajmee'~ do, có' nijmé^naa' lajo uí'~ e gab` lí' e júu^ e fó' na fí' quini~ Fidiéé'. Có' 'nu` jji'~ dsea' jmigüíb` lín', jogui iin'~ jmée'^ e røøb` cøøn' cóo'~ Fidiéé'.

³⁴ Joba' lalab cañí' Jesús quía'~ i dsea` do jo casí'~ reiñ':

—Jo lalab fé' Fidiéé' fí' ni~ júu^ quia' ta~ quía'r~: "Jnea~ fá'a e 'nú' líng'na' laco' diéé'." ³⁵ Jo nine~baa' røø' lajji'~ e fé' e fí' ni~ jì' quía'~ Fidiéé' do e ja` cuøøng` fé'^naa' e o' já'~; jo e fí' ni~ e júu^ do quía'~ Fidiéé' fé' e jaléng' dsea` cóo'~ i casíng` Fidiéé' júu^ quía'r~ líiñ' laco' diéé'. ³⁶ Jo có' Fidiéeb' dsea` caguín' jnea~ jogui casíñ' jnea~ fí' jmigüí' la, joba', çjial cuøøng` fo'^ 'nú' e jnea~ fá'a júu^ e ga' fí' quini~ Fidiéé' mi~ fá'a e Jóo' dsea` íb` lín'n? ³⁷ Jo ja` já'~ güilíng'na' jnea~ song jnea~ ja` jmóo` dseáng'~ laco' la jmóo` Tiquié'e. ³⁸ Jogui dsu' song jmóo'bí' e quí'~i jmí~ do e nañí' fa' ja` já'~ líng'na' jnea~, joba' lí'^ já'~ güilíng'na' cóo'~ jalé' e quí'~ jmí~ do e laco' niliñí'na' e jaam` dsea` líng' jnea~ cóo'~ Tiquié'e, jogui lajobi' ír' cóo'~ jnea~ cajo.

³⁹ Jo mi~ canúu~ dsea` Israel lajji'~ e cajíng'~ Jesús do, joba' caléb' catú~ lamí~ iñ~ e nisáiñ' dsea` do, jo dsu' dsea` do dsifib' caleáng` 'ñia'r'.

⁴⁰ Jo mi~ cangí jo, caquim'~ tu Jesús fí' lí'^ lí' 'ngóo'~ gua` Jordán, jo fí' dob cajer' e fí' lí' caseáng` Juan

jm̄ī~ jaléng' dsea` lam̄ī jéeng'gui. ⁴¹ Jo lajee` táang` Jesús fí jo, i f̄im' dsea` cangolíng` e iin̄~ ninúr- júu` quiá'- dsea` do, jo lalab fé' i dsea` í:

—E jáb'- e i Juan do ja` cajméer` j̄ī~ coo` e li` e qūīr~ jm̄ī~ lajee` cateáaiñ` fí jm̄igü' la, jo dsu' lajaléb' e cajíñ'- uii~ quiá'- i dseañu' la, dseáng'- jáb'-.

⁴² J̄o'ba' ie~ jo i f̄im' dsea` i já'- calíng- júu` quiá'- Jesús e fí jo.

11

Mi~ cajúng- jaang` dseañu' i sii` Lázaro

¹ Jo mi~ cangígui lajo, lajee` e táam`bi Jesús fí jo, jo ie~ jo niseeng` jaang` dseañu' i sii` Lázaro cóo'~ gui gáng- gui dseamí rúin̄', jaang` i sii` Yá^ jogui jaang` i sii` Marta, jo lajì gaaiñ' do seein̄` fí coo` f̄ī li~ sii` Betania. Jo ie~ jo guiáang'~ ráang` Lázaro e dsée'r~.

² Jo i dseamí i sii` Yá^ i rúng' Lázaro, íb` i ca'ée- jm̄ī~ jmeaf̄ī~ t̄ī~ Jesús jogui cajmiquiú'r- cóo'~ jñuguir~ t̄ī~ dsea` do lam̄ī jéeng'gui. ³ Jo co' eáam' dsée'~ gui Lázaro, j̄o'ba' i dseamí rúin̄' i gáng- do casíñ` júu` fí li~ táang` Jesús, jo lalab júu` quie' i dsea` do quiá'- Jesús:

—E lab júu` quiee-, e i dsea` i seeng` røø` cóo'~ do i eáam' 'neáan' do i sii` Lázaro eáam' líiñ' lana.

⁴ Jo dsifí mi~ canúu- Jesús e jo, j̄o'ba' lalab cañír` quiá'- i dsea` do:

—Jo e jmohūī' e líiñ'- do ja` nijéng- ír' fí ni~ 'mó-, co' e jo nilí'íng` ta~ e lí' lacó' niliñí' dsea` jial tí' 'gøng' Fidiée~, jogui lacó' niliñí' dsea` cajo jial tí' 'gøng' jnea~, dsea` lín'n Jóo' dsea` do.

⁵ Jo doñí fa' eáam' 'neáang` Jesús ì dseamî ì sii Marta do jogui ì sii Yá^ jogui ì dseañu' ì sii Lázaro do, ⁶ dsu' ja` cangór- dsifí' fí' quiáin'- do mi~ caliñir' e niráang` ì Lázaro do dsée'r~, jo cajmí' ñim~ bi 'ñia'r' tú- jmí~ gui e fí' lí~ táaiñ` do. ⁷ Jo mi~ cangî e tú- jmí~ do, joba' lalab casí'- Jesús ì dsea' quiá'r- do:

—Má- túu' fí' lí~ se' Judea.

⁸ Joba' cañí' ì dsea` î quiá'- Jesús, jo casí'r- dsea` do:

—Tífa', ja` mí' ngóo' bi eáang' e jaléng' dsea` Israel ì seeng' fí' jo lamí~ iin~ nijngáin'- 'nu` cóo'~ layaang~ cuu~, jo 'nu` caléb' catú- iin'~ guó'^ fí' jo.

⁹ Joba' cañí' Jesús quiá'- ì dsea' quiá'r- do jo casí'- reiñ':

—E jáb'- e sea` guitu' oor~ lajee~ e jmí'; cofa' jaang` dsea` ngír' lajee~ e jmí' do, joba' ja` dseáang'- niqiuíin'-, co' jneáb' lí~ ngír'; ¹⁰ jo dsu' song jaang` dsea` ngír' fí' cóo' lí~ nuu~, joba' quiung' guiáam' bre ngír', co' ja` sea' jî cóo'~ e cuø' e jneá' lí~ ngír'.

¹¹ Jo mi~ cangî e café'r' e júu^ na, jo cajíng'- guir casí'r- ì dsea' quiá'r- do:

—Ì dsea` rú' uu' ì sii Lázaro do nicaquiam'- bre, jo dsu' lana ninii~ i e nijmijnée` túu dsí' bre.

¹² Joba' cañí' ì dsea' quiá'- Jesús do, jo cajín'- casí'r- dsea` do:

—Fí' naa', jo laco' fó' na e nicaquiam'- ì dseañu' î, joba' e jo cuø' lí~ e nitíim'~ tur.

¹³ Jo dsu' cajíng'- Jesús lado co' e nicajúm- ì Lázaro do, jogui ì dsea' quiá'r- do í dsíir' e já'- ba' e lí'^ güim' Lázaro lí'^ laco' gui jíi'~ e nicajíng'- dsea` do. ¹⁴ Joba' cajíng'- Jesús casí'r- ì dsea' quiá'r- do dseáng'- lajang'- jo casí'- reiñ':

—Lana niráang` Lázaro 'lím~bre. ¹⁵ Jo guiá~gui quíi~ 'nú' e ja` m'í ngóo'ó fí do latí lana, co' lajoba' e já~gui nilíng`na' júu^ quié~e, joba' eám' íáang` dsii~. Jo lanaguiba' dsé^ee' fí' quiá'r~.

¹⁶ Jo i dsea` quiá~ Jesús i sii` Tomás i lineang` dsea` suung~ mi~ canúur~ lajii~ e júu^ jo, joba' casí'r~ i dsea` rúin~ i caguiaang~ gui do lala:

—Má~aa' jneaa~aa' cóo'r~ cajo, jo song cajnga' dsea` quiá'r~, joba' la quié' jneaa~aab' nijúu~naa' cóo'r~ cajo.

Jesús i cuø' e jí'tu dsea` mi` ning' e júuin~

¹⁷ Jo mi~ caguié~ Jesús colíing~ cóo'~ dsea` quiá'r~ e fí Betania e fí lí~ cajúng~ i Lázaro do, jo níngoo' quiú` jmíib~ e nica'áng~ dsea` do mi~ caguiliin~ fí jo. ¹⁸ Jo e fií e sii` Betania do ja` huíi~ néé' laco'gui Jerusalén, co' túb'jiu jíi~ la 'ní kilómetro, ¹⁹ joba' fíim' dsea` Israel i neáang' fí jo cangoliiñ^ e cango'eer~ i Marta do cóo'~gui Yá^ e laco' ja` liin' do fi'í uii~ quiá~ e cajúng~ i rúin~ i sii` Lázaro do. ²⁰ Jo mi~ caliñi' Marta e níngoo' Jesús fí do, joba' cagüi'íir' e cangojmijíñ' dsea` do; jogui i Yá^ rúin' do, dob cajer' fí sinúu^ lajee~ jo. ²¹ Joba' mi~ cajíng' i Marta do Jesús, lalab casí'r~ dsea` do jo cajíñ'~:

—Fa' jiu~gui mi~ cagüén'~ jéeng'guijiu fí la, joba' ja` cajúng~ i rún'n do jóng faco' lajo. ²² Jo dsu' tab~ dsii~ e quíb'~ jmíi~ e nijmicóo'~ Fidiéé' jnea~ song nimí~ire lajo, co' doñi' ee' e mii'~ 'nú' dsea` do, dseáng'~ ngíim'ba'.

²³ Joba' cañi' Jesús quiá~ i dseam^ do jo casí'~rein':

—Nijí'b'tu i rún' do.

²⁴ Joba' cañi' i dseam^ do quiá~ Jesús jo cajíñ'~:

—Jáb'ⁿ, niñi'baa e jo e nijíb'tu i rún'n do mi~ nití' í' e nijí'tu jaléng'ⁿ 'líi~ mi~ tí' lí' jo.

25 Jo mi~ cangí' jo, lalab cañí'tu Jesús quiá'ⁿ i dseamí' do jo casí'ⁿ-reiñ':

—Jneab~ dsea` i cuø' e jí'ⁿ dsea`, jogui e nijí'tur mi~ ningí' e nijúuiñ~. Joba' jaléng'ⁿ i dsea` i já'ⁿ líng` júu^ quié`e, jo nañí' fa' júung~ jí'ⁿ ngúu' táaiñ`, dsu' ja` tóo` jmi~ fa' ni'náiñ` e seeiñ` cøøng` cóo'ⁿ Fidiéé'; 26 jogui jaléng'ⁿ dsea` i já'ⁿ líng` júu^ quié`e jogui e seem'bir mi~ tí' lí' jo, joba' ja` tóo` jmi~ fa' ni'náiñ` e seeiñ` cøøng` cóo'ⁿ Fidiéé' cajo. Joba' ¿su já'ⁿ lín'ⁿ jalé'ⁿ e júu^ e fíi' i 'nu` la?

27 Joba' cañí' i dseamí' do quiá'ⁿ Jesús jo casí'rⁿ dsea` do lala:

—Lajob lí', Fí'i, dseáng'ⁿ jáb'ⁿ líng` jnea~ e 'nub` lín' i Jóo' Fidiéé' camíng'ⁿ i sijeeng' jnea'^ i nijáa' fí' jmi~güi' la i nicá' nifí' quí'ⁿ-i'.

Mi~ caqui' Jesús tii- éé` quiá'ⁿ - Lázaro

28 Jo mi~ cangí' e síng` Marta cóo'ⁿ Jesús, caquim'ⁿ-bre e cangotéer` i rúin' i sii' Yá^ do. Jo mi~ caguiéiñ'ⁿ fí' quiá'rⁿ, lalab casí'rⁿ i rúin' do lí' ja` núu` dsea` jo cajíñ'ⁿ:

—Dob guing~ i tifa' do, jo 'nub` tó'r` lana.

29 Joba' dsifí' mi~ canúu~ Yá^ e júu^ jo, ladsifí' lanab cagüi'íir' jo cangórⁿ fí' lí' tó' Jesús ír'. 30 Jo Jesús ja` mí' calí'bir e fí' jee~ fíi' do, co' dobi guiiñ~ e fí' lí' cajíng' rúin' cóo'ⁿ i Marta do. 31 Jo mi~ tí' lí' calí' i dsea` Israel i caguilíng~ cango'ee' ír' e laco' ja` liiñ' do fí'í', jo mi~ cangárⁿ e cagüi'íi' i Yá^ do lajmináⁿ e fí' dsí' sinúu^ quiá'rⁿ do, joba' cangolím-bre ti'leáaiñ' cajo laco' ngóo' i dseamí'

do, co' í dsír' e ngoiñ' do ngoquí'bre e fí lí ca'áng̃ i 'liĩ rúñ' do.

³² Jo mĩ tí lí caguié̃ i Yá^ do fí lí sing' Jesús, ladsifí lanab casí'r' uó̃ jnir̃ fí quinĩ dsea` do jo casí'r' dsea` do lala jo cajíñ':

—Facó' mĩ 'nũ cagüén' jéeng'guijiu fí la, joba' ja' cajúng̃ i 'liĩ rún'n do jóng facó' lajo.

³³ Jo mĩ tí lí cangá̃ Jesús e qui' i Yá^ do cóo'gui jaléng' i dsea` Israel i caguilíng̃ cóo'r̃ do, joba' eáam' calicu' dsír' i dsea` do, jogui eáam'bi calijiuung̃ dsír' cajo, ³⁴ joba' cajmingí'r' jaléng' i dsea` do jo casí' reiñ':

—¿Jiẽ fí lí ca'áng̃ na' i dsea` do?

Joba' cajíng' jaléng' i dsea` do casí'r' Jesús:

—Má̃ aa' jo madsijó̃naa' fí jo.

³⁵ Jo canaang' Jesús qui'bre cajo. ³⁶ Jo mĩ calilí^ i dsea` Israel do e qui' Jesús, joba' lalab cajíñ':

—¡Eáam' ni'neáang̃ i dseañu' na i 'liĩ na!

³⁷ Jo dsu' jeẽ i dsea` Israel do seem'bing' i fé' lala:

—I nabi i dseañu' i cajmée' e calijné' i dsea` i lamí̃ tiuung̃ do, jo ja' i ñí jialí' ja' cajméer' fa' e ja' cajúng̃ i dseañu' i nica'áng̃ na.

Mĩ cají'tu Lázaro

³⁸ Jo fí dsír' tó̃ cuub̃ ca'áaiñ̃ i 'liĩ Lázaro do, jo o'ná^ e éẽ do cajnír' cóo'̃ cóo' 'loo' e fe'. Jo eáam' lijiuung̃ dsír' Jesús cangoquiéeiñ' e fí lí ca'áng̃ i 'liĩ do. ³⁹ Jo lalab cajíñ' casí'r' jaléng' i dsea` i teáang̃ do iẽ jo:

—Je'na' e 'loo' e sijní' e o'ná^ e éẽ na.

Jø dsu' mi~ canúu~ i dseamî i sii` Marta do i rúng' i'lii~ do e cajíng' Jesús lado, jøba' lalab casí'r~ dsea` do:

—Fii'naa', quiú` jmii~ ningóo' e ca'áng~ i rún`n na, jø lana nisi'léb` ngúu' táaiñ, faa~aa'.

40 Jø lalab cañii` Jesús quiá'- i dseamî do:

—¿Já^ mí' cafi~ i 'nu' e song dseáng'~ já'- lín' júu^ quié~e, jøba' nimó'ba' jóng jial tí' laniing~ 'gøng' Fidiéé~?

41 Jø mi~ cangî jø, cajéb' i dsea` do e cuu~ e sijní' fí' o'nú^ ée` quiá'- i Lázaro do, jogui Jesús dsifí lanab cajøør~ fí' yú^ jmigüü` jø cajíñ'-:

—Teaa~, lana cuóøø 'nu' gui'máang'~, co' jáb'- canúu' júu^ quié~e. 42 Jogui ñi'bíi` guiá~ cajo e contøøm~ já'- nuu' 'nu' júu^ quié~e, jø dsu' fii~ i 'nu' lana e lí^ laco' jaléng' i dsea` i teáng~ la jmii~ na nijá'- líiñ` e 'nu'b` dsea` casíin' jnea~ fí' jmigüü` la.

43 Jø mi~ cangî e cajíng'~ Jesús e júu^ na, jø café'r` teá' jø cajíñ'-:

—júu' fí' lí' iuun'- na, Lázaro!

44 Jø mi~ calí~ e café' Jesús lajø, jøba' dsifí lanab cagüi'íi` i dsea` i lamii~ 'liing~ do, jø laco' sibé`bi` 'mi' guotii~r~, jogui nir~ sibé` coo` jmáang'~ 'mi'`. Jø mi~ cangî jø, lalab cajíng'~ Jesús casí'r~ i dsea` i teáng~ do ie~ jø:

—Síi~na' e 'mi' e sibeáng' i dsea` i cají'tu na, jø lajøba' cuóøøng' e ngír~.

Mi~ casíng~ dsea` i quié' nifi' quiá'- dsea` Israel e nisáíñ' Jesús

(Mt. 26:1-5; Mr. 14:1-2; Lc. 22:1-2)

45 Jø mi~ cangîgui lajø, i fíim' dsea` Israel i cangolíng~ cóo' Yá^ do já'- calíñ~ júu^ quiá'- Jesús,

co' cangá-bre jalé' e quí' dsea` do jmí' ie~ mí' cajméer` e cají'tu i Lázaro do. ⁴⁶ Jo dsu' i líng' gui i dsea` Israel i cangá- e cajmée` Jesús do cangocóor` júu^ fí' quini` jaléng' dsea` góor` i líng' dsea` fariseo jalé' e cangár- do. ⁴⁷ Jo mí' caliñi' i dsea` fariseo do e jo, joba' casíiñ- cóo'~ jaléng' fii~ jmidsea` e laco' niseáng' i dseata` i quie' nifi' quía'- dsea` Israel e laco' nisíiñ- e~ nijmér- cóo'~ Jesús. Jo lalab jmíng' rúíiñ':

-¿E~ nijmó^oo' cóo'~ i dseañu' do? Co' eáam' jmiguíu' jalé' e quí'r~ jmí' jmóor` e dsigá` dsí' dsea`. ⁴⁸ Jo song ja` nijníng~naa' quía'r-, joba' fíim' dsea` nidsitáaiñ- cóo'~ dsea` do, jo dseáam' e dseata` i neáng' fí' Roma nija'íiñ- guá'- quí' ii' osi lajaléng'naa' dsea` lí'naa' dsea` Israel fíng song caliñir' jalé' e jo.

⁴⁹ Jo jaang` lajee` i fii~ jmidsea` do nisiir` Caifás, jo líiñ' fii~ quía'- jaléng' jmidsea` ie~ jo, joba' lalab cajíiñ'- casí'r- jaléng' i dsea` rúíiñ' caguaang-gui do jo café'r':

-iDseáng'- jíi'~ cóo' ja` ee` ní' 'ná'! ⁵⁰ Jo ja` í' óo'na' e guíá-gui quí-ii' e nijúung- jaang` dsea` góo'naa' cuaiñ~ quí-ii' lajalé'naa' e laco'gui e ní'íng-naa' lajaléng'naa' dsea` lí'naa' dsea` Israel.

⁵¹ Jo i Caifás do ja` cajíiñ'- lajo uíi' e la tiiñ' 'ñia'r', dsu' fii~ jmidseab` líiñ' ie~ jo, joba' Fidiéeb` cacuø' ír` e cajíiñ'- lajo e Jesús nijúuiñ- cuaiñ~ quía'- jaléng' dsea` góor` dsea` Israel; ⁵² jo o' jíi'~ e nijúung- dsea` do uii~ quía'- jaléng' dsea` góor`, co' lajob cajo nijúuiñ- e laco' nitó'r' jaléng' dsea` quía'- Fidiée` i siguíáng'^ fí' la'úng- fí' jmígüi' e laco' ni'uíiñ'- do cóob` 'lé' lajee` lajaléiñ'. ⁵³ Joba' latí'

ie~ jòb canaang` jaléng` ì dseata~ quiá'- dsea` Israel do e 'nó'r' jial e nijngáin~ Jesús.

54 Jò uing~ lajòba' jò 'ga' li~ jmijnéeng`gui 'ña' Jesús jee~ jaléng` dsea` góor` dsea` Israel, jò cagüi`h`bre e fí' lamí~ táaiñ` do e li~ se' Judea, jò fí' dob cangór~ fí' còo` fii` e sii` Efraín e née' quiá'- fí' guóo'~ uó^ quiú', jò fí' jòb cajer' còo'~ jaléng` dsea` quiá'r~.

55 Jò mi~ cangîgui lajò, lajee` e nijaquiéeng` jmi~ e quiá'- tîng` dsea` Israel e jmóor` lacoó` jii` e sii` Pascua, jòba' quiá'- tîiñ` e dsilíiñ` fí' Jerusalén ná'-gui e jmi~ jò e laco' jmiguiúng~ yaaiñ` fí' quini` Fidié` jò dsiguiar~ guiú' lajii'~ e quiá'- tîiñ` jmóor` do.

56 Jò mi~ caguilíng` ì dsea` Israel do fí' Jerusalén, jò seem`biñ' do ngír' ta~ 'náng' Jesús ie~ jò, jògui jmingí'~ rúin~ lajaang` lajaaiñ` lajee` e teáaiñ'~ fí' dsí' sinúu^ guá'- fé' e sí' fí' jò, jò síiñ`:

—Jò ¿e` fól' 'ná'? ¿Su nijáa'gui ì dsea` î fí' la lajee` jmi~` osi ja` nijáar` é?

57 Jò jaléng` dsea` Israel ì líng` dsea` fariseo còo'~gui jaléng` fii~ jmidsea` quiá'r` nicangíiñ` júu^ quiá'- jaléng` ì dsea` ì caguilíng` e jmi~ do e song jaang` lajee` ír` nija'r` júu^ jie~ fí' táang` Jesús, jò e güijmée`bre júu^ ladsifí', jò lajòba' e niteng`^ dsea` do.

12

*Mí' ca'éé` jaang` dseamí` jmi~` jmeafí` tî~ Jesús
(Mt. 26:6-13; Mr. 14:3-9)*

1 Jò mi~ cangîgui lajò, jñúu~ jmi~b~ jmóo`gui e nití' e jmi~ Pascua quiá'- dsea` Israel do, jò cangób` tu Jesús fí' Betania e cango'ee`tur Lázaro ì

cajméer` e cají'tu ie~ lamí~ jéeng'gui do. ² Jo mi~ tí lí caguiér- fí' quíá'- dsea` do, i dsea` seeng' fí' sinúú^ do cajméer` coo` jmí~ e jmí'gór` Jesús, joba' cagó'r` colíng~ ie~ canuu` e jmí~ jo; jo dob guing~ Lázaro e gø'r` colíng~ cóo' i dsea` do cajo, jogui i rúíñ' i sii` Marta do, íb` i jmóo` ta` ngíng` jmiñí' quíá'- jaléng' i dsea` i neáang' gø' do ie~ jo. ³ Jo lajee` guing~ Jesús gø'r', coo` caguiéb- Yá^ i rúng' Lázaro fí' lí guing~ dsea` do, jo quier' coo` dsuu- niguó'^ e a trescientos gramos jmí~ jmeafí~ e lí' cóo'~ layaang~ nardo e 'mo'^ eáang', jo cóo'~ e job ca'éer- fí' tí- Jesús lajee` e guing~ dsea` do gø'r'; jo mi~ cangí jo, cajmiquiú'r- cóo'~ jñuguir~. Jo latøøm- e fí' dsí' sinúú^ do cajó- jmeá' quíá'- e jmí~ jmeafí~ do ie~ jo. ⁴ Jo mi~ cangoyúung' e jo, jaang' lajee` dsea` guitúung` quíá'- Jesús i sii` Judas Iscariote i nisi'í^ i ni'níng- dsea` do, lalab cajíng'- í ie~ jo:

⁵ —¿Jialí' ja` mí' cango'ní~ e jmí~ jmeafí~ la cóo'~ 'ní' ciento cutee` e laco' nilísea` cuu- e nilicóo'~ jaléng' dsea` tíñíng-?

⁶ Jo cajíng'- Judas Iscariote e jo dsu' o' já'- dseáng'- e fí~ lííñ- jaléng' dsea` tíñíng-, co' jaang' íb` lííñ' do, co' ie~ jo íbre dsea` néé' nir~ taloo` téé'~ cuu- e lí' quíá'- Jesús colíng~gui cóo'~ i dsea` guitúung` quíá'- do; joba' i Judas Iscariote do guíbre e cuu- do mi~ iíñ~ 'ñia'r'. ⁷ Joba' lalab cañí' Jesús quíá'- i dsea` í:

—Ja` e fí' jíí'~ coo` i dseamí na, co' lajíí'~ e nicajméer` na e nicaguiar' guíá' quíé'-e mi~ nití- í' e quíá'- níám-baa. ⁸ Jo contøøm- cuóøng` lí jmicóo'~ 'nú' jaléng' dsea` tíñíng-, jo dsu' jnea~gui ja` contøøng- táan'n cóo'~ 'nú' fí' jmígúí la.

Mi~ ca'í dsú' dsea` e nijngáin~ i Lázaro do

⁹ Jo mi~ cangf̂gujiu lajo, i f̂im' dsea` Israel caliñir e dobi táang` Jesús e fí Betania do. Joba' cangolíin~ cangoĵo`bre fí jo, jo dsu' o' ĵi~ Jesús dseáng~ i ngir' 'náiñ' do, co' lajob 'náiñ' Lázaro cajo i cajmée` Jesús e cají'tu calé' catú-. ¹⁰ Joba' i fii~ jmidsea` do casíin~ r̂o` e la quie' tí Lázaro nijngáin~, ¹¹ co' fé' i dsea` Israel i quie' nifí do e uíi~ íb' f̂ing' i dsea` góor` do ninaang` 'naaiñ' cóo~ i dsea` rúin~ caguaang~gui do, jo cóo~ Jesús ninaaiñ` dsitáin~.

Mi~ ca'í- Jesús fí jee~ f̂i Jerusalén

(Mt. 21:1-11; Mr. 11:1-11; Lc. 19:28-40)

¹² Jo lajee` nú'-gui jmi~ Pascua e tí fí Jerusalén do, f̂im' dsea` cangolíin~ fí jo e cangotíin~ e jmi~ do; jo mi~ cajneá- co'gui jmi~, job caliñi' dsea` e tí niguiée' Jesús fí Jerusalén e quía'- e jmi~ do. ¹³ Jo mi~ caliñi' i dsea` do e jo, joba' cangoquiúur~ moo` quiee-, jo cangolíin~ cango'íin~ Jesús catí caluu' f̂i e quía'- nijmiféin~ dsea` do. Jo mi~ ca'ín' dsea` do, lalab fé'r` teá e íang` dsíir':

—iMajmifém'baa' i dsea` na! jJogu' juguiá~jiu quía'- i dsea` na i casíing` Fidiée' fí ĵm̂ĝu' la cuaiñ~ quía'r~! jJogu' majmifém'baa'r cajo i dsea` na i líng' dsea` güeang~ i quie' nifí quía'- jaléng' dsea` góo'naa' dsea` Israel!

¹⁴ Jo lajee` iuung~ Jesús fí, lado cadséin~ jaang` bú^, jo íb' caguár lí^ lacogui la fé' fí ni~ ĵi quía'- Fidiée' e cajme' dsea` malí~gui eáang` lí fé' lala:

¹⁵ Ja' f̂oong~na' jaléng' 'nú' i seeng' fí f̂i Sión; jo ĵo-na', lab nijáa' i dseata~ dsea` féng' quí-na' e guin~ fí mocóo~ jaang` bú^ jiuung~.

16 Jo dsu' la'uui~ ja` calilí'^b; i dsea` guitúung` quiá'r- do e` guóng` jalé` e do; lí'^ mi~ cangá'gui lajo, mi~ cangá' e cangáng'-tu Jesús fí' ñifí', jogu;ib calilí'^ i dsea` do e jalé` e cajmée` Jesús do ninitóob` fí' ni~ jì quiá'- Fidiée` e cajme' dsea` lajii~ malii~ gui eáang' lí' fé' uii~ quiá'- Jesús.

17 Jo ie~ jo, jaléng` i dsea` i cangá- mi~ cató'- Jesús i Lázaro do e nigüi'íiñ' do fí' dsí' ée` quiá'r- co' cajib'tur, joba' jaléng` i dsea` íb` i cani' e júu^ jo jee~ jaléng` i dsea` caguiaang- gui do. 18 Jo lajob i fíim' dsea` cangolíñ^ e cangojmijíñ' Jesús, co' caliñí'bre jalé` e quíi~ dsea` do jmii~ e cajméer` e fí' do ie~ jo. 19 Jo i dsea` Israel i líng' dsea` fariseo do lalab síiñ` la'ó'` yaaiñ`:

—Nab nimóo- 'nú', jii~ coo` ja` e quíi~naa' jmii~ nijmó'oo' lana, co' jnéeng- ne'baa' e jia' ja' lajiiim' dsea` nisitáaiñ^ cóo' i Jesús na lana.

Mi~ ca'nang'- dsea` griego Jesús

20 Jo jee~ jaléng` i dsea` i cangolíng` fí' Jerusalén e cangojmiféiñ' Fidiée` lajee` e jmii~ jo, jee~ i dsea` íb` niquiéeng` coo` tú- máng'~ dsea` griego. 21 Jo i dsea` griego do cangoquíeeiñ' fí' lí' sing' jaang` dsea` guitúung` quiá'- Jesús i sii' Lii~, jo í seeiñ' fí' Betsaida e néé' lí' se' Galilea, jogu; i dsea` griego do camí'r' jmi'ee` i Lii~ do jo casí' reiñ':

—Dsíng'- ii~ jnea'^ e nilicuíng'naa' Jesús.

22 Joba' dsifí' mi~ canúu- Lii~ e jo, cangó-bre cangosí'r` Df` i líng' jaang'gui dsea` guitúung` rúíñ' cajó, joba' laj; huáam-bre cangolíñ^ e cangojmée'r` júu^ Jesús lajii~ e jíng'- i dsea` griego do.

23 Joba' lalab cañí' Jesús quiáíñ'- do:

—Lana tí nití- í' quié-e e ninín'^túu fí ñiff- fí lí cagá-a mi~ cagüén-n fí la e lán'n jaang` dsea` jmigüí. ²⁴ Jogui jnea~ jmitaa` óó'na' e fa' camí'^ micui'iee` e ja` mí' cató'^ fí ni~ uó^ jo o'gui ní'~ cajo, joba' lami~ líb' lí' e camíb'^ e mijú` do; jo dsu' song camí'^gui e micui'iee` do catób'^ fí ni~ uó^ jogui caníb'^, joba' jmiguiab' ni'uíng'- do mi~ niró. ²⁵ Cofa' i dsea` i eáang'gui guing~ dsí' jalé' e dsijéé' fí jmigüí' la, joba' ni'ím- quiá'- i dsea` í mi~ tí lí jo; jo dsu' i dsea` i ja` guing~ dsí' jalé' e dsijéé' fí jmigüí' la, joba' i dsea` í guíab- ni'uíng- quiá'r- mi~ tí lí jo, co' cøøm` niliseeíñ` cío' Fidiéé` lata. ²⁶ Jogui song jaang` dsea` iíñ~ e nilíñ- jaang` dsea` i jmóo' lajúí' e iin~n, joba' 'né- ngr- colím~ cío' jneab~; jogui lacaang` jié' fí lí seen~, joba' fí job 'né- seeíñ` cío' jnea~ cajo. Jo song seeng` dsea` i jmóo' lajúí' e iin~n, joba' Tiquié'e dsea` guing~ ñiff- nijmi'gó'bre i dsea` í cajo.

Mi~ cajíng'-tu Jesús e nijngáng'- dsea` ír`

²⁷ Jo fá'guí lana e dseáng'- dsíng'- nijáa' fí'í quié-e; jo ¿e~ nijmee~e? ¿Su nifá'á: “Teaa~, leaang- jnea~ jee~ jalé' iihuí' e nidsingún-n do”? U~, o' lajo, co' jnea~ cagá-a fí jmigüí' la e lí' laco' nidsingún-n jalé' e jo. ²⁸ Joba' fí i 'nua', Teaa~, jmee- e laco' nijmi'gó' dsea` 'nua'.

Jo dsifí mi~ cangí e cajíng'- Jesús lajo, joba' guicaná' coo' luu~ fí yá'^ jmigüí', jo guicajíng'- lala:

—Nícajmé-baa lajo, jo dsu' tí lí~ nijmee~baa calé' catú'.

²⁹ Jo jaléng' i dsea` i teáang- núu` do ie~ jo cajíñ'- e líng~ ee` guicangoo` fí yá'^ jmigüí'; dsu' i líng~ gui i dsea` do fé'r`:

—Jaang` ángel ì niguicafé` na.

³⁰ Jò mi` cangf` jò, jò cañí` Jesús quiá` ì dsea` do jò cajíñ`:

—Ja` catíng` jnea` e guicajíng` e luu` do, co` 'náb` dsea` catíng`-na` e jò. ³¹ Jò lanab catí` í` e Fidiéé` niquidsir` í` quiá`- jaléng` dsea` jmígüí` uii` quiá`- jalé` dsee` quiá`r`, jògui lanab cajo catí` í` e ni`íng`- bí` quiá`- fii` ì 'líng`^ ì quiá` ta` fí` jmígüí` la. ³² Jò dsu` mi` ningf` e niteáng`- dsea` jnea` fí` dse` crúu` e laco` nijúun`-n, jò lajoba` nitóø`ø` jaléng` dsea` e laco` ni`uíñ`- dsea` quié`-e.

³³ Jò cajíng`- Jesús lana co` niñí`bre guiá`- jial nijnga`- dsea` quiá`r`. ³⁴ Jò mi` tí` lí` canúu`- jaléng` dsea` ì teáng`- do ie` jò e júu` quiá`- Jesús do, jòba` lalab cañír` quiá`- dsea` do:

—Níneb` jnea`^ røø` e tóø` fí` ni` jì` quiá`- Fidiéé` e latab` niliseeng`- Dsea` Jmáang`-, jòba` `zjalí` fó` 'nu` e ì dsea` ì jáa` fí` ñíff`- e líiñ` jaang` dsea` jmígüí` 'né`- nisáiñ` fí` yú`^ mi` nijnga`- dsea` quiá`r`? Jògui `zì` ì dsea` ì julí` na?

³⁵ Jòba` lalab cañí` Jesús quiá`- ì dsea` do:

—Jnea`-bí` e jì` e jneá` jee` 'nú` lajee` lana, jò dsu` jò` huøø`- e líng`guí` lajò jee` 'nú` fí` la. Jòba` jmi`úum`ba` e seem`ba` guiá`- lajee` e seem`-bí` jee` 'nú` fí` la e laco` ja` nilí` e lí` nuu` do 'nú`. Dsaco` jaléng` dsea` ì seeng` e fí` lí` nuu`, jòba` jjí`- ja` ñír` jie` fí` lí` seeíñ`. ³⁶ Jòba` jáang`- yaang`-na` e fí` lí` jneá` jì` do lajee` e seem`-bí` jee` 'nú` e laco` qui`- jmí` e niliseeng`-na` contøøng`- fí` lí` jneá` jì`.

Jò mi` tí` lí` cangf` e cajíng`- Jesús jalé` e júu` na, jòba` cangó`-bre, jò ca`náam`- `ñia`r` jee` ì dsea` do.

Jialí` ja` já`- líng` dsea` Israel júu` quiá`- Jesús

37 Jo ie~ jo, ja` e líí e Jesús cajméer` jalé` e lí` laniing` e quíí`r` jmíí` fí` quini` jaléng` dsea` góor` dsea` Israel, jo dsu` ja` já`- líím`bi` i` dsea` do júu` quiá`- Jesús; 38 jo lajoba` e caliti` e cajme` Saíí`, jaang` dsea` i` café` cuaiñ` quiá`- Fidiéé` malíí`gui eáang` ie~ lami~ cajíí`- lala:

Fíí`naa', ¿i` i` já`- nicalíng`- júu` quií`- e guía`naa'?

Jogui ¿i` i` nicalíí` jial tíí` 'gøñ', Fíí`naa' Fidiéé`?

39 Jo lajob jaléng` dsea` do jíí`- ja` lí`r` ningáíí`, co` lalab cajme`gui Saíí` cajo` fí` ni` jì` quiá`- Fidiéé` lí` fé` lala:

Jnea~ Fidiéé` jo fá`a e júu` la:

40 Nícajn`baa` jminir` jogui` nícajn`baa` moguir` cajo`

e laco` ja` cuóøng` niliñir` júu` quié`- e

o`gui` cuóøng` e ningáíí` jial líí` cajo`;

jo lajoba` ja` niquí`- jíng` yaaiñ` fí` quinií`-,

jogui lajobi` jnea~ ja` nijmi`leáan`-nre cajo`.

41 Jo cajíng`- Saíí` lana, co` nícan`gá`-bre jial tíí` laniing` 'gøng` Jesús, joba` fé`r` uii` quiá`- dsea` do.

42 Jo nañí` fa` cajím`- i` yúu` Saíí` do e júu` jo, dsu` fíím` dsea` Israel já`- calííñ`- júu` quiá`- Jesús ie~ jo, jogui` fíím` dseata` dsea` Israel i` laniing`- já`- calííñ`- júu` quiá`- dsea` do ie~ jo cajo`. Jo dsu` ja` fé`r` lajo` fí` quini` jaléng` dsea` jíéng`, co` 'gøm`-bre jaléng` dsea` Israel i` líng` dsea` fariseo e ni`uóng`-neiñ` fí` dsíí` sínúu` guá`- quiá`r`, 43 co` eáang`gui` iíñ` e dsea` jmígüí`bing` nijmi`gó` ír` laco`gui` e nijmé`- 'ñia` Fidiéé` lajo` cóo`r`.

Jial dseáng`- 'né`- nijmi`gó` dsea` júu` quiá`- Jesús

44 Jo mi~ cangí`gui` lajo`, lalab cajíng`- Jesús cóo`- júu` teá`:

—Jaléng^h dseá^h i já^h línng^h júu^h quié^h e, joba^h i dseá^h í o^h jii^h júu^h quié^h e já^h lín^h, co^h lajob já^h lín^h júu^h quiá^h Tiquí^h Fidié^h cajo, dseá^h i casíng^h jnea^h fí jmigü^h la. ⁴⁵ Jo doñí^h i dseá^h i níng^h jnea^h, joba^h níim^h bre cajo i dseá^h i casíng^h jnea^h fí jmigü^h la. ⁴⁶ Jo jneab^h dseá^h lín^h e j^h do, jo cagá^h a fí jmigü^h la e lí^h laco^h jaléng^h dseá^h i já^h línng^h júu^h quié^h e ja niliseeí^h fí lí^h nua^h. ⁴⁷ Jo i dseá^h i lico^h núu^h jalé^h júu^h quié^h e jo dsu^h ja jmóor^h nua^h r^h jalé^h e jo, joba^h o^h jnea^h dseá^h niquidsii^h í^h quiá^h i dseá^h í. Co^h ja cagá^h jnea^h fí jmigü^h la e laco^h niquidsii^h í^h quiá^h jaléng^h dseá^h, co^h jnea^h cagá^h a e lí^h laco^h nilaan^h re jee^h jalé^h dsee^h quiá^h bre. ⁴⁸ Jo jaléng^h i dseá^h i ja jii^h jnea^h o^h gui já^h lín^h júu^h quié^h e, joba^h i dseá^h í niseem^h bing^h i ní^h í^h quiá^h r^h quiá^h jalé^h e dsee^h e nica^h éer^h do; co^h cóo^h jalé^h e júu^h e nica^h fá^h a na, cóo^h jii^h job nitidsi^h í^h quiá^h r^h mí^h tí^h lí^h jo. ⁴⁹ Co^h jnea^h ja fá^h a la ñii^h 'ñiá^h a, dsuco^h Tiquí^h i casíng^h jnea^h fí jmigü^h la, íb^h i nica^h quia^h ta^h quié^h e lajii^h e 'né^h e nifá^h a. ⁵⁰ Jo lajob niñi^h jnea^h, e jaléb^h ta^h e quia^h Tiquié^h e do cuø^h e liseeng^h dseá^h cøøng^h cóo^h Fidié^h lata^h. Joba^h lajob lí^h, jaléb^h e fá^h jnea^h dseáng^h fá^h a jii^h laco^h ta^h ca^h íin^h n quiá^h Tiquí^h ii^h.

13

Mi^h caru^h Jesús tñ^h dseá^h guitúung^h quiá^h r^h

¹ Jo mí^h cang^h gui lajo, lajee^h e guati^h ló^h jmí^h Pascua e qui^h t^hng^h dseá^h Israel jmóor^h fí Jerusalén, jo ie^h jo niñib^h Jesús e nica^h t^hb^h í^h quiá^h r^h e nitúr^h fí jmigü^h la jo nidséi^h nidsigüeá^h tur cóo^h Tiquí^h ii^h fí ñifí^h. Jo lajee^h cateáai^h fí jmigü^h la, eám^h cajmi^h neáai^h jaléng^h dseá^h i ca^h uíng^h dseá^h quiá^h r^h,

jo lajob cajméer` cartí cangáng` tur fí ñíff`. 2-3 Jo ie` jo, tí lí` ni`íb` fii` i` 'ling`^ fí` dsí` Judas, jóo` jaang` dseañu` i` sii` Simón Iscariote, jo i` fii` i` 'ling`^ do cajméer` e ca`í` dsí` i` Judas do e ni`ñíñ` Jesús fí` quini` jaléng` dsea` i` quie` nifí` quia`- dsea` Israel. Jo Jesús niñi`bre guiá` e fí` lí` guing` Fidié` jáar` mi` cagüéiñ` fí` jmigüi` la, jogui` e fí` job nidséng` tur mi` nití` í` quia`r`. Jo i` Tiquí`ii` dob i` nicacuø` ír` fí` e néé` nir` lajalé`. 4 Jo ie` job cagø` Jesús í` canu` cóo` dsea` guitúung` quia`r`, jo lajee` e neáaiñ` gø`r` dob mi` caráaiñ` e fí` lí` guiiñ` do jo caguir` e si`r` e quier` lí` lí` ni~, jogui` ca`ñá`r` coo` jmáang` 'mi` fí` 'ñúíñ'. 5 Jo mi` cang` jo, caguié`r` jmí` fí` dsí` coo` úu` e ja` a` eáang`, jo cóo` e job canaaiñ` ru`r` tii` lajaang` lajaang` i` dsea` guitúung` quia`r` do, jo mi` calí` jo, cajmiquiá`r` cóo` e 'mi` e ca`ñá`r` tu`r` do.

6 Jo mi` tí` lí` catíng` Tú` Simón e nijgíi` tír` e nirú`- Jesús, joba` lalab cañi`r` quia`- dsea` do:

—Fíi`, ja` catíng` 'nu` e nirúu` tíi`.

7 Jo lalab cañi` Jesús quia`- dsea` do:

—Ja` mi` ngáng` 'nu` lana e` guøng` lajii` e jmóo` la, jo dsu` lajee` lab ningán`.

8 Jo cañi`tu` Tú` Simón quia`- Jesús jo cas`r` dsea` do:

—i`Dseáng` ja` cuø`baa fí` e 'nu` nirúu` tíi`!

Joba` lalab cañi`tu` Jesús quia`- dsea` do:

—Lí`^ jii` e laba` líí, e song ja` nirúu`u` tii~, joba` ja` quí`- jmí` jóng e líng`guí` dsea` quie`-e.

9 Joba` cañi`tu` Tú` Simón quia`- dsea` do jo ca`jiñ`-:

—Jo song lajob nilí` Fíi`, joba` guiá`-gui` e nirúu`-ba` la quie` guóo` cóo`-gui` moguii` cajo.

10 Jo dsu' lalab cañí'tu Jesús quiá'- Tâ^ Simón jo cajíñ'-:

—Doñí' iì dsea` i lalí- calá'-, joba' ja` 'né- lá'-tur ladsifí lado, jo jíí'~ tii-bre 'né- nirú'-tur co' sijgím^bre latøøíñ-. Jogui 'nú' lím'ba' dsea` sijgíng^, nañí fa' ja` lajaléng'na' líng'na' lajo.

11 Jo cajíng'- Jesús lana e ja` lajüing` i dsea` do líiñ` dsea` sijgíng^, co' niñi'bre guiá- i` i dsea` i ni'níng- ír' fí' quini` dsea` i quie' nifí' quiá'- dsea` Israel.

12 Jo mi` tí' lí~ cató' e ru' Jesús tii- jaléng' i dsea` guitúung` do quiá'r-, joba' caquib'-tur e sí'r^ do, jogui caguáb'tur e fí' lí~ guiiñ` gø'r' do, jo mifíng` cajíñ'- lala:

—¿Su ñí' 'nú' e~ guóng' jalé' e nicajmé- e quíi- na' na? 13 Co' 'nú' ca'íng'na' jnea` e lín'n Fíi'na' jogui e lín'n Tifa' quíi- na', jo e jáb'-, lajob líí, co' lajob dseáng'- lín'n. 14 Jo co' jnea~, dsea` lín'n Tifa' jogui Fii~ quíi- na', nicarúu'baa tii-na' lajaang` lajaang'na', joba' lajob cajo 'né- jmée^ 'nú', 'né- rúu'ba' tii- dsea` rúng'na'. 15 Jo jnea~ nica'ée- baa 'nú' jial 'né- nijmee- na' e laco' 'nú' nijmee- na' røøb` laco'gui jíí'~ e nicajmé- jnea~. 16 Jo e laba' jmitaa^ óó'na', e jíí'~ jaang` dsea` 'léeng'~ niing- guir laco' fiir~, jogui e jíí'~ jaang` dsea` i ngí' ta~ quie' júu^ niing- guir laco'gui i dsea` i casíng' ír` do. 17 Jo song ngám'ba' jalé' e júu^ na jogui jmití'bi' e íáng` óó'na' cajo, joba' juguiáb- niliseeng'na' jóng.

18 'Jo dsu' e fá'a na ja` catíng- 'nú' lajüing'na'; co' ñi'baa guiá- i~ jaléng' i nicaguín' n. Dsu' dseáng'- 'né- litib~ jíí'~ laco' fé' fí' ni` jì quiá'- Fidiée~ e ca- jme' dsea` malii~ gui eáang' lí~ fé' lala: “Jaang` lajee~ dsea` i gø' colíng~ cóo'baa lana, ni'ní' ním- bre

jnea~." 19 Jo fíi~i 'nú' e júu^ na lana e lí^ laco' niñí'ba' jéeng' mi~ tí' lí~ nidsijée' jalé' e jo. Jo mi~ tí' lí~ nilí' lajo, joba' jáb'~ nilíng'na' jóng e jneab~ dseáng'~ lín'n jii'~ laco' fá'a e lín'n. 20 Jogui e laba' jmitaa^ óó'na', e doñí' ii` dsea` i ni'íng'` i dsea` i sñn~n do, joba' ím'bre jnea~ cajo; jogui doñí' ii` dsea` i íng'` jnea~, joba' ím'bre i dsea` i casíng` jnea~ fí' jmiçúí^ la cajo.

Mi~ cajíng'~ Jesús e Judas Iscariotebing' i ni'níng'~ ír`

(Mt. 26:20-25; Mr. 14:17-21; Lc. 22:21-23)

21 Jo mi~ cangí e cajíng'~ Jesús lajo, joba' dseáng'~ eáam' fí'í^ calíñ~, jo cajíng'~ casí'r~ i dsea` guitúung` quiá'r~ do jo casí'~reiñ':

—E laba' jmitaa^ óó'na', e jaang` lajee~ la'ó' 'nú'bing' i ni'níng~ jnea~ fí' quini~ i dsea` quie' nifí' quiá'~ dsea` góo'naa' dsea` Israel.

22 Jo mi~ canúu~ i dsea` guitúung` do e júu^ jo, jo lico' cajóøng~ rúm'bre, jo dsu'ja' calilí'r^ i~ dseáng'~ i éeng` Jesús do. 23 Jo jaang` lajee~ i dsea` guitúung` i iing~ Jesús eáang` do dseáng'~ cáam` dsea` do guiiñ~, jo lajoba' cuóøm` síiñ` cóo'~ dsea` do lajee~ e neáaiñ' gø'r'. 24 Jo co' huím~bigui guíing~ Tú^ Simón, joba' cajméer` lí~ cóo'~ guóor` quiá'~ i dsea` i guíing~ cáang` Jesús do e laco' dsea` í nijmingí'r~ dsea` do i~ lajee~ ír i éeng` Jesús do. 25 Jo i dsea` i guíing~ cáang` Jesús do cangoquíeeiñ' quiá'~ gui laco' guíing~ dsea` do, jo lalab cajmingí'r~ dsea` do:

—Fí'í, çí~ i dsea` i julí na?

26 Joba' lalab cañí' Jesús quiá'~ dsea` do:

—Lana nijmi'leaa~ coo` 'ná'^jiu iñí', jo ii` i dsea` i nicuóø^ø e jo, íb` i fá'a na.

Jō dsifí' mi~ café' Jesús e júu^ jō, jōba' ca-
 jmi'leá'bre e iñí'^ do, jō i Judas i líng' jōo' Simón
 Iscariote, íb' i cacuø'r' e jō. ²⁷ Jō dsifí' mi~ ca'íng' i
 Judas do e iñí'^ do, jōba' dsifí' lajōb ca'í' fii i 'líng'^
 i sii` Satanás fí' dsír'. Jōba' lalab casí' Jesús ír`:

—Lajúí'~ e nica'í' o' e nijmée'^, jōba' jmeeb`
 lajminá`.

²⁸ Jō mi~ canúu` i dsea` i caguaiang`gui do lajúí'~ e
 cajíng' Jesús do, ja` cangáin' jiali' cajíng' dsea` do
 lajō. ²⁹ Jō co' ie~ jō i Judas Iscariote do líiñ' dsea`
 i si'má'^ cuu` quiá' Jesús cóo'~gui quiá' i dsea`
 guitúung` quiá'r', jōba' i líng' i dsea` do ca'í' dsír'
 e Jesús sí'r' i Judas do e líng' ee` nidsileáa' dsea`
 do quiá' e ni'nér` lajiiñ` lajee` jmii` osi quiá' e
 nicuø'r` jaléng' dsea` tiñíng` é.

³⁰ Jō dsifí' mi~ ca'íng' Judas Iscariote e iñí'^ do,
 jōba' cagüi'í'bre e fí' lí' neáaiñ' do. Jō nicanuub`.

Júu^ laniing` quiá' Dsea` Jmáang`

³¹ Jō mi~ tí' lí' cangí' e cagüi'í' i Judas Iscariote do,
 jōba' lalab casí' Jesús i dsea` quiá'r` i caje'gui do:

—Jō lanab nicalilí'^ 'nú' jial tí' niguo'^ líng'
 Fidiée` mi~ calilí~ jial tí' niguo'^ líng' jnea~, dsea`
 cagá'a fí' ñifí~ jō cagüén`n fí' jmigüi' la e lín'n
 jaang` dsea` jmigüi'. ³² Jō song lajōb líí', e jnea~ dsea`
 cagüén`n fí' jmigüi' la lín'n jaang` dsea` jmigüi'
 e ni'ée'e 'nú' jial tí' niguo'^ líng' Fidiée`, jōba'
 Fidiée` lajōb nijmér` cóo'~ jnea~ cajo, jō lajee`
 tab~ nijmér` lajō. ³³ Jōgui 'nú', dsea` líng'na'
 jōo'o, e laba' fíi i 'nú' e jō` huøø` táang`guí cóo'~
 'nú' fí' la. Jōgui 'nú' ni'nam'^ba' jnea~ jō dsu' jō`
 niguiéng'na' jnea~; cō lí'^ laco'gui jíí' e nica'í' i
 dsea` Israel caguaiang`gui ie~ lamí~ jéeng'gui do, jō

lajob fíi i 'nú' lana cajo e ja`cuóøng` nigüiling`na' fí li` niníng`^ jnea~. ³⁴ Jo uing` e joba' e nicuóø`ø` 'nú' e júu` laniing` la e ja` mí cafíi i 'nú' lamí` jéeng`gui, jo e lab e jo: jmi'neáang`na' dsea` rúng`na'. Jo lí`^ laco' la 'neáang` jnea` 'nú', lajob dseáng`- 'né` jmi'neáang`na' dsea` rúng`na' cajo. ³⁵ Jo song lajob jmoo`na' e dseáng`- jmi'neáang`na' dsea` rúng`na', joba' lajim` dsea` nilíli`r` jóng e dseáng`- dsea` quié`-baa líng`na' song jmoo`ba' lajo.

Mi` cajmée` Jesús júu` e nijíng`- Tú` Simón e ja` cuíñ` dsea` do

(Mt. 26:31-35; Mr. 14:27-31; Lc. 22:31-34)

³⁶ Jo mi` canúu` Tú` Simón lajii` e cajíng`- Jesús do, joba' cajming`r` dsea` do lala jo cajíñ`-:

—Fíi, ¿jie` fí li` niguó`^?

Joba' cañíi` Jesús quiá`- dsea` do jo casí`-reiñ`:

—Ja` cuóøng` niguøng`^ 'nu` lana e fí li` ninín`^n, jo dsu` mi` nilicøøng`guiji` lajo, joguiba' e nicuóøng` guøñ`^ jóng.

³⁷ Joba' lalab cañíi` Tú` Simón quiá`- Jesús jo casí`r` dsea` do:

—Fíi, ¿jali` ja` cuóøng` e ninín`^n cóo`~ 'nu` lana? ¿Co' guiab` dsii` e nijáang`~ 'ñiá`a e nijúun` n e laco' nijmicóo`~ø` 'nu`!

³⁸ Joba' lalab cañíi` Jesús quiá`- i Tú` Simón do jo casí`-reiñ`:

—¿Su dseáng`- já`- e nijmée`^ e laco' fó` na, Tú` Simón? Co' lana jmítaa` o' e lajee` e ná`-gui e niquí`- jaang` tuidséé`^, 'nu` nifo`^ 'ní` ya` e ja` cuín` jnea`.

14

Jesús láiñ' e fí' cóo' e guilíng` dsea` fí' lí' guing` Tiquiá'r`

¹ Jo mi~ cangî e casíng` Jesús cóo' i Tú` Simón do, joba' lalab casí' guir i dsea` quiá'r` do:

—Ja` jmáang' yaang~na' fí'í' 'nú', dsea` já' nicalíng`na' júu` quiá' Fidié', jogui ja` jmitúng` óóna' cóo' júu` quié'e, co' 'né' e jáb' nilíng`na' cajo. ² Co' fí' lí' guing` Tiquié' e fí' ñifi', féb' jóo' e quiá' nigüéá` jaléng` dsea` quiá'r`; cofa' ja` lí' lajo, joba' ja` mí' cafí' i 'nú' jóng e tí' lí' ninín`n e nigu-iaa` guiá' fí' lí' nigüiní'na' cóo' jnea` fí' lí' guing` Tiquié' e faco' lajo. ³ Jo mi~ tí' lí' cangî e niguiaa` guiá' e fí' lí' nigüiní'na' do, joba' nigáab`túu` calé' catú' fí' la e laco' nitøø` 'nú' e nigüilíng`na' cóo' jnea~, jo fí' job` nidsi'ié'ee' colíng` cóo' jnea~. ⁴ Co' niñib` 'nú' jie~ fí' lí' ninín`n jogui nicuí'bi' cajo e fí' e dsijéé' fí' jo.

⁵ Jo mi~ cangî e cajíng` Jesús e júu` jo, joba' jaang` lajee` i dsea` quiá'r` do i sii` Tomás lalab cañír` quiá' dsea` do:

—Fí'í, ja` ne~ jnea'^ jie~ fí' lí' niguøng` 'nu', joba' çjial lí' e nilicuí'naa' jnang` e fí' jo?

⁶ Joba' lalab cañír` Jesús quiá' dsea` do:

—Jneab~ dsea` lán`n e fí' e laco' cuøøng` niguilíng` dsea` fí' ñifi~, jogui jneab~ dseáng` cuøøø` 'nú' e líñí'na' jalé' júu` quiá' Fidié', jogui jíi' jnea`bi` cuøøø` 'nú' cajo e seeng`na' cøøng` cóo' Fidié' lata~. Jo jíi' la'eáang` cóo' jneab~ cuøøng` e nigu-ilíng` dsea` fí' quini` Tiquí'ii' Fidié'. ⁷ Jo song` nicuíim` 'nú' guiá' jnea~ lana, joba' nilicuíim`ba'

Tiquié'e cajo; jò dsu' lati' lanab ninaang` cuíng`na' dsea` do, cò' nicañím`ba're.

⁸ Jò mi~ calí~ fé' Jesús e júu^ na, jòba' lalab cañíi' jaang`gui dsea` quiá'r~ ì siì Lii~ do jò casí'r~ dsea` do:

—Fíi'i, cuøø'~ jnea'^ fí' e nineeng~naa' Tiquí'ii' dsea` guíng~ ñiff~, jò jíi'~ jòba' mñí'naa' 'nu`.

⁹ Jòba' lalab cañíi' Jesús quiá'- ì Lii~ do jò cajíñ'~:

—Lii~, ningóob' eáang' e seen~ jee' 'nú', jò ¿su ja` mí calicuím`bi' jnea~? Dsucò' jaléng` dsea` ì níng~ jnea~, jòba' ì dsea` î nímbre Tiquié'e cajo; jòba' ¿jiali' mñí'~ jnea~ fí' e laco' nimáang`na' Tiquí'ii'? ¹⁰ Jò ¿su ja` já'~ lñn' 'nu` e jnea~ cøøm` seeng` cóo'~ Tiquí'ii' jogui e Tiquí'ii' cøøm` seeiñ` cóo'~ jnea~ cajo? Cò' jalé' e fñí' 'nú' na ja` fá'a e la tñn~ 'ñiá'a, cò' Tiquí'ii' ì seeng` cøøng` cóo'~ jnea~ do, dsea` íb' ì jmóo` lajii'~ ta~ quiá'~. ¹¹ Jò 'né~ liñí'ba' e jnea~ cøøm` seen~ cóo'~ Tiquí'ii', jogui lajòbi` ír` seeiñ` cøøng` cóo'~ jnea~ cajo, jò song ja` já'~ lñng`na' e júu^ jò, jòba' lico' já'~ güiling`na' júu^ quié~ e mi~ móo~na' jalé' e jmóo`o. ¹² Jogui e laba' jmitaa^ óo'na' cajo, e doñí' ii' ì já'~ lñng` júu^ quié~ e, jòba' nijmé~bre jalé' e quíi'~ jmñí' lñ' laco'gui jíi'~ la nicajmé~ jnea~ cajo; jò dsu' sea'ba' do e nijmér~ e niguó'gui eáang', cò' jnea~ ninín'^n e nijaa^ cóo'~ Tiquí'ii' dsea` guíng~ ñiff~. ¹³ Jò jalé' e nimñí'na' Fidié' la'eáang' cóo'~ jnea~, jòba' jneab~ nijmee~ e jalé' e jò quií~na', jò lajòba' nijmiféng' dsea` Tiquié'e Fidié' la'eáang' cóo'~ jalé' e jmóo` jnea~ do. ¹⁴ Jò doñí' eeb` cuøøng` lí jmee~ jnea~ song camñí'na' Fidié' lajò la'eáang' cóo'~ jnea~.

Mi~ cacuø' Jesús júu^ e nisíng~ Fidiée^ Jmiguí quiá'r~

15 'Jø fíi-guá 'nú' e song dseáng~ lajang^ júu^ 'neáang'na' jnea~, joba' nijmée^ba' núu^'na' júu^ quié~ e jóng. 16-17 Joba' jnea~ nimíi~i Tiquí'ii' dsea` guíiñ~ ñífi~ e nisíñ~ Jaang` i nijmicóo~ 'nú', jø e job líi' Jmiguí quiá~ Fidiée^ cóo~ e cuø' 'nú' e líñi'na' jalé' júu^ quiá~ Fidiée^ . Jø e Jmiguí do contøøm~ niliseeng` cóo~ 'nú'. Jø jaléng` dsea` i ja` mí ca'ing` jnea~, joba' ja` quí~ jmí~ fa' e ni'íñ' e Jmiguí do, cø' ja` mí cangár~ o'gui cuír` cajo; jø dsu' 'nú'gui nicuía'ba' e Jmiguí do, cø' niseem` cóo~ 'nú' lana, jogui tí lí~ nití` í' e niliseem` fí` áa'na' cajo.

18 'Jø fíi-guá 'nú' e ja` quí~ jmí~ fa' niseáan~n 'nú' e lafa' 'núng~na', cø' nigáab`túu calé` catú~ jø niliseem`túu cóo~ 'nú'. 19 Jø lajee^ lab, jaléng` dsea` i ja` cúing` jnea~ jø` niníng~ guír jnea~; jø dsu' 'nú' nimáam~tu' jnea~ jogui contøøm~ niliseeng`na' cóo~ jnea~ cajo, cø' seem` jnea~ cóo~ 'nú' lata~. 20 Jø ie~ job nilíi'na' e jnea~ cøøm` seen~ cóo~ Tiquié^e, jogui 'nú' cøøm` seeng`na' cóo~ jnea~, jogui jnea~ cøøm` seen~ cóo~ 'nú' cajo. 21 Jogui i dsea` i íng` júu^ quié~ e jogui jmóor` núu'r~ jalé' e júu^ jø, joba' i dsea` í cuø' lí~ e dseáng~ lajam'^ba' e 'neáaiñ` jnea~, jø lajob Tiquié^e nijmi'neáam`bre i dsea` i jmi'neáang` jnea~ do, jogui jnea~ ni-jmi'neáam`baa i dsea` í cajo, jogui ni'ée^baare jial dseáng~ líñ'n.

22 Joba' cañi` jaang`gui dsea` guitúung` quiá~ Dsea` Jmáang~ i sii` Judas, dsu' o' i Iscariote do, jø casí'r~ dsea` do lala:

—Fíi'i, ¿jiali' e ni'éeng` uø' fí` quini~ jnea^ jø o' fí` quini~ jaléng` dsea` i ja` líng` dsea` góo`naa'?

23 Jōba' cañí' Jesús quiá' i Judas do jō cajíñ'ˉ:

—Jaléng' dsea' i jmi'neáang` jnea~, jōba' jmóo`bre núu'r~ jalé' júu^ quiéˉe; jō Tiquié`e Fidiéé` ni-jmi'neáam`bre i dsea` í` cajo, jō lajōb Tiquié`e colíing~gui cóo'~ jnea~ cøøm` niliseeˉnaa' cóo'~ i dsea` í. 24 Jōgui i dsea` i ja` 'neáang` jnea~, jōba' ja` jmóor` núu'r~ jalé' júu^ quiéˉe. Jō jaléb' e júu^ e fá' jnea~ la, o' dseáng'ˉ júu^ quiéˉe e 'ñiá'a co' e quiá'ˉ Tiquí'baa', jō íb` dsea` i casíing` jnea~ fí' jmigüí' la.

25 'Jō fñi` i 'nú' jalé' e júu^ la lajee` e táam`bñi cóo'ˉ 'nú' fí' jmigüí' la; 26 jō dsu' mi~ ninín'^n fí' ñifi` fí' lí' guing~ Tiquié`e, jōba' dsea` íb` i nisíngˉ Jmiguí' quiá'rˉ cuaiñ~ quiéˉe e laco' nijmicóo'~ 'nú', jō lajōba' niguiéng' áa'na' jalé' e júu^ e nicafñi` i 'nú' lajee` e nicataang~naa' colíing~, jōgui nilé'ˉ 'nú' jalé' e 'né` ñí'na' cajo.

27 'Jō mi` tí' lí' nitíˉ í' e ninín'^n, jōba' nisée`e cóo'ˉ 'nú' e niliseem`ba' juguiáˉ cóo'~ Fidiéé`. Jōgui nicuøø`baa' 'nú' laco'gui la seeng` jnea~ juguiáˉ cóo'ˉ dsea` do, jō dsu' ja` nicuøøˉ e jō laco'gui la cuø' dsea` i ja` cuíng` Fidiéé`. Jōba' fñi`-guí' 'nú' e ja` jmeáang` yaang~na' fi'í' uii~ quiá'ˉ jalé' e nidsingúingˉna', o'gui føøng`na' cajo uii~ quiá'ˉ jalé' e jō. 28 Jō nicanáú`ba' e nicafñi` i 'nú' lamí~ jéeng`gui e ninín'^n fí' lí' guing~ Tiquí'ii', jō dsu' nigáab`túu jō niliseem`túu cóo'~ 'nú' calé' catúˉ. Jō faco' dseáng'ˉ já'ˉ e 'nú' 'neáang`na' jnea~, jōba' cali'íáam` óo'na' jóng mi~ cali'ñi'na' e ninín'^n fí' lí' guing~ Tiquí'ii' faco' lajō, co' í`bre dsea' niingˉguir laco'gui jnea~. 29 Jō uíing~ e jōba' e fñi` i 'nú' jalé' e la e lí' laco' mi~ nitíˉ í' e nidsijéé' jalé' e jō, jō lajōguiba' e já'ˉ nilíng`na' jalé' e júu^ quiéˉe do.

³⁰ 'Jò lana jo` 'ga' lí~ s̄ing~guí còo'~ 'nú', co' nijaquíem' i fi' i 'ling' i quiá' ta' fí' jmigüü' la, jò dsu' nañí' fa' ja' bí' óo' i fi' i 'ling' do e niquiá'r- jnea~ ta~, ³¹ dsu' lajob dseáng' nisí'í' e nidsijée' e laco' niliñí' jaléng' dsea' jmigüü' e 'neáam'baa Tiquí'ii' jogui e jmóo'ò lajú'~ ta' e nicaquiá'r' quié'baa.

Jò mi' cató' e fé' Jesús jalé' e júu' na, joba' cajíñ' casí'r- i dsea' guijáng' quiá'r- do lala:

—Ráang-na' na, jò ma'uøø- duu' la.

15

Jesús líiñ' e huñg' jó' e jlo' siní'~

¹ Jò mi' cangí'gui lajò, lalab cajíng'-gui Jesús casí'r- i dsea' guijáng' quiá'r- do:

—Jnea~ lín'n e huñg' jó' e jlo' siní'~, jogui Tiquié' e líiñ' laco' i dsea' jmáng' í' guíá' e huñg' jó' do. ² Jò song còo' guo' e huñg' jó' quié' e do ja' cuø' mí' huñg' jó', joba' niquiáb'- Fidiée' e guo' jò; jò dsu' song guíá'-bi cuø' mí' huñg' jó', joba' Fidiée' ni'ia'-bre jogui nisám-bre guo' quiá'- e laco' ni'í' jmigui'gui. ³ Jogui 'nú' lana nisiguiúm-ba' la'eáang' e nica'íng'-na' lajú'~ júu' e nica'fí' i 'nú'. ⁴ Jò güiliseem'bi' cøng' colíng' còo'~ jnea~ lí' laco'gui la seeng' jnea~ cøng' colíng' còo'~ 'nú'. Cofa' còo' guáng' quiá'- mí' huñg' jó' ja' qui'~ jmí~ ni'í' 'ñia' song si'naam' e guáng' do quiá'- e huñg' quiá'-; jò lajob lí'gui còo'~ 'nú' cajo, ja' qui'~ jmí~ nijmee-na' e guíá' song ja' seeng'na' cøng' colíng'~ còo'~ jnea~.

⁵ 'Jò fí-túu' 'nú' e jneab~ lín'n e huñg' jó' do, jogui 'nú' líng'na' guáng' quiá'- e huñg' do. Jò

doñi' ii` dsea` i seeng` cøøng` cõo`~ jnea~, jõba' jnea~
 seem`baa cøøng` cõo`~ ír` cajo, jõba' eáam` íng` ta`
 jalé` e jmóor`; cofa' ja` seeiñ` cøøng` cõo`~ jnea~,
 jõba' jji`~ cõo` e guiú`- ja` ee` quí`r`~ jmi`~ jmér` jóng.
 6 Co' i dsea`gui i litúng`- dsí' e seeiñ` cøøng` cõo`~
 jnea~, jõba' i dsea` î ni'nám`bre cõo`~ jnea~, jõba'
 ni'ím`- quiá'r`- lí`^ laco`gui mi` liqui`u` e guáng` e
 si'naang` quiá'- e huñg` jø`^ do, jõ sitím` jalé` e jõ,
 jõ niné`- fí` lí` nicób` jóng.

7 'Jogui song 'nú` ja` tú`na' e seem`ba' cøøng`
 colüñg`~ cõo`~ jnea~ jogui e teáb` teáng`~na' cõo`~
 jú`^ quié`-e cajo, jõ song lajob jmoo`na', jõba'
 mí`~na' jnea~ ee` iing`~na' jõ lajob nilí'. 8 Jogui mi`~
 'nú` eáam` íng` ta`~ jalé` e jmoo`na', jõ e jõba' cuø` lí`
 e líng`na' dseáng`- lajang`^ dsea` quié`-e, jõba' ni-
 jmiféng` dsea` Tiquié` e Fidié` dsea` guing`~ ñí`f`-.
 9 Jõ jnea~ eáam` 'neáan`n` 'nú` lí`^ laco`gui la 'neáang`
 Tiquí`ii' jnea~; jõba' fí`-i` 'nú` e güiliseem`b'i' e ñí`na'
 jial` tí' e 'neáan`n` 'nú`. 10 Jõ song 'nú` nú`~ba' jalé`
 jú`^ quié`-e, jõba' seem`ba' e 'neáam`b`i` 'nú` jóng
 lí`^ laco`gui la jmoo` jnea~ nú`~u` lajji`~ jú`^ quiá`-
 Tiquié`e, jõba' seem`baa e jmi'neáang` Tiquié`e
 jnea~.

11 'Jõ fõn`n` 'nú` lana e lí`^ laco` nili`iáang` áa`na'
 laco`gui e iáang` dsí` jnea~, jogui e dseáng`- la iéb`
 nili`iáang` óo`na' cajo lí`^ laco` catüñg`- e líng` dsea`
 quié`-e. 12 Jõgui fí`-tú` 'nú` e jú`^ quié`-e e 'né`- lití`
 do, jõ e lab e jú`^ jõ: 'né`- nijmi'neáam`ba' dsea`
 rúng`na' lí`^ laco`gui jnea~ jmi'neáan`n` 'nú` lajaang`
 lajaang`na'. 13 Jõ e jmi'neáang` dsea` rú`iñ` e lani-
 ing`-gui eáang` lí` mi` jáng` 'ñia`r` e laco` nijmicõo`r`
 dsea` seeng` røø` cõo`r` nañí` song cajú`iñ`- dsu`

uúí~ e cajméer` lajō. 14 Jō song náu~ba' jalé` júu`
 quié~e e nicafñ~i 'nú' e 'né~ jmee~na', jōba' dsea`
 seeng` røø` cóo~' jneab~ líng'na' jóng. 15 Jō lana
 jō` líng'na' dsea` i lico' jmóo` ta~ quié~e, dsuco'
 i dsea` la'í` jii~ ja` ñir' e~ uuing~ e ta~ e jmóor`
 quiá~' i fiir~ do. Dsu' lana nilíng'na' dsea` seeng`
 røø` cóo~'baa, co' nicacuøø~baa 'nú' e nicaliñí~na'
 jalé' e júu` e ca'ín~n quiá~' Tiquié~e. 16 Jōgui
 o' 'nú' dsea` caguíng'~na' jnea~ e quiee~ nifi'
 quí~na', dsuco' jneab~ dsea` nicaguín~n 'nú' e
 laco' ni'uíng~na' dsea` quié~e, jōgui nicacuøø~ø
 'nú' ta~ e nigüilíng~na' nigüijmee~na' jmang~' e
 nili'íng^ ta~ quí~na' lata~. Jō lajōba' Tiquí~i'
 Fidiéé` nicuó~bre 'nú' jalé' e nimí~na're la'eáng`
 cóo~' jnea~. 17 Jō e lab e fñ~túu 'nú' do calé' catú~ e~
 'né~ nijmee~na': nijmi'neáng'na' dsea` rúng'na'.

'Ní~níng~ dsea` Jesús cóo~'gui jaléng' dsea` quiá~r~

18 Jō fñ~guí 'nú', dsea` quié~e, e ja` güidsigá`
 óóna' e 'ní~ níng~ jaléng' dsea` jmigüi 'nú', dsu'
 güiliñí~na' guí~ e jnea~bing' la'uii~ i calí~ 'ní~
 níng~ jaléng' dsea` do. 19 Co' faco' 'nú' líng'na'
 dsea` jmigüi i ja` cúíng` jnea~, jōba' nijmi'neáam`
 jaléng' i dsea` í 'nú' jóng lí^ laco'gui la jmi'neáng`
 rúíñ' la'ó' yaaiñ~. Jō dsuco' jneab~ dsea` caguín~n
 'nú' jee~ jaléng' dsea` jmigüi i ja` cúíng` jnea~ e
 laco' ni'uíng~na' dsea` quié~e, jō uúí~ e lajōba' e
 jaléng' i dsea` í ni'ní~ níñ~ 'nú', co' 'nú' jō líng'na'
 laco' ír. 20 Jō téé` áá'na' lajii~ e nicafñ~i 'nú' do:
 "Jii~ jaang` dsea` jmóo` ta~ níng~guir laco' fiir~." Jō
 quie~na' cuente e gab` nijmeáng' dsea` jnea~, jōba'
 lajōb nijmeáng' dsea` 'nú' cajo; jōgui song ja` mí
 calinú~r~ júu` quié~e, jōba' lajōb ja` nilinú~r~ júu`

quí-na' cajo. ²¹ Jo jaléb' e ga` na nijmeáiñ' 'nú' uí' e líng'na' dsea` quié-e, jo nijmér- lajo co' ja` cuíñ' i dsea` i casíng' jnea~ fí' jmigüí' la.

²² 'Jo faco' mi~ jnea~ ja` cagüén-n fí' jmigüí' la e caga'ée-e dsea` jmigüí' júu^ quiá'- Fidiée~, joba' ja` calilí'r^ jóng e líiñ' dsea` røøng` dsee- faco' lajo; jo dsuco' lanagui nicagüém-baa fí' la e quíe- júu^ quiá'- Fidiée~, joba' jo` cuøøng` lí fé'r` náng e ja` dsee- røøiñ', co' dseáng'- lajob líiñ'. ²³ Jo jaléng' dsea` i 'ní' níng- jnea~, joba' la quíe' Tiquié'e dsea` guing~ ñifí' 'ní' níñ- cajo. ²⁴ Jo ja` dsee- røøng` dsea` jmigüí' faco' mi~ jnea~ ja` cajmé-e jee~ ír' jalé' e quí' i jmí~ e cajmé-e e jíí' jaang` dsea` jiéng' ja` quí'r~ jmí~ mi~ cajméer-. Jo ja` eé' lí' e nicangáb- jaléng' i dsea` í jalé' e quí' i jmí~ do, jo dsu' mí' 'noo'bi 'ní' níñ- jnea~ jogui 'ní' níñ- Tiquié'e cajo. ²⁵ Jo dsijéé' jalé' e na, co' dseáng'- 'néb- lití~ lajíí' laco' tóo' fí' ni~ jì quiá'- Fidiée~ e cajme' dsea` malí~ gui eáng' lí fé' lala: "Eáng' calí- 'ní' níng- dsea` jnea~ e jíí' ja` uing~ sea`."

²⁶ 'Jo dsu' mí' niguiéng'- túu fí' ñifí-, joba' nisñ-n e Jmiguí' quiá'- Tiquí'ii' Fidiée~ e sáiñ` e laco' nijmicóo' 'nú'; jo e Jmiguí' dob cajo e ní'é- 'nú' jalé' e já'- jogui e nífé' uii~ quié-e jalé' e ní e jmóo'o. ²⁷ Jogui 'nú' cajo dsea` catíng-na' e nifo'^na' uii~ quié-e fí' quini~ dsea` jmigüí', co' conrøøb` nicalisé'naa' jíí' ie~ latí' mi~ calicuíng' rú'naa' do.

16

¹ 'Jo fí' i 'nú' jalé' e júu^ la e lí'^ laco' ja` nilitúng- óo'na' e já'- líng'na' júu^ quié-e. ² Co' jaléng' dsea` góo'naa' dsea` Israel ni'uóñ- 'nú' fí' dsí' guá'-

quí-naa', jo jì'gui niguiéé' jmíi~ e doñí' ìi' dsea` ì
 nijngáng'- 'nú' níí' dsír' e lajoba' e jmitir~ ta' fí'
 quini~ Fidiéé' fing song cajméer' lajo. ³ Jo nijmér-
 jalé' e na uíi'~ e ja` mí' calicuúim`bir jnea~ o'gui mí'
 calicuúíiñ` Tiquí'ii' dsea` guuing~ ñifí' cajo. ⁴ Jo fíi'~ i
 'nú' lana e lí' laco' mí' nití' í' e nidsijéé' jalé' e jo,
 joba' niguiéng' áá'na' e nicafíi'-baa 'nú' jéeng'gui e
 nilí' lajo.

Lajíi' ta' óo' Jmiguí' quíá'- Fidiéé'

'Jo ja` mí' cafíi'~ i 'nú' jalé' e na latí' mí' uuing~,
 co' lajeé' jo táam` jnea~ cóo'~ 'nú'. ⁵ Jo dsu' lanagui
 ngóo' catí' b' í' quíé' e e ninín'`túu' fí' ñifí' e nijaa`
 cóo'~ i dsea` i casíng` jnea~ fí' jmigüí' la, jo jíi'~ jaang`
 'nú' ja` mí' cajmingíi'`na' jnea~ jie~ fí' lí' ninín'`n.
⁶ Jogui 'nú' lí' lí' jmoo`na' fí' í' b' dsu' fíi'~ i 'nú' jalé'
 e júu` na. ⁷ Jo dsu' dseáng'- jáb'- júu` e fíi'~ i 'nú'
 la, e guíá'-gui ni'uíing- quíi'`na' e niním'`baa. Co'
 fing song ja` ninín'`n, joba' ja` quí'~ jmíi' jóng e
 nigüéeng- i nijmicóo'~ 'nú' fí' jmigüí' la, jo dsu'
 mí' niguién'`n fí' ñifí', joba' jneab~ dsea` nisíi'n`n
 i nijmicóo'~ 'nú' fí' jmigüí' la. ⁸ Jo mí' nigüéeng-
 í, joguib` nijmítar~ dsíi' dsea` jmigüí' jalé' dsee-
 quíáiñi'~ jogui jial lí' e seeng` dsea` e ja` éer` dsee-
 jogui cajo jial íi' Fidiéé' í' laco' catíng-. ⁹ Jogui
 e Jmiguí' do nijmíta~ dsíi' dsea` e líng' dsea` i
 røøng` dsee- uíi'~ e ja` já'` líiñ` júu` quíé' e; ¹⁰ jogui
 e Jmiguí' do cajo nijmíta~ dsíi' dsea` e jnea~ ja`
 røøñ- dsee- co' niníng'`túu' cóo'~ Tiquí'ii' Fidiéé'
 jo jo` nimáang`gui' jnea~ fí' jmigüí' la. ¹¹ Jogui cajo
 e Jmiguí' quíá'- Fidiéé' doba' nijmíta~ dsíi' dsea`
 jmigüí' e nica'íi' b' Fidiéé' í' laco' catíng- quíá'- fíi'

i 'ling' i quiu' ta' fi' jmigüü' la, co' dseáng' latab' ni'íñ' iihuñ'.

12 'Jo jmiguiu'bi jalé' e sea` nifñ'i 'nú', dsu' ja` nifñ'i 'nú' jalé' e jo dseáng' lana e lí' laco' ja` ni'uíng' jmiguiu' qui'na'. 13 Jo dsu' mi' tí lí' nigüéeng' e Jmiguü' quiá' Fidiéé' dojee' 'nú', joba' e job e nicá' jmang' júu' já' qui'na', jogui e job cajo e ni'é'gui 'nú' jalé' e ja` mi' cafñ'i 'nú' lana; co' ja` nifé' jíi' laco' í dsí' ñia' e Jmiguü' do, co' lajii' júu' e ni'íng' quiá' Fidiéé', jíi' joba' e nifé'; jogui cajo ni'é' 'nú' e jalé' e nidsijéé' fi' jmigüü' lajee' lí' dsé'gui. 14 Jo e Jmiguü' do nifé' guiá' uii' quié'e, co' nicuó' 'nú' lajii' e ni'íng' quié'baa e laco' niliñ'na' jalé' e jo. 15 Jo lajib' jalé' e sea` quiá' Tiquí'ii' e quié'baa lí' cajo, jo uii' e lajoba' e fá'a e lajalé' e júu' e ni'íng' e Jmiguü' do jáa' fi' quié'baa, jo jaléb' e jo nicuó' 'nú' e ningáng'na'.

16 'Jo fñ'guñ' 'nú' cajo e jo` huóø' táang'guñ' jee' 'nú', joba' jo` nimáang'gui' jnea~; jo dsu' mi' ning'guijia lajo, joba' nimáam'tu' jnea~ calé' catú'.

Cateá'ba' e calíng' dsea` guijáng' quiá' Jesús fi'í'

17 Jo mi' canúu' i dsea` guijáng' do lajii' júu' e cajíng' Jesús do, joba' canaaiñ' jming'í' rúñ' la'ó' yaaiñ' jo sñiñ':

—¿E'gui guóng' e fé' i Fí'naa' na mi' jíñ' e jo huóø' dsé' e táang'guir fi' jee' jneaa'aa', joba' jo nineeng'guí're, jo dsu' mi' ning'guijia lajo, joba' nineem'túu're calé' catú'? jogui ¿e'gui guóng' e jíñ' e nidséiñ' fi' lí' guing' Tiquiá'r' fi' ñifí'? 18 Jogui cajo, ¿e'gui guóng' e jíñ' e jo huóø' dsé'

e táang'guir jee~ jneaa~aa'? Jò lana dseáng' jii' capí' ja' ngáng'naa' e~ guóng' jalé' e fé'r' na.

19 Jò dsifib' calilí' Jesús e i dsea` quiá'r- do lüm~ ee` iñ~ nijmingí'r- dsea` do, joba' lalab cañír' quiá'- i dsea` quiá'r- do jò cajíñ'-:

—Jnea~ nicañí' i 'nú' e jo` huóø- dsé- e máang'gui' jnea~ fi' jmigüi' la, jò dsu' mi~ ningí'guijia lajò, nimáam~tu' jnea~ calé' catú-. Jò ¿su e nab e iing~na' e ñí'na' do e~ guóng'? 20 Jò dsu' jnea~ jmitaa' óó'na' e mi~ tí' lí' nití- e í' jò, joba' eáam' fi'í' nilíng~na' jóng co' jì'gui cartí' niquí'ba', jogui ie~ jò jaléng' dsea` i ja' cúing' jnea~ eáam' nijmi'iaáng' dsír'. Jò dsu' 'nú'gui cateá'ba' nilíng~na' fi'í' ie~ jò, co' cóo'~ e joba' nijmé- e nili'iaáng'tu' óó'na'. 21 Co' e la lí' laco'gui mi~ jaang' dseamí' iñ' iihuí' lajee~ dsea' jmohuí' quiá'r- e liseeng' jiuung~ quiá'r-; jò dsu' dsifí' mi~ caliséng' i yuu' do quiá'r-, joba' íim- dsír' lajii'~ e iihuí' e ca'íñ' do, co' eáam' jmi'iaáng' dsír' dsu' uí'~ e nicaliséng' i yuu' do quiá'r-. 22 Jò lajob líng' 'nú' fi'í' lana, jò dsu' mi~ nimáang~tu' jnea~ calé' catú-, joguiba' nili'iaáng' áa'na' dseáng'- laco' si'í', jò e jò jii'~ jaang' cuóøng' lí' jé'gui quií'na' e iaáng' óó'na' do.

23 'Jò ie~ jmii~ jò, jò' e nijmingí'gui' jnea~ jii'~ coo'; co' e ja'ba' e fi' i 'nú' e ie~ jò Tiquí'ii' nicuó'-bre 'nú' jalé' e nimí'~na're la'eáang' cóo'~ jnea~. 24 Jò dsu' latí' lana, jii'~ coo' ja' ee' mí' camí'~na're la'eáang' cóo'~ jnea~; jò dsu' mí'~na're joba' niñím'ba', jò lajoba' nili'iaáng' óó'na' dseáng'- laco' si'í'.

Jial laniing- 'gøng' Dsea' Jmáang-

25 'Jo nicañi~i 'nú' jalé' júu^ e huñg'jiu ngáng'na', jo dsu' tí' lí~ nití~b- í' e jo' nifóng'^guí' 'nú' cóo'~ jalé' e júu^ jo, có' ie~ jo dseáng'~ condseéb' nifí'~i 'nú' cuaiñ~ quiá'- Tiquí'ii' dsea' guing~ ñifí'-. 26 Jo mi~ nití'~ e í' jo, 'nú' nimí'~na're e nijmicóo'r~ 'nú' la'eáang' cóo'~ jnea~; jo ja` fá' jnea~ e nimí'~i Tiquí'ii' uí'~ 'nú', 27 có' 'ñiab' Tiquí'ii' 'neáaiñ` 'nú' cajo uí'~ e 'neáam'ba' jnea~ jogui e já'- nilíng'na' e Fidiéeb' dsea' casíiñ` jnea~ fí' jmigüí' la cuaiñ~ quiá'r-. 28 Có' fí' lí' guing~ Tiquí'baa' cajú-u mi~ cagüén- n fí' jmigüí' la, jo dsu' lanagui nitá'baa fí' la e laco' niníng'^túu fí' lí'~ guíiñ~ fí' ñifí'-.

29 Jo mi~ cangí' e cajíng'~ Jesús lajo, joba' lalab cajíng'~ i dsea' guijáng` quiá'r- do jo casí'r- dsea' do:

—Jo lanaguiba' fó' 'nu' condseé' dseáng'~ laco' la ngáng'naa' náng. 30 Jogui lana nine~baa' cajo e lajib` ñí' 'nú', joba' jo' 'né' fa' i~i nijmingí'~gui 'nú', có' cóo'~ jii'~ e júu^ nab nijáb'~ lí'naa' e Fidiéeb' dsea' casíiñ` 'nu' fí' jmigüí' la cuaiñ~ quiá'r-.

31 Joba' cañí' Jesús quiá'- i dsea' quiá'r- do jo casí'~reiñ':

—Jo ¿su lanaguiba' já'- nilíng'na' lajii'~ júu^ e fí'~i 'nú'? 32 Jo dsu' lana dseáng'~ ngóo' catí~b- í' e nináng` sojóng-na' lajaang` lajaang-na' fí' la fí' na, joba' 'ñiá'baa nitiúung`guí. Jo dsu' e já'- e ja' 'ñiá'a seen- cajo, có' seem` Tiquí'ii' colíng~ cóo'~ jnea~ contøøng-. 33 Jo fí'~i 'nú' jalé' e júu^ la e lí' laco' niliseeng'na' juguiá- júu^ røø' la'eáang' e seeng'na' cøøng` cóo'~ jnea~; jo 'nú' fí' jmigüí' la ni'íng'na' iihuí', jo dsu' ja` jmitúng^ óo'na' uí'~ e jo, có' jnea~ nicalí'baa fí'~ i 'líng' i ngí' ta~ jmigøøng` dsea' fí' jmigüí' la.

17

Mi~ camí Jesús uii~ quiá'- dsea` quiá'r-

¹ Jo mi~ cangî e café' Jesús jalé' e júu^ jo fí quini~ dsea` guijáng` quiá'r-, joba' caséer` nir~ fí yá'^ jmiǵüû jo cajíñ' lala:

—Teaa~, lanab catí í' quié-e, joba' jmi'goo` jnea~ e lí'^ laco'gui jnea~ nijmi'goo- 'nũ. ² Co' 'nũ nicacuóø' jnea~ e oo- ta~ jee~ jaléng' dsea` jmiǵüû e laco' jaléng' dsea` quií'- i nicacuóø'n~ jnea~, nicuóø^øre e niliseeiñ` cøøng` cóo' 'nũ lata~. ³ Jo niñiñ` e seeiñ` cøøng` cóo' 'nũ lata~ fíng song calicuíñ` 'nũ jogui caliñir' e jíí' 'nũb` dsea` lin' Fidié~ i já'-, jogui fíng song calicuíñ` jnea~ cajo e lán'n Dsea` Jmáang- i casíng` 'nũ fí jmiǵüû la.

⁴ Jo jnea~ nicajmi'goo-baa 'nũ jee~ jaléng' dsea` jmiǵüû, co' lana nicatám' baa lajíí' ta~ quié-e e casín' jnea~ e cagajmé'e fí jmiǵüû la. ⁵ Joba' fón'n 'nũ lana, Teaa~, e nijmi'góo` jnea~ mi~ niguién'- túu fí cáan' na lí'^ laco'gui la jmi'goo` 'nũ jnea~ fí ñiff- quií'- lajíí' ie~ mi~ nú'-gui e catiroo` jmiǵüû.

⁶ Jo jaléng' dsea` i caguíng' 'nũ jee~ jaléng' dsea` jmiǵüû e laco' ca'uíñ- dsea` quié-e, joba' nicajmé-baa e nicaliñir' i~ dseáng'- líng` 'nũ. Jo lajíng` dsea` i cacuóø'n~ jnea~ do, dsea` quií'-ba' líñ', jogui lana nica'ím' bre jalé' júu^ quií'- . ⁷ Joba' lana jaléng' i dsea` quié-e do niñir' e jalé' e nica'íng' jnea~, 'nũb` dsea` nicacuóø' jnea~ e jo, ⁸ co' nicaní' baa jee~ jaléng' i dsea` quié-e la jalé' júu^ e ca'ín' n quií'-, jo nica'ím' bre jalé' e júu^ jo. Jo dsea` do nicalilí' bre e dseáng'- 'nũb` dsea` casín' jnea~ fí jmiǵüû la, jogui dseáng'- jáb'- líñ` cajo e gáa' jnea~ fí lí~ guíng' 'nũ fí ñiff-.

9 'Jogui lana mñí'í 'nu' uii~ quiá'- jaléng' ì dsea í; jo dsu' ja mñí'í 'nu' uii~ quiá'- jaléng' dsea jmiçüü ì ja líng' dsea` quiá'-, dsu' jíí'~ dsea` ì cacuóøñ'~ jnea` dobing' ì mñí- uii~ quiá'-, co' jíí'~ í'bing' ì líng' dsea` quiá'-. 10 Jo e quíib- 'nu' lajalé' e sea` quié- e jogui e quieb- jnea~ lajalé' e sea` quiá'-, jogui la'eáang' ì dsea` la nijnéng' jial tíí niguó'^ lín'n.

11 'Joba' fíi-guñí 'nu', Teaa~, jo` nija`gui jnea~ fí jmiçüü la, dsu' jaléng'gui ì dsea` quié- e la nijé- bir fí jmiçüü la lajee~ e niníng'^ jnea~ e nijaa` cóo'~ 'nu'. Jo co' 'nu' dsea` güean'^, joba' mñí'í 'nu' e nijméa'^ í' ì dsea` quié- e la la'eáang' cóo'~ e 'gøñ' do lí'^ laco'gui e nicacuóø'~ jnea~ e 'gøñ'n cajo, jo lajoba' niliseeng' ì dsea` quié- e la cøøng' cóo'~ jneaa`aa' lí'^ laco'gui la seeng' 'nu' cóo'~ jnea~ dseáng'- con-røø. 12 Jo lajee~ e nicataan~n fí jmiçüü la cóo'~ jaléng' ì dsea` quié- e la, nicaneb'- nii-re jogui nicajmé-baare í' la'eáang' cóo'~ e 'gøng' quiá'- lí'^ laco'gui e nicuóø'~ jnea~ e lín'n. Jo jíí'~ jaang' ì dsea` quié- e la ja` mí ca'naaiñ` cóo'~ jnea~, dsu' dseáng'- jíí' ì jaang' ì nijáng' jnea~ fí jaguó' jaléng' dsea` ì 'ní' níng- jnea~, jíí'~ í'bing' ì nica'naang' conguaí, jo dsu' nicalí- lajo e lí'^ laco' niliti~ lajíí'~ e tóo' fí ní` jì qui-ii' e cajme' dsea` malí' gui eáang'.

13 'Jo lanagui catí í' e ninín'^n fí lí' guiin'~; jo dsu' jalé' e júu^ e fá'a la, fá'a lajee~ e táam`bí fí jmiçüü la e lí'^ laco' jaléng' ì dsea` quié- e la nilí'íáang` dsíir' dseáng'- laco' sí'í' lí'^ laco'gui la íáang` dsii- 'ñiá'a cajo. 14 Jo jnea~ nicaníí'~baa júu^ quiá'- jee~ ì dsea` quié- e la, jo dsu' jaléng' dsea` jmiçüü ì ja` cuíng' 'nu' 'ní' níim-bre jaléng' dsea` quié- e la, co' jaléiñ' la ja` jíi'r~ jalé' e 'lí'^ e sea` fí jmiçüü la o'gui jnea~

jíi'~i jalé' e jō cajo. 15 Jō dsu' ja` mǎi'~i 'nu' e laco' ni'uøøñ'~ i dsea` quié'~ e fí' jmiǵü' la, co' lajii'~ e mǎi'~i 'nu' e nijmées' í' íbre e laco' ja` nijmiǵøøng` i 'líng' ír'. 16 Jō lí' laco'gui jnea` ja` jíi'~i jalé' e 'lí' e sea` fí' jmiǵü' la, joba' lajob líng' i dsea` quié'~ e la cajo, co' ja` jíi'r~ jalé' e jō. 17 Jō mǎi'~guǎi 'nu' e nijmiǵüeang'~ i dsea` quié'~ e la e laco' nijmér' lajii'~ ta` e niqiuí'~ quiá'~ bre la'eáang' e nica'íñ' jalé' júu` quií'-. 18 Jō lí' laco'gui 'nu' casín' jnea` jee` jaléng' dsea` i ja` cúing' 'nu' fí' jmiǵü' la, joba' lajob jnea` cajo nisín' n i dsea` quié'~ e la jee` jaléng' dsea` i ja` cúing' 'nu'. 19 Jō nijáang'~ 'ñiá' a e nijmee` e lajii'~ e iing' 'nu' e lí' laco' i dsea` quié'~ e na nijáng' yaaiñ` e nijmér' lajii'~ e iing' 'nu'. Jō nilí' lajō la'eáang' cóo'~ e já' líng' i dsea` quié'~ e la jalé' júu` quií'-.

20 Jō ja` mǎi'~i 'nu' dseáng'~ jíi'~ uii` quiá'~ i dsea` quié'~ e la, co' lajob cajo mǎi'~i 'nu' uii` quiá'~ jaléng' i ná' gui i nijá' líng' júu` quié'~ e mi` tí' lí' ninúr' e júu` e ni' i dsea` quié'~ e la. 21 Jō mǎi'~i 'nu' e jaléng' i dsea` í' niliseeiñ` dseáng'~ cøøng' lajee` la'ó' rúíñ' e laco' ni'uíñ' lafa' jaang' dsea` la'eáang' e seeiñ` cøøng' cóo'~ jneaa`aa', Teaa~, lí' laco'gui seeng' 'nu' cøøng' cóo'~ jnea` jogui jnea` seen` cøøng' cóo'~ 'nu'. Jō mǎi'~i 'nu' e güiliseem`bre cøøng' lajō la'ó' ír' lí' dseáng' laco' sí'í', jō lajoba' nilijá' líng' jaléng' dsea` jmiǵü' e 'nu' dsea` casín' jnea` fí' jmiǵü' la. 22 Jōgui nicacuøø`baa jaléng' i dsea` quié'~ e la e niliǵüeaiñ' lí' laco'gui 'nu' nicacuøø'~ jnea` e nicaliǵüean' n, jō lajoba' i dsea` quié'~ e la ni'uíñ' lafa' jaam` dsea` lí' laco'gui la líng' jnea` cóo'~ 'nu' e jaam` dsea` líi'íi': 23 jōgui niliseeng' jnea` cøøng' cóo'~ ír' jogui 'nu' cøøng' cóo'~ jnea~, jō lajoba'

ni'uíng⁻ lajiiñ[^] do dseáng[^] lafa' jaam` dsea, jo lajoba' nililí[^] jaléng[^] dsea' jmigüí[^] e 'nab` dsea' casín[^] jnea~ fí' jmigüí[^] la, jogui e eáam' 'neáan're cajo lí[^] laco'gui la 'neáang' 'nua` jnea~.

²⁴ Jo mí[^] guí[^] 'nua, Teaa~, co' 'nab` dsea` cacuóø[^] n[^] jnea~ jaléng[^] i dsea` quié⁻ e la, joba' iing~ jnea~ e seem`bre cøøng` cóo[^]~ jnea~ fí' lí[^] niní[^]i, jo lajoba' ninír` jial tí[^] niguo[^] lín[^]n, jo e job e cacuóø[^] 'nua` jnea~ do. Co' lajii[^]~ lí[^]ba' e 'neáan' 'nua` jnea~, co' lajii[^]~ latí[^] mí[^] nú[^]-gui e catiroo` jmigüí[^]ba' e jmoo[^] lajo cóo[^]~ jnea~. ²⁵ Teaa~, dseáng[^] eáam' guiúng⁻ 'nua, jo fíim[^] dsea` i seeng` fí' jmigüí[^] la ja` cuíiñ[^] 'nua; jo dsu[^] jnea~ dseáng[^] lajam[^] cuín[^] 'nua, jogui niñí[^]bi jaléng[^] i dsea` quié⁻ e la e 'nab` dsea` casín[^] jnea~ fí' jmigüí[^] la. ²⁶ Jogui nicacuóø⁻baar e caliñír[^] i` dseáng[^] líng[^] 'nua, jogui mí[^] 'noob[^]i nifí[^]ire lajo cajo e laco' nijmi'neáang` rúíñ[^] lí[^] laco'gui la 'neáang' 'nua` jnea~; jogui lajoba' niliseeng` jnea~ cøøng` cóo[^]~ ír` cajo.

18

Mí[^] casang[^] dsea` Jesús

(Mt. 26:47-56; Mr. 14:43-50; Lc. 22:47-53)

¹ Jo mí[^] cangí[^] e casíng⁻ Jesús cóo[^]~ Tiquiá[^]r, joba' cagüí[^]bre colíng[~] cóo[^]~ i dsea` guiáng[^] quiá[^]r do e fí' dsí[^] 'núu[^] tú⁻ fíng⁻ do, jo cangolíñ[^] lí[^] lí[^] 'ngóo[^]~ lí[^] iu[^] cóo[^]~ íí[^] e sií[^] Cedrón. Jo mí[^] catáíñ⁻ lí[^] lí[^] 'ngóo[^]~ e íí[^] do, jo caguilíñ⁻ fí' cóo[^] dsí[^] iá, jo fí' job ca[^]lí⁻ Jesús colíng[~] cóo[^]~ i dsea` quiá[^]r do. ² Jogui i Judas Iscariote i nicanaang[^] 'nñng[^] Jesús do, guiúb⁻ cuír[^] e fí' dsí[^] iá jo, co' lamí[^] jéeng[^]gui jmiguiub[^] ya' caseáng[^] Jesús cóo[^]~ i dsea`

quiá'r- do e fí' jō. ³ Jō fí' jōb caguié- Judas Iscariote ie~ jō, jō nijéieñ` i fíng' 'léé- quiá'- dsea` romano cóo'~gui cóo' tú~ máng'~ dsea` i nées' ni~ guá'- quiá'- dsea` Israel i casíng' fí~ jmidsea` quiá'- dsea` do colíng' cóo'~ i dsea` góor` i líng' dsea` fariseo cajo. Jō jaléng' i dsea` do quier' jalé' ñisú' cóo'~gui jalé' quí' e coo' e laco' cuø' jì' e jné'r'. ⁴ Jō co' niñi'bi Jesús jalé' e tí' lí' nidsingúiiñ- do, jōba' mi~ calilí'r^ e caguilíng- i dsea` do fí' jō, jōba' casíng' 'ñia'r' tí' quini'gui laco' la teáang- i dsea` quiá'r- do, jō lalab cajmíngí'r- i dsea` i caguilíng- do jō cajíñ'-:

—¿I~ ñilíng- na' 'náng'na' fí' la?

⁵ Jōba' cañí' i dsea` do quiá'- Jesús jō cajíñ'-:

—Jesús i seeng' fí' Nazaret 'néng'naa'.

Jōba' cañí' Jesús quiáíñ'- do jō casí'r- dsea` do:

—Jnea~bi dsea` í'.

Jō ie~ jō dob quíng'~ Judas Iscariote jee~ i dsea` i caguilíng- tóø' Jesús do. ⁶ Jō mi~ tí' lí' cajíng'- Jesús e í'bre siir` lajō, jōba' lajím` i dsea` i caguilíng- do cató- yaaiñ~ ladsifí' lana cartí' caneáíñ- uø-.

⁷ Jō mi~ cangí' jō, Jesús cajmíngí'-tur i dsea` do jō casí'-reiñ':

—¿I' dseáng'- i 'náng'na' fól'na'?

Jōba' cañí'tu i dsea` do quiá'- Jesús jō cajíñ'-:

—Jesús i seeng' fí' Nazaret 'néng'naa'.

⁸ Jōba' Jesús cañí'tur quiáíñ'- do calé' catú- jō casí'-reiñ':

—Jō nicafí~baa 'nú' e jneab~ dsea` í', jō song jneab~ dsea` 'náng'na', jōba' cuøø'~ba' fí' i dsea` quíe- e la e nidsilíñ`.

⁹ Jō café' Jesús e júu^ na e lí'^ laco' caliti~ lajii~ júu^ quiá'r- e café'r' lamí~ jééng'gui mi~ cajíñ'- lala: "Tea~, jaléng' i dsea` quíi'- i cacuøø'n~ jnea~

do, jíi'~ jaang` ja` ii` ca'naang` cóo'~ jnea~." 10 Jo dsifí lanab cagui` Tú^ Simón ñisú' e quier' ie~ jo, jo caquiú'r` cataang` logua` dsée' quia'- jaang` dseañú" i sii` Malco i nilíng' dsea` 'léeng'~ quia'- i jmidsea` i laniing` ie~ jo. 11 Jo mi~ cangá~ Jesús quia'- lajíi'~ e calí~ do, joba' lalab casí'r~ Tú^ Simón jo cajíñ'~:

—Tú^, te'tu' ñisú' quia'- eáang` quia'-, co' Tiquié^baa i cuø' jnea~ e iihu' la, joba' 'né~ ni'lim'~baa jíi'~ laco' e nicuør~.

Mi~ cangojgeáaiñ^ Jesús fí quini` jaang` jmidsea` i sii` Anás

(Mt. 26:57-58; Mr. 14:53-54; Lc. 22:54)

12 Jo mi~ cangí jo, jaléng' i 'léé~ do cóo'~gui i fii~ quia'r~ do colíng'~gui cóo'~ i dsea` Israel i néé ni` guá'- quia'r~, casam'~bre Jesús jo ca'ñú'r` guoo` dsea` do. 13 Jo la'uii~ cangojgeáaiñ^ dsea` do fí quia'- jaang` jmidsea` i sii` Anás, co' í nilíiñ' ngoo~ quia'- i jmidsea` i sii` Caifás ie~ jo, jo i Caifás do líiñ' jmidsea` laniing` quia'- dsea` Israel ie~ jíi` jo. 14 Jo i jmidsea` Caifás lab cajo, lami~ jéeng'gui casí'r~ dsea` i quie' nifí quia'- dsea` Israel e guiá~guib ni'uíng~ quia'- jaléng' i dsea` í e nijúung~ jaang` dseañú" cuaiñ` quia'- góor` laco'gui e nijúung~ i fíng' i dsea` góor` do.

Mi~ cajíng'~ Tú^ Simón e ja` cuiñ` Jesús

(Mt. 26:69-70; Mr. 14:66-68; Lc. 22:55-57)

15 Jo mi~ catør` Jesús fí quia'- i jmidsea` Anás do, jo ti'leám` gáng~ dsea` quia'- Jesús laco' cangáng'~ dsea` do, jaaiñ` do siir` Tú^ Simón, jogui i jaang'gui do cuím` rúin' cóo'~ i jmidsea` laniing~ do, joba' ca'í~biñ' do e fí dsí' lí~ catør~ Jesús, 16 dsu' i Tú^

Simón do fi' caluuv̄ o'nú[^] cajer'. Jo mi[~] calilí[^] i dsea[^] quiá⁻ Jesús i cuíng[̀] rúng[^] cóo[~] i jmidsea[^] laniing⁻ do e caluub[~] caje[^] Tú[^] Simón, joba' cagüi'ú[^] bre fi' caluuv̄ jo casíiñ⁻ cóo[~] i dseam[^] i sing[^] jmóo[^] í e jní[^] do e laco[^] nicuóñ⁻ do fi' e ningíng⁻ Tú[^] Simón fi' dsíí' sigui' quiá⁻ e 'nú[^] do, joba' cacuø[^] biñ⁻ do fi' lajo. ¹⁷ Jogu[^] i dseam[^] i jmóo[^] í e jní[^] do, lalab cajmingí[^]r⁻ Tú[^] Simón jo cajíñ⁻:

—¿Su o[^] dsea[^] quiá⁻ i dseañ[^] i ní[^] nabi 'nu[^]?

Joba' cañí[^] Tú[^] Simón quiá⁻ i dseam[^] do jo casí⁻ reiñ⁻:

—U[~], o[^] í jnea[~].

¹⁸ Jo co[^] ie[~] jo eáam[^] güí⁻, joba' jaléng[^] dsea[^] 'léeng[^] i jmóo[^] ta[~] sinú[^] quiá⁻ i jmidsea[^] Caifás do cóo[~] guí jaléng[^] i néé[^] ní[~] guá⁻ quiá⁻ dsea[^] Israel ninicaji[^]r⁻ jí e sigui' do, jo fi' dob neáaiñ⁻ jmiguiáiñ⁻ ca[^] jí. Jo fi' dob caje[^] Tú[^] Simón e jmiguiáiñ⁻ cóo[~]ñ⁻ do cajo.

*Mi[~] caguiéng[^] Jesús fi' quini[~] fi[~] jmidsea[^]
(Mt. 26:59-66; Mr. 14:55-64; Lc. 22:66-71)*

¹⁹ Jo lajee[~] e teáng⁻ i dsea[^] i jmiguiáng[^] e fi' sigui' do, joba' dob iuung⁻ Jesús cóo[~] guí i fi[~] jmidsea[^] do e fi' dsíí' sinú[^] do. Jo lajee[~] jo i fi[~] jmidsea[^] do canaaiñ⁻ jmingí[^]r⁻ Jesús uii[~] quiá⁻ dsea[^] quiáiñ⁻ do cóo[~] guí jalé[^] e nica[^]e[^]r⁻ jaléng[^] i dsea[^] í cajo.

²⁰ Joba' lalab cañí[^] Jesús quiá⁻ i dsea[^] do jo casí⁻ reiñ⁻:

—Jnea[~] nica[^]é⁻e jaléng[^] dsea[^] fi' jee[~] dsea[^] fím[^]; jogui contøø⁻m⁻ nica[^]é⁻ere fi' dsíí' sinú[^] guá⁻ jí[^] osi fi' guá⁻ fé[^] quiá⁻ dsea[^] góo[^]naa[^] dsea[^] Israel e si[^] fi' Jerusalén e fi' lí[~] seáiñ⁻ e laco[^] jmiféiñ⁻ Fidié[~]; jo ja[^] mí caguiá[^]a jalé[^] e júu[^] jo fa[^] coo[~] lí[~] ja[^] lí

nú⁻ dsea[.] 21 J_oba', ¿jialí' jnea[~] jmíngí' e jo? Co' cuøøm' güijmíngí' jaléng' i dsea ⁱ nicanúu⁻ jalé' júu[^] quié⁻ e e nicaguiá'a do, j_oba' í'bing' i nijmeá'⁻ 'nú' júu[^] e[~] jalé' e nicafí' ire do. Co' niñib' jaléng' i dsea ^í jalé' e júu[^] e nicafá'⁻ a do.

22 J_o mi[~] tí' lí' cañí' Jesús quiá'⁻ i fi[~] jmidsea[^] do e júu[^] j_o, j_oba' jaang[^] i dsea[^] i néé' ni[~] guá'⁻ quiá'⁻ dsea[^] Israel do cajnéer' moni[~] Jesús, j_o mifíng' casí'r⁻ dsea[^] do j_o cajíñ'⁻:

—¿Su lanab ngí'⁻ quiá'⁻ i fi[~] jmidsea[^] na?

23 J_oba' cañí'tu Jesús quiá'⁻ i dsea[^] do j_o casí'⁻reiñ':

—Song gab' lí' e júu[^] e nicafá'⁻ a na, j_oba' iin[~] n jmée'[^] júu[^] jialí' e lí' laj_o e nicafá'⁻ a na; j_ogui song guiáb⁻ laj_í' e júu[^] e nicafá'⁻ a na, j_oba' ¿jialí' caba' moni[~]?

24 J_o mi[~] cangí' j_o, i fi[~] jmidsea[^] Anás do caguiéiñ' Jesús e 'ñúung'[~] dsea[^] do fí' quini[~] i fi[~] jmidsea[^] rúíñ' i sii' Caifás do.

Mi[~] cajíng'-tu Tú[^] Simón e ja[^] cuiñ' Jesús

(Mt. 26:71-75; Mr. 14:69-72; Lc. 22:58-62)

25 J_o lajee[~] j_o, dobi sing' Tú[^] Simón e jmiguiáiñ' fí' 'ni' j_i e fí' siguí' do, j_o co_o' cajmíngí'⁻ i dsea[^] teáng⁻ do ír' j_o cajíñ'⁻:

—¿Su o' quíim'⁻ bi' nu[^] jee[~] dsea[^] quiá'⁻ i dseañu[^] i iuung⁻ do?

J_oba' cañí' Tú[^] Simón quiáiñ'⁻ do j_o casí'⁻reiñ':

—U[~], o' í' jnea[~].

26 J_o mi[~] cangí' j_o, jaang[^]gui dsea[^] 'léeng'[~] quiá'⁻ i jmidsea[^] laniing⁻ do i líng' ee[~] i dseañu[^] i caqui[^] Tú[^] Simón logua[~] do, j_o dsea[^] í' cajmíngí'r⁻ Tú[^] Simón lala j_o cajíñ'⁻:

—¿Su o' 'nu'bi i camán-n mi~ cangoséng'^naa' i Jesús na e fi' dsí' íá' do?

²⁷ Jogui calé' catú~ cajíng'^ Tá^ Simón e o' dsea' í líiñ', joba' dsifí' mi~ cangí' lajō mifíng' caqui' jaang' tuidsée^ jóng.

*Mi~ cangojgeáaiñ^ Jesús fi' quini~ dseata~ Pilato
(Mt. 27:1-2, 11-14; Mr. 15:1-5; Lc. 23:1-5)*

²⁸ Jo mi~ cangí' jō, caguím'bre Jesús fi' quía'- i jmidsea` Caifás do, jō cangojgeáaiñ^ dsea' do fi' quini~ jaang' dseata~ romano i sií Pilato. Jō dsaco' ie~ jō nijaquíéng' nijneáb', jogui guati'ló~ jmíib~ cajo, joba' ja' cangotáang'^ i dsea' Israel do fi' dsí' e 'nu'fí do, co' faco' mi~ cajméer' lajō, joba' ja' jmitir~ jóng lajii'~ júu^ quia' ta~ quía'r~ quía'- lajii'~ e quí'~ tíiñ' e jmóor' mi~ tí' jmíi~ Pascua; jō co' ja' cangotáang'^ guir fi' dsí' jō, joba' cuøøm` dør~ e jmiñi~ e silíng' e gør' ie~ jmíi~ jō. ²⁹ Jō mi~ tí' lí' cangá~ dseata~ Pilato e nitée` dsea' Jesús, joba' cagüi'fir' jō casí'r~ jaléng'^ i dsea' do lala:

—¿E~ dsee~ e cuø'na' i dseañu' na?

³⁰ Joba' cañii' dsea' Israel quía'- i dseata~ Pilato do jō casí'-reiñ':

—Fa' jiu~gui i dseañu' la ja' jmóor' ta~ 'lée' jee~ jaléng'^ dsea', joba' ja' jáang'^naa're jóng fi' quini' faco' lajō.

³¹ Joba' lalab cañii' dseata~ Pilato quía'- i dsea' Israel do jō cajíñ'-:

—Tee~ 'nú' yaang~na' i dseañu' góo'na' na jō quidsi'na' í' quía'r~ yaang~na' lí'^ laco'gui la quí'~ tíng'na' cóo'~ júu^ quia' ta~ quí'na', 'nú' dsea' líng'na' dsea' Israel.

Jō mi~ canúu~ i dsea` Israel do e júu^ jō, jōba' lalab cajíñ'~:

—Dsua' jnea'^, dsea` líí'naa' dsea` Israel, ja` sea` fí qui~naa' quiá'~ dsea` romano e nicuøø^naa' iihuí' lí'^ doñí' ií` dsea` cartí' nijúuiñ~.

³² Jō jōb caliti~ lajii~ júu^ e cajíng'~ Jesús lami~ jéeng'gui quiá'~ jial líí' 'mó~ e nitíñ~. ³³ Jō mi~ cangí' jō, ca'ib~tu dseata~ Pilato fí dsíí' 'nufí' quiá'r~, jō cató'r~ Jesús fí lí~ quidsir' í', jō cajmingí'r~ dsea` do jō cajíñ'~:

—¿Su 'nub` i líng' dseata~ dsea` féng' i quié' nifí' quiá'~ dsea` Israel?

³⁴ Jōba' cañíi' Jesús quiáíñ'~ do jō casí'r~ dsea` do:

—¿Su uøø'ba' iin~ ní'^ e jmingí'~ jnea~ na, ofa' lí'^ canúu'~ e fé' dsea` jém' é?

³⁵ Jōba' lalab cañíi' dseata~ Pilato quiá'~ Jesús jō casí'r~ dsea` do:

—Ja` dsea` Israel líng' jnea~ la. Co' jaléng' dsea` góo' dsea` Israel colíing~gui cóo'~ jaléng' fii~ jmid-sea` quí~na', dsea` í'bing' i nicajáng' 'nu` fí' quini~ la lana. Jōgui 'nu', ¿e~ dsee~ sea` quí'~ quiá' e 'n'íng' dsea` 'nu'?

³⁶ Jōba' lalab cañíi'tu Jesús quiá'~ i dseata~ do jō cajíñ'~:

—Ja` sí'íng^ jnea~ e niquiá'^u ta~ laco'gui quiu' ta~ jaang' dsea` jmigüí' fí' la, co' faco' lajō, jōba' seem` dsea` quié~ e i nijmeáan'~n ta~ e laco' ja` nijáng' dsea` jnea~ fí' quini~ dsea` góo'o dsea` Israel faco' lajō. Co' lí'^ laco' fá'a na, e ja` sí'íin^n e niquiá'^u ta~ laco' jaang' dsea` jmigüí'.

³⁷ Jōba' cañíi'tu dseata~ Pilato quiá'~ Jesús jō casí'r~ dsea` do:

—Jo 'nub`dsea`lin' dseata~ dsea`féng' i quie' nifi`
quia'- dsea`Israel liya.

Joba' cañi'tu Jesús quia'- i dseata~ do jo
casí'-reiñ':

—Lajob lí' lí'^ laco'gui nicafee'~ na, e jneab~ i
dseata~ dsea`féng' í. Co' jnea~ cagá-a fí' jmigüí
la mi~ cangáan'^n e laco' niguiaa- jalé' júu^ já'-.
Jo jaléng' dsea` i já'- líng` e júu^ jo, joba' dsea`
quie'-baa líiñ', co' núu'~bre jalé' júu^ quie'-e.

³⁸ Jo mi~ canúu- dseata~ Pilato lajii'~ júu^ quia'-
Jesús, joba' cajmingí'r- dsea` do lala jo cajíñ'-:

—Jo ¿jnang~ e júu^ já'- do?

Mi~ cahuí' ta~ e nijúung- Jesús

(Mt. 27:15-31; Mr. 15:6-20; Lc. 23:13-25)

Jo mi~ cangí e cajmingí dseata~ Pilato e júu^ jo,
joba' cagüi'íb'tur calé' catú- fí' lí' teáng^ i dsea`
Israel do e laco' nisíng-tur cóoiñ'~ do calé' catú-,
joba' lalab casí'r- i dsea` do:

—Jii'~ coo` dsee- ja` niguié' jnea~ e nica'ée` i
dseañu' la. ³⁹ Jo co' 'nú' quí'- t'ing'na' e laan-
jaang` dsea` góona' i sijníng~ lajee' mi~ tí' jmii~
quí'na' e catí' lana e sií Pascua, joba' jmingí'í'
'nú' lana, ¿su iing~na' e nilaan- i dseata~ dsea`féng'
quí'na' i sing' la?

⁴⁰ Jo mi~ canúu- jaléng' dsea` Israel i teáng-
do ie~ jo e júu^ quia'- i dseata~ Pilato do, joba'
lajim`bre canaaiñ' ta'r' mii'~ jo fé'r':

—Ja` laan'- i dsea` na! Jo ¡leaang- Barrabás!

Jo i Barrabás i éeiñ` do sijniñ' do dsu' uí' e
jmóor` ta` 'ní' níng- dseata~.

19

¹ Jo mi~ canúu~ dseata~ Pilato lajii~ júu^ e casí~ dsea` ír do, joba' caquiur' ta~ e nisám' i 'lee~ quiár~ do Jesús e laco' nibóøng~ neiñ' do cóo~ loo~ jó' e lí' 'nii~. ² Jo mi~ cangî jo, i 'lee~ do cajméer` coo` lí^ corona cóo~ layaang~ tóo~, jo e job catá'r` fí mogui~ Jesús, jogui cajlíiñ` dsea` do cóo~ coo` 'mi' niung' e lí' laco' e quie` dsea` niing~ i quiu' ta~. ³ Jo mi~ cangî jo, cangoquieeiñ' fí quiá'~ lí' sing' dsea` do, jo lalab canaiñ` lóøiñ` dsea` do jo sí'r` lala:

—¡Güiliseem` huóø^, dseata~ dsea` féng' quiá'~ dsea` Israel!

Jo lajee` jo jnóor' fí moni~ dsea` do.

⁴ Jo mi~ tí lí cagüi'í'tu dseata~ Pilato e fí lí teáng^ i dsea` Israel do, joba' lalab casí~ reiñ' do jo cajíiñ'~:

—E laba' fíi~ i 'ná', e lab nisín^ n i dseañu' la fí quini^ na' e laco' niliñi^ na' e jíi~ coo` dsee~ ja` mí cadsé' e quiár~, co' lajib` nicajmingí' ire.

⁵ Jo lajee` job cagüi'í' Jesús e ni'iu~ e lí^ corona e lí' cóo~ yaang~ tóo` do fí moguir~, jogui jlíiñ` e 'mi' e niung' huíng' do. Jo lajee` nising' Jesús fí quini` i dsea` do, lalab cajíng'~ dseata~ Pilato e sí'r` jaléng' i dsea` teáng~ do ie~ jo:

—¡Lab nising' i dseañu' la fí quini^ na' náng!

⁶ Jo mi~ tí lí cangá~ jaléng' fii~ jmidsea` quiá'~ dsea` Israel cóo~ gui jaléng' dsea` i née' ni guá'~ quiár~ e nising' Jesús do, joba' lalab canaiñ` áiñ' i dseata~ do jo fé'r`:

—¡Fí dse' crúu^ teáng^ i dsea` na!

Joba' caíi' dseata~ Pilato quiá'~ i dsea` teáng~ do ie~ jo, jo casí~ reiñ':

—Tee⁻ba're, jo yaam[~]ba' güiteáang[']na're fí' dse['] crúu[^], co['] jnea[~] ja` mí' cadsé'e jjí['] coo['] dsee⁻ quiá'r⁻ quiá'⁻ lajji['] e nicajmingí[']ire.

⁷ Jo dsu['] lalab cañí['] i dsea` Israel i teáang⁻ do ie[~] jo quiá'⁻ dseata[~] Pilato jo casí'r⁻ dsea` do:

—Seab` coo['] júu[^] quiu['] ta[~] qui⁻ jnea['], dsea` líí['] dsea` Israel, jo lalab líí: Song jaang` dsea` fé'r e røøb` cøøiñ` còo['] Fidié[~], joba' 'né⁻ nijúum⁻bre jóng. Jo lajòb líí còo['] i dsea` na, joba' dseáng['] 'né⁻ nijúum⁻bre.

⁸ Joba' mi[~] tí' lí[~] canúu⁻ dseata[~] Pilato e júu[^] jo, eáang[']gui cafóñ['] jóng. ⁹ Jo ca'ib⁻tur e fí' lí' quiu['] ta[~] do colíing[~] còo['] Jesús, jo fí' job cajmingí'r⁻ dsea` do jo cajíñ[']:

—¿Jie[~] fí' lí' ñí['] 'nu?

Jo dsu['] Jesús jjí['] coo['] ja` e cañír['] quiá'⁻ dsea` do. ¹⁰ Joba' cañí[']tü dseata[~] Pilato jo casí'r⁻ Jesús jo cajíñ[']:

—¿Su ja` iin['] ngí['] jjí['] coo['] quié⁻ e jóng? ¿Su ja` ñí['] 'nu` e cuøøm` nifí['] i dsea` quié⁻ e e niteáíñ⁻ 'nu` fí' dse['] crúu[^], jogui cuøøm` bi cajo e nifí['] ire e nileáíñ⁻ 'nu` faco['] lajò?

¹¹ Joba' lalab cañí['] Jesús quiá'⁻ i dseata[~] do jo casí'r⁻ dsea` do:

—Jjí['] coo['] bí' ja` sea` quií⁻ e niquiá['] ta[~] quié⁻ e faco['] ja` Fidié[~] nicacuø'r['] 'nu` e catíñ['] lajò; joba' i dsea` i cajáng['] jnea[~] fí' jaguóo['], eáang[']guib røøiñ` dsee⁻ lacò[']gui 'nu`.

¹² Jo job mi[~] canaang` dseata[~] Pilato e 'nór['] jial nileáíñ⁻ Jesús, jo dsu['] mi[~] calilí['] i dsea` Israel do e jo, joba' canaaiñ` ta'guir mí['] jo sí'r['] dsea` do lala:

—Song nilaan['] i dsea` na, joba' líí' lafa' 'ní['] máam[']ba' jóng i dseata[~] dsea` féng['] i guing[~] fí'

Roma, cō' lí' doñí' ií' dseá' i jing' e líiñ' jaang' dseata~ dseá' féng', jōba' lí' lafa' e 'ní' ním-bre i dseata~ i guing' fí' Roma do.

13 Jō mi' tí' lí' canú- dseata~ Pilato e cajing' i dseá' Israel do lajo, jōba' caqui'r' ta~ e niguím-biñ' do Jesús jō nidsijéiñ' dseá' do dseáng' lí' quidsí' dseata~ Pilato í' quiá' dseá' fí' cō' lí' sii' Gabata, jō cō' jmí' hebreo guóng' Guiá' fí' lí' Siní' Cū.

14 Jō ie~ jō dseáng' guati'ló- jmi~ Pascua quiá' dseá' Israel, jō ná' guieñb' ningó' mi~ cajing' dseata~ Pilato e casí'r' i dseá' Israel do:

—iLab sing' i dseata~ dseá' féng' i quie' nifí' quí-na'!

15 Jō dsu' jaléng' i dseá' do canaaiñ' ta'tur mi~ jō fé'r':

—iGüijúung- i dseañ' na fí' dse' crúu'!

Jōba' cajming' dseata~ Pilato jaléng' i dseá' do jō casí'-reiñ':

—¿Su jneab~ catín-n nijngán'^n jaang' dseata~ dseá' féng' i quie' nifí' quí-na'?

Jōba' cañí' jaléng' fi~ jmidsea' i teáng- do ie~ jō, jō casí'r' i dseata~ do lala:

—iDseáng'- jíi~ dseata~ dseá' féng' i guing' fí' Roma, jíi~ dseata~ í'bing' i seeng' quí-naa'!

16 Jōba' dseata~ Pilato cajám'bre Jesús fí' quini~ jaléng' i dseá' do ie~ jō, jō i dseá' do cangojéem'bre Jesús fí' lí' nitáng- dseá' do fí' dse' crúu'.

Mi~ catáng- Jesús fí' dse' crúu'

(Mt. 27:32-44; Mr. 15:21-32; Lc. 23:26-43)

17 Jōba' ca'uøøm' i dseá' do jéiñ' Jesús, jō 'ñiab' dseá' do dsíiñ' crúu' quiá'r- cangór- fí' cō' lí' sii' Cuo' Mogui' 'Lii' e sii'bi Gólgota cō' jmí' hebreo

e féⁿ dsea` Israel. 18 Jo mi[~] caguiliñ⁻ fi' jo, joba' fi' job cateáaiñ⁻ dsea` do fi' dseⁿ crúu[^], jo jaang`gui dsea` taang` la cataang` cáaiñ⁻ fi' dseⁿ crúu[^] cajo.

19 Jo ie[~] jo i dseata[~] Pilato do caqui^ur' ta[~] e nitó⁻ fi' yá[^] gui[~] crúu[^] quiá⁻ Jesús e júu[^] la: “Jesús i seeng` fi' Nazaret, dseata[~] dsea` féng['] quiá⁻ dsea` Israel.”

20 Jo e jo cató⁻ cóo^o⁻ 'ni' íng['] jmí['], jmí['] latín cóo^o⁻ jmí['] hebreo jogui jmí['] griego. Jo fíim['] dsea` Israel ca'ír⁻ e júu[^] jo ie[~] jo, co['] e fi' lí[~] catáng⁻ Jesús do ja` huíⁱ e éang['] laco['] la née['] fi[~] Jerusalén. 21 Jo dsu['] mi[~] cangá⁻ fi[~] jmidsea` quiá⁻ dsea` Israel lajii[~] júu[^] e to^o⁻ fi' yá[^] crúu[^] quiá⁻ Jesús, joba' lalab casí^r⁻ i dseata[~] Pilato do jo cajíñ⁻:

—Guiá⁻gui ja` nitó⁻ e júu[^] na, jo güitó⁻ lala: “Lab i jmigóo⁻ e líiñ⁻ dseata[~] dsea` féng['] quiá⁻ dsea` Israel.”

22 Jo mi[~] canúu⁻ dseata[~] Pilato e júu[^] jo, joba' lalab cañí^r quiá⁻ i dsea` do jo casí⁻ reiñ⁻:

—Lajii[~] e júu[^] e nicaquiá⁻ ta[~] e nicató⁻ na, dseáng⁻ lanab nijé⁻.

23 Jo mi[~] tí['] lí[~] cangí⁻ e cateáng⁻ i 'lée⁻ do Jesús fi' dseⁿ crúu[^], joba' casitíiñ⁻ sí[^] dsea` do jo cajméer⁻ guié[^] lajee⁻ quiúuiñ⁻ la'ó['] líiñ⁻ 'lée⁻, jmacó⁻ e 'mi['] do quiá^r⁻ lajaang` lajaaíñ⁻. Jo dsu['] e sí[^] Jesús e cóo^ogui do, 'mi['] contø^m⁻ lí['] jo ja` sí[']mi['] cajo. 24 Jo lajee⁻ jo i 'lée⁻ do canaaíñ⁻ síiñ⁻ la'ó['] yaaíñ⁻ lala:

—Ja` guing[~] nisiing⁻ naa['] e 'mi['] na, jo macó[^]oo⁻ ne[~]duu['] i[~] nilí⁻ nicóo⁻.

Jo cóo^o⁻ e nab calíⁱ⁻ jíⁱ⁻ laco['] la féⁿ fi' ni[~] jí⁻ quiá⁻ Fidié⁻ e cajme['] dsea` malí[~]gui eáang['] lí[~] féⁿ lala: “Cajméeb⁻ dsea` guié[^] jalé['] sí[^] jo, jogui cacóor⁻ quiá⁻ i[~] nilí[^] e sí[^] e contøng⁻ do.” Jo lajob dseáng⁻ cajmée⁻ i 'lée⁻ do cóo^o⁻ sí[^] Jesús.

25 Jo lajee˘ e táang` Jesús fí dse˘ crúu˘, dob teáang˘ quiúung˘ dseam˘ e tii˘ laco˘ si˘ e crúu˘ do; jo jaaiñ˘ do líng˘ niquiá˘ Jesús, jogui jaang˘gui rúng˘ dsea˘ ngáang˘˘ cóo˘˘ niquiá˘r˘, jogui jaang˘gui i sii˘ Yá˘ i líng˘ dseam˘ quiá˘˘ jaang˘ dseañu˘˘ i sii˘ Cleofas, jo jaang˘gui i sii˘ Yá˘ i seeng˘ fí Magdala. 26 Jo lajee˘ job cangáng˘ Jesús niquiá˘r˘, jo cáang˘ i niquiá˘r˘ do sing˘˘ jaang˘ dsea˘ quiá˘˘ Jesús i eáang˘˘ neáaiñ˘, jo lajee˘ jo lalab casí˘˘ Jesús i niquiá˘r˘ do e éeiñ˘ i dsea˘ quiá˘r˘ i iññ˘ eáang˘˘ do jo cajíñ˘˘:

—Janú˘, dseam˘, nab sing˘˘ i líng˘ laco˘ joo˘ do.

27 Jo mi˘ cang˘ e jíñ˘ e jo, joba˘ casí˘r˘ i dsea˘ i iññ˘ eáang˘˘ do lala:

—Nab sing˘˘ i líng˘ laco˘ niquiá˘.

Joba˘ mi˘ cajíng˘˘ Jesús lajo, i dsea˘ i iññ˘ eáang˘˘ do ca˘im˘ bre niquiá˘˘ dsea˘ do e líiñ˘ do laco˘ dsea˘ sináú˘ quiá˘r˘.

Mi˘ cajúng˘ Jesús

(Mt. 27:45-56; Mr. 15:33-41; Lc. 23:44-49)

28 Jo mi˘máing˘˘ guiji˘ lajo, jo co˘ niñib˘ Jesús e nicatób˘ jalé˘ ta˘ quiá˘r˘, jogui e laco˘ niliti˘ jíi˘˘ laco˘ fé˘ fí ni˘ jì quiá˘˘ Fidiéé˘ e cajme˘˘ dsea˘ malí˘˘ gui eáang˘˘, joba˘ cajíñ˘˘ lala:

—Dsíng˘˘ jmijmíñ˘˘.

29 Jo ie˘ jo nisi˘˘ cóo˘˘ dsuu˘˘ e røøng˘ a˘ jmí˘˘ mí˘˘ huíng˘ jó˘˘ e níjì˘, joba˘ cayé˘˘ dsea˘ e jmí˘˘ mí˘˘ huíng˘ jó˘˘ do cóo˘˘˘ cóo˘˘ joo˘, jo casiguír˘ fí cóo˘˘ yá˘˘ si˘˘, jo cóo˘˘˘ e job ca˘úuiñ˘˘ fí mo˘oo˘˘ Jesús. 30 Jo cayub˘˘ Jesús e jmí˘˘ mí˘˘ huíng˘ jó˘˘ jíi˘˘ do. Jo mi˘ cang˘ jo, joba˘ cajíñ˘˘:

—Nab nicató˘˘ lajíi˘˘ ta˘ cagá˘ a.

J_o c_o' cató' e café'r e júu^ j_o, j_o cajgiéer- moguir-
j_o mifñing` cajúm-bre jóng.

Mi~ ca'ia' jaang` 'léé- ñisü' fí' mo'uóø' Jesús

³¹ J_o 'ñaia' ie~ jmii~ e cajúng- Jesús do, líí' e
guati'ló- jmii~ Pascua quiá'- dsea` Israel, j_o c_o' ja`
quí'- tñing` i dsea` í fa' e seáang- 'líí' quiá'r- fí' dse`
crúu^ lajee` e jmii~ j_o, c_o' dseáng'- jmii~ e laniim-
quiá'r- ie~ j_o, j_oba' camí' dsea` Israel fí' i dseata`
Pilato do e nicuóñiñ'- do fí' e nijér- tíi- i dsea` taang`
dse` crúu^ do e laco' nijúuiñ'- do jminá-gui, j_o
laj_oba' cuóøng` e nijgiáaiñ' do e fí' lí' taaiñ' do.
³² J_oba' cangám` i 'léé- do fí' e nidsilíiñ- e nijér-
tíi- i dsea` gaang` i taang` dse` crúu^ do; j_ogui laj_ob
cajméer', cajée`bre tíi- i dsea` la'uui- i táang` dse`
crúu^ cáang` Jesús do; j_o mi~ cangf j_o, laj_ob cajméer`
quiá'- i dsea` jaang`gui do i táang` dse` crúu^ cajo
ca' dse` crúu^ lí' táang` Jesús. ³³ J_o mi~ caguilíng- i
'léé- do fí' lí' táang` Jesús fí' dse` crúu^, j_oba' calilí'r`
e ni'líim~ dsea` do, j_oba' j_o` e cajmeáiñ' dsea` do fa`
cajée`guir tíiñ'.

³⁴ J_o nañí' fa' e calilí' i 'léé- do e ni'líim~
Jesús, dsu' jaang` lajee` la'ó' ír` ca'iar` ñisü' fí'
dse` mo'uóø' dsea` do, j_o ladsifí' lanab catuü`
jmii` c_oo'gui jmi'øøiñ-. ³⁵ J_o i dsea` i fé' e júu^
la, dseáng'- e já'-ba' e cangár- laco' calí-, j_oba'
dseáng'- jáb'- júu^ e fé'r` do e laco' jaléng' 'nú' jáb'-
nilíng`na' dseáng'- laco' calí-. ³⁶ J_o cangojée` jalé`
e la e lí' laco' caliti~ lajii~ júu^ quiá'- Fidiée` e fé'
fí' ni~ jì quiá'r- e cajme' dsea` malii~gui eáang` lí'
fé' lala: "Jíi~ c_oo` móo` teáaiñ' ja` nijé'." ³⁷ J_ogui
fé' bigui cajo lala e fí' ni~ jì j_o: "Nimáam~baa' i dsea`
i líng` ee' ca'ia' dsea` quiá'-."

*Mi~ ca'áng~ Jesús**(Mt. 27:57-61; Mr. 15:42-47; Lc. 23:50-56)*

³⁸ Jo mi~ cangí e ca'ién~ Jesús ñisú^ñ, joba' ie~ jo cangó~ jaang` dseañu^ñ i sii` Sé^ i niseeng` fí' cō^o fii e sii` Arimatea, jo cangór~ cangomí^r~ dseata~ Pilato fí' e nidsijgiáaiñ' Jesús fí' lí~ táang` dseá do fí' dseⁿ crúu^ jo nidsijéeng`neiñ' fí' lí~ ni'áiñ~. Jo i Sé^ do nilíiñ' jaang` dseá quíáⁿ- Jesús, dsu^ñ jí^ñ~ la ñir' 'ñiaⁿ'bre, cō' 'gómⁿ'bre jaléngⁿ dseá Israel fíng song caliñiñ' do e nilíiñ' lajo. Jo cacuøb' dseata~ Pilato fí' lajo, jo cangób~ Sé^ e cangojgiáaiñ' Jesús fí' lí~ táang` dseá do fí' dseⁿ crúu^, jo mifíng` cangojéeiñ` dseá do fí' lí~ ca'am~biñ'. ³⁹ Jo jaang`gui i sii` Nicodemo cangór~ cajo colíng` cóo^ñ i Sé^ do fí' lí~ sing' crúu^ fí' lí~ táang` Jesús. Jo i Nicodemo do quier' jíe' ja' guigui' kiil' e jmeafii' jloⁿ e sicángⁿ cóo^ñ~ tú~ íngⁿ~ míí, cō^o e sii` mirra jogui cóo^ñ~gui e sii` áloe. Jo i Nicodemo la, íb i cangó~ cangosiing^v cóo^ñ~ Jesús cō^o~ néeⁿ e canuu. ⁴⁰ Jo lajob i Sé^ do cóo^ñ~gui Nicodemo cajgiám~bre Jesús fí' dseⁿ crúu^, jo mifíng` canaiñ' súuiñ~ dseá do jalé' e jmeafii' do jo caquingⁿ'neiñ' cóo^ñ~ cō^o 'mí' té e siyáⁿ e jmií jmeafii' do, cō' lajob quíⁿ~ tíng` jaléngⁿ dseá Israel e jmóor` cóo^ñ~ jaléngⁿ 'líi~ quíá^r~ mí~ ni'áang~neiñ'. ⁴¹ Jo e fí' lí~ cateáaiñ~ Jesús fí' dseⁿ crúu^, fí' job nilí' cō^o dsí' iá, jo e fí' jo nisea` cō^o too` ée' e 'mí~ lí~ jí^ñ~ jaang` ja' ií' mí' ca'áng~. ⁴² Jo e fí' dsí' e too` ée' do cangojéeiñ` Jesús e ni'áiñ~, dsuco' quíábⁿ~ lí~ nilí' e too` ée' do, jogui cō' nijaquíem' cajo e jmií~ e jmi'íngⁿ dseá Israel.

Mi~ caji'tu Jesús

(Mt. 28:1-10; Mr. 16:1-8; Lc. 24:1-12)

¹ Jò la'uii~ jmii~ quiá'- e seamaan~ mi~ cangî e jmii~ do, e ee'bi eáang' lajee' nú'-gui e nijneá, cangó- Yá^ ì seeng' fí Magdala fí li~ ca'áng- Jesús; jò mi~ caguiér- fí jò, jòba' cangár- e nisijéb'^ e cuu~ e cajlí- e fí oo- too' e li~ ca'áng- dsea` do. ² Jò mi~ tí li~ calilí'r^ e jò` seeng' Jesús e fí dsí' tó` éé` do, jòba' caquim'-tur güi'í' e fí li~ guing~ Tú^ Simón colíng~gui cóo'~ ì dsea` quiá'- Jesús ì 'neáaiñ` eáang' do. Jòba' lalab cajíng'- ì Yá^ ì seeng' fí Magdala do mi~ caguiéiñ'- jò casí'-reiñ':

—Ninicaguim` dsea` Fí`naa' e fí li~ ca'áiñ- do, jò ja` ne~naa' jíé' fí li~ nicangojéiñ`.

³ Jò mi~ canúu- Tú^ Simón cóo'~gui ì dsea` rúíñ' ì jaang`gui do lajii~ júu^ e quiéé` ì Yá^ ì seeng' fí Magdala, jòba' dsifib' ca'uøøiñ` e cangolíiñ` lajminá- e fí li~ ca'áng- Jesús do. ⁴ Jò lajì huáam-bre ngolíiñ- cuiir, lifa' ì jaang`gui do jminá-gui cangór- laco' Tú^ Simón, jòba' jéeng`guibre caguiér- e fí li~ ca'áng- Jesús do. ⁵ Jò mi~ caguiér- fí jò, dsifib' catúuiñ' jò cajøør- fí dsí' e too' éé` do, jò cangár- e 'mi' e cabeang'- dsea` do e laco' milíib' née, jò lifa' ja` ca'ír- e fí dsí' too' éé` do. ⁶ Jò jiab~ cøøng' lajò caguié- Tú^ Simón, jò condséeb' ca'ír- e fí dsí' tó` éé` do mi~ caguiér-, jòba' cangá-bre e 'mi' e cabeang'- dsea` do cajò e laco' milíib' née; ⁷ jøgui cangá-bir cajò e dob røø` e 'mi' e cali'íng^ ta~ e quiá'- cabé' mogui~ dsea` do, jò cangár- e ja` røø` ca' laco' røø` e 'mi' e cabeang'- dsea` do, jò tí doguijiab røø` e sibéeng' ca' laco' røø` e jò. ⁸ Jò mi~ cangî jò, ca'í- ì dsea` ì jaang`gui do ì caguié- la'uii~ e fí too' éé`

do, jòba' cangá-bre jalé' e calí- e fí dsí' tó' éé' do, jò dseáng'- jáb'- caliñ-. ⁹ Jò dsu' i dsea' gáng- do dseáng'- ja' mí' cangám'bir laco' la fé' fí' ní' jì' quiá'- Fidiéé' e cajme' dsea' malii'gui eáang' lí' fé' e dseáng'- si'í'ba' e nijí'tu Jesús. ¹⁰ Jò mi' cang' jò, caquim'- tu i dsea' quiá'- Jesús i gáng- do fí' quiá'r-.

Mi' cajmijnéeng' 'ñia' Jesús fí' quini' Yá' i seeng' fí' Magdala

(Mr. 16:9-11)

¹¹ Jò mi' caguié-tu Yá' e fí' lí' ca'áng- Jesús, jòba' dob cajer' qui'r' fí' caluu' e too' éé' do. Jò lajee' siñ' qui'r' dob catúuiñ' e laco' nijøør- e fí' dsí' tó' éé' do, ¹² jòba' cangár- e neáang' gáng- ángeles i qui' 'mi' té' e fí' dsí' tó' éé' do, jò jaañ' do guiiñ- lí' catiroo' mogui' Jesús jøgui' jaañ' do guiiñ- fí' lí' cané- tii- dsea' do. ¹³ Jò i ángeles do cajming'r- i dseam' do jò casí'-reiñ':

—Janú', dseam', ¿jiali' sin' qui'?

Jòba' cañí' i dseam' do quiá'- i ángeles do jò casí'-reiñ':

—Qui' i dsuco' ja' ñii- ii' n'nicaguíng' Fí'i i ca'áang- dsea' e fí' dsí' tó' na, jò ja' ñii- jie' n'cangojéeiñ' lana.

¹⁴ Jò jòbi lico' n'icató' e jíñ'- e jò mi' tí' lí' cajing' 'ñia'r', jò cangáñ- Jesús e dob n'ising' dsea' do cáaiñ', jò dsu' jii' ja' ñir' e íb' dsea' do. ¹⁵ Jòba' cajíng'- Jesús casí'r- i dseam' do lala:

—Janú', dseam', ¿jiali' sin' qui'?' ¿I' sin' 'nán' lana?

Dsu' i dseam' do í' dsíir' e i dsea' i jmóo' í' e dsí' íá' dob i sing' s'ing' cóo'r- do, jòba' lalab casí'r- dsea' do:

—Janú', éé', song 'nab` nicaguiin` i Fíi` do, joba` iin`n jmeé` jnea` júu` jie` fí` lí` nicaguijéen`re, joba` fí` job ni`nén`^nre.

16 Joba` cañí` Jesús quiá` i dseam` do lala jo casí`-reiñ`:

—¡Yá`!

Joba` cajing` 'ñia` i Yá` do jo cajíñ`- cóo` jmí` hebreo lala:

—¡Rabuni! —e guóng` tifa`.

17 Joba` cañí`tu Jesús quiá` i dseam` do jo casí`-reiñ`:

—Ja` güín` jnea`, co` nabi ja` mí` cají`tu rú`naa` cóo` Tiquié`e. Joba` fíi`-i 'nua` lana e niguøñ` güijmeé` júu` jaléng` dsea` i níling` laco` rún`n e nijmijíng`tu rú`naa` cóo` i líng` Tiquié`e jogui í`bi i líng` Tiquí`na` cajo, jo íb` Fidié` quié` e jogui íb` Fidié` quií`na` cajo.

18 Jo mi` cang` jo, cangám` i Yá` i seeng` fí` Magdala do jo cangojmeá`-bre júu` jaléng` i dsea` quiá` Jesús do e nicangám`-bre dsea` do jogui casí`-bireiñ` cajo jalé` e júu` e ca`íñ` quiá`-dsea` do.

Mi` cajmijnéeng` 'ñia` Jesús fí` quini` dsea` quiá`r` (Mt. 28:16-20; Mr. 16:14-18; Lc. 24:36-49)

19 Jo mi` ca`í`- nua` 'ñia` ie` jmí` jo, e jmí` la`uii` quiá`-semaan` do, jo ie` jo ninicasitíng` rúng` i dsea` quiá` Jesús do fí` cóo` dsíi` 'nua` lí` jni` røø, co` 'góm`-bre jaléng` dsea` góor` dsea` Israel fíng song calilí`^ í` e niseáng`tu rúng` i dsea` do calé` catú`. Jo lajee` neáng` i dsea` do, job mi` tí` lí` ca`í` Jesús fí` jo, jo casíng` 'ñia`r` guiá`^ jóo` e lí` neáng` i dsea` quiá`r` do, jo lalab caféng`neiñ` do jo casí`-reiñ`:

—¡Güiliseem`ba` juguiá` júu` røø`!

20 Jo mi~ cangŕ e cajíng'~ Jesús e júu^ na, joba' canaaĩn` e'r' i dsea` quiá'r~ do fí' lí' cacuí' guotĩir~ cóo'~gui mo'uóør'. Joba' i dsea` quiá'r~ do eáam' cali'iaang` dsíir' mi~ cangáng~tur i Fiir~ do. 21 Jo mi~ cangŕ jo, lalab cajíng'~tu Jesús casí'r~ i dsea` quiá'r~ do:

—iGüiliseem`ba' juguíá~ júu^ røø! Jo lí'^ laco'gui Tiquí'ii' casíĩn` jnea~ fí' jmígüi' la, joba' lajob cajo jnea~ nisíin`n 'ná' fí' jmígüi' la.

22 Jo mi~ cangŕ jo, cajiúur~ fí' lí' neáang' i dsea` quiá'r~ do jo casí'~reiĩ':

—Íing'~na' Jmiguú' quiá'~ Fidiée~. 23 Jogui doñi' ii' dsea` i ni'íing`na' dsee~ quiá'~, joba' ni'íim~ dsee~ quiá'~ i dsea` í; jogui doñi' ii' dsea` i ja` ni'íing`na' dsee~ quiá'~, joba' ja` ni'íing` dsee~ quiá'~ i dsea` í cajo.

Mi~ já'~ calíng~ Mó^ e cají'~tu Jesús

24 Jo jaang` dsea` guitúung` quiá'~ Jesús i siĩ` Mó^ dsea` suung~, íb` i ja` seeng` ie~ lami~ cajmijnéeng` 'ñia' Jesús jee~ i dsea` quiá'r~ do. 25 Jo mi~ cangŕ jo, lalab casí'~ i dsea` caguiaang~ do Mó^ jo cajíĩ'~:

—Nícanem~baa' Fíi'naa'.

Jo dsu' Mó^ lalab cañíir` quiá'~ i dsea` rúĩn` do jo casí'~reiĩ':

—Ja` já'~ nilíin`n e fó'na' na song ja` nimoo~o guóor` lí' caliá~ mí'^ clavo, jogui song ja` nijnúu^u niguóo`o lacaang` lí' sicuí' quiá'r~, jogui song ja` nigüi'~i mo'uóør' e lí' caliá~ ñisú'.

26 Jo mi~ cangŕ jñiá~ jmĩ~ lajo, caseáng'~tu rúng' i dsea` quiá'~ Jesús do calé' catú~ fí' coo` sínáú^ lí' sijní røø, jo ie~ jo quíim'~ Mó^ cóo'~ i dsea` rúĩn' caguiaang~gui do. Jo lajee~ job ca'í~tu Jesús fí' dsíi'

sinúu^ e li~ neáaiñ' do jo casíng'tu 'ñia'r' guiá'^ jóo',
jo lalab caféng'tureiñ' do jo cajíñ'⁻:

—¡Güiliseem`ba' juguiá⁻ júu^ røø'!

²⁷ Jo mi~ cangî jo, lalab casí'⁻ Jesús i Mó^ do jo
cajíñ'⁻:

—Jóø⁻ guóo`o, jogui jnúu⁻ niguóo^ e li~ sicuí'^
quíe~ e la, jogui jnúu⁻ niguóo^ e li~ sicuí'^ mo'uøø⁻
la cajo. Ja`jmoo^ e ja`já'⁻ lín' jo`já'⁻ güilín' lana.
jneá~bi la!

²⁸ Jo mi~ canúu⁻ Mó^ e jo, joba' cañír` quiá'⁻ Jesús
jo cajíñ'⁻:

—¡Dseáng'⁻ e`já'⁻ e`nub` Fíi` jogui` nub` Fidiéẽ
quíe~ e cajo!

²⁹ Joba' cañí'tu Jesús quiá'⁻ Mó^ jo casí'r⁻ dsea`
do jo cajíñ'⁻:

—¿Su car` cañin' jnea~, joguiba'`já'⁻ calín'⁻ e
nicajíb'túu? Dsú' juguiá⁻ guí quiá'⁻ i dsea` i`já'⁻
calíng⁻ e nicajíb'túu e jíi'~ ja`mí cangáam`bir jnea~.

E uiing~ e cajme' Juan e jì la

³⁰ Jo lajee` cateáang⁻ Jesús fí` jmigüi` la, jmiguiab`
jalé^ e li~ e quí'r~ jmí~ cajméer` fí` quini` jaléng`
dsea` guitúung` quiá'r⁻, jo dsu' jmiguiá`bi jalé^ e jo
ja`silí^ e fí` ní` jì la. ³¹ Jo dsu' lajii'~ e silí^ e fí` ní` jì la
nicalí⁻ e lí^ laco'`já'⁻ nilíng` jaléng` dsea` e dseáng'⁻
Jesús líiñ' i` Dsea` Jmáang⁻ i` nicá` nifi' quiá'⁻ dsea`
Israel jogui i` líng` i` Jóo' Fidiéẽ i` camíng'⁻ do, jo
lajoba' jaléng` dsea` i``já'⁻ nilíng` júu^ quiá'⁻ dsea`
do quí'⁻ jmí~ e niliseeiñ` cøøng` cóo'~ Fidiéẽ lata~.

21

Mí~ cajmijnéeng`'ñia'" Jesús fí' lí~ se'" Galilea

1 Jo mi~ cangîgui lajo, cajmijnéem` 'ñia' Jesús calé` catú~ fí' quini` guiáng~ i dsea` i la'ó` quíng'~ jee~ dsea` guitúung` quiá'r~ e fí' 'ni'` coo` guiéé' lí~ sii` Tiberias e née' lí~ se' Galilea. 2 Jo i lab jaléng' i dsea` i taang~ do ie~ jo: jaaiñ' do siir` Tú` Simón, jo jaang`gui i sii` Mó` i sii`bi Dsea` Suung~ cajo, jo jaang`gui i sii` Natanael i seeng` fí' coo` fi' e sii` Caná e née' lí~ se' Galilea, jogui gáng~gui i líng' joo' jaang` dseañu' i sii` Zebedeo, jogui gáng~gui dsea` jiéng' i quíng'~ jee~ dsea` quiá'~ Jesús. 3 Jo lajee` job cajíng'~ Tú` Simón e sí'r i dsea` rúíñ' i siseáng' e fí' 'ni'` guiéé' do ie~ jo, jo cajíñ'~:

—Nii~teáa ta~ sáang' 'ñu`.

Joba' cañíi` i dsea` do quiá'~ Tú` Simón jo casí'~reiñ'!

—Ii~baa' dsé`ee' cóo'~ 'nu` cajo.

Joba' lajob cajméer~, jo cangotáam~bre fí' coo` dsíi' móo' jo cangolíñ` fí' lí~ ni'a'gui quiá'~ e jmñ` do; jo fí' job canaaiñ` bír` 'máa' quiá'r~ e nisáiñ' 'ñu`, jo dsu' e uóø` jo dseáng'~ jíi'~ camíng'~ 'ñu` ja` ii` calí'r~. 4 Jo mi~ ningóo' nijneá' e uóø` jo, jo cajmijnéeng` 'ñia' Jesús fí' quiá'~ e guiéé' do, jo dsu' mi~ cangáng~ i dsea` quiá'r~ do ír', jíi'~ ja` calicuíñ` dsea` do lajminá' . 5 Joba' cajmíng'~ Jesús i dsea` do jo cajíñ'~:

—Janú' siming', ja` mí' lí'na' 'ñu`, ¿já` já'~?

Joba' cañíi` i dsea` quiá'r~ do jo cajíñ'~ casí'r~ dsea` do:

—U~, jíi'~ jaang` ja` ii` mí' calí'naa'.

6 Joba' cañíi`tu Jesús quiá'~ i dsea` quiá'r~ do jo cajíñ'~:

—Bí'na' 'máa' quíi~na' fí' é'` jmñ` lí'` lí' dséé' laco' ngóo' e móo' quíi~na' na, jo mó`du' fa' ja` lí'na' 'ñu`.

Joba' lajob cajmée` i dsea` do, cabíbre e 'máa' quiá'r- do fí dsí' jmí; jo mi~ cangí jo, i 'leáam- 'ñu` calí'r- e jii~ o' ró'r' fa' ni'óng-guir e 'máa' do dsu' e ni'ii` teáng~ 'ñu`. ⁷ Joba' i dsea` quiá'- Jesús i iin~ eáang' do lalab casí'r- Tú^ Simón jo cajín'-:

—¡Fíi'baa' i sing' dóo-!

Jo dsifí mi~ calilí^ Tú^ Simón e Fii~bre i sing' do, joba' lajmináb- caquí'r^ sí'r^ e ca'uø'r' lajee~ jmóor` ta~, jo ngí jo canaaín` bár` jmi~ e nidsér- fí lí sing' dsea` do, joba' lajob cajméer`. ⁸ Jo i dsea` caguaang-gui i cóo~ Tú^ Simón do caguilím`bre e fí 'ni'` jmi~ do e teaaín~ dsí' móo' e øøiñ` e 'máa' do, co' sirøøm` teáng~ 'ñu`, jo huím`jiu lí cangobíir` e 'máa' do laco'gui 'ni'` guiéé, co' tíib`jiu la cien metros. ⁹ Jo mi~ tí lí caquing'-túr fí uø- quiú, joba' cangár- coo` lí ninicaji' dsea` jì, jo e fí ni~ jito' quiá'- e jì do niráang` jaang` 'ñu` cóo~gui iñí^'. ¹⁰ Jo lalab cajíng'- Jesús casí'r- i dsea` quiá'r- do:

—Cuøøng-na' jaang` gáng- 'ñu` i nicalí^na' na.

¹¹ Jo mi~ cajíng'- Jesús lajo, joba' cajgóo- Tú^ Simón fí yá^ e móo' do quiá'r-, jo ca'øøiñ` e 'máa' do dseáng'- catí ni~ tóo~ 'ni'` jmi~. Jo dseáng'- eáam' ii' do, co' ciento cincuenta y tres 'ñu` calí'r- ie~ jo, jo jmang'- i cóøm~ cajo; jo dsu' cateáb'- e 'máa' do e ja' ca'guii` nañí fa' fím' i 'ñu` do calí'r-. ¹² Jo mi~ calí- e jo, lalab cajíng'- Jesús casí'r- i dsea` quiá'r- do:

—Ñilíng-na' ñiquié^na' íí ta'é`.

Jo jii~ jaang` i dsea` quiá'r- do ja' teá dsíir' fa' ee` nijmingí'r- dsea` do i~ dseáng'- líng' dsea` do, co' ñi'bre e dsea` dob líng' Fíir`. ¹³ Jo mi~ cangí jo, cangoquíéeng' Jesús fí quini~ i dsea` quiá'r- do

jō casá'r- e iñí^ do jōguí casaiñ'- i ñu` do cajo, jō canaañ` jmóor` guié^ jee~ i dsea` quiá'r- do. Jō jalém^bre cagó'r` ie~ jō.

14 Jō cóo~ e lab catí 'ní yá' e cajmijnéeng` ñia' Jesús fí jee~ dsea` quiá'r- ie~ mi~ cangí e cají'tur calé^ catú^-.

Mi~ casñng- Jesús cóo~ Tú^ Simón

15 Jō mi~ tí lí~ cangí e cagó'r` e í' ta'é do, lalab cajmingí'- Jesús i Tú^ Simón do jō casí'r- dsea` do lala:

—Tú^ Simón, jóo' jaang` dseañu^ i sii` Juan, ¿su eáang'gui 'neáan^ jnea~ laco'gui i dsea` quié-e i caguiaang- gui la?

Jōba' cañíi' Tú^ Simón quiá'- Jesús jō casí'r- dsea` do lala:

—Lajōb lí' Fíi'i, có' ñíb^ 'nu` guiá- e 'neáam`baa 'nu`.

Jōba' cañíi'tu Jesús quiá'- Tú^ Simón jō cajíñ'-:

—Te^n fíing` røø` jaléng^ dsea` i líng` lafa' jo'se^n jiuung~ quié-e.

16 Jō mi~ cangí jō, caléb^tu cajmingí'- Jesús i Tú^ Simón do jō casí'-tur dsea` do:

—Tú^ Simón, jóo' jaang` dseañu^ i sii` Juan, ¿su 'neáan^ jnea~?

Jōba' cañíi'tu Tú^ Simón quiá'- Jesús jō cajíñ'-:

—Lajōb lí' Fíi'i, có' ñí^ba' guiá- e 'neáam`baa 'nu`.

Jō ngí jō, caléb^tu cajíng'- Jesús casí'r- dsea` do lala:

—Jmee- í^ jaléng^ dsea` i líng` lafa' jo'se^n quié-e.

17 Jō cóo~ e la catí 'ní yá' e jmingí'- Jesús i Tú^ Simón do jō cajíng'-tur calé^ catú^-:

—Tú^ Simón, jóo' jaang` dseañu^ i sii` Juan, ¿su 'neáan^ jnea~?

Jō mi~ canúu^ Tú^ e júu^ jō calé' catú-, jōba' fi'íb^ calíñ-, cō' cōo~ e la catí 'ní yab' e jmingí'- Jesús ír' su 'neáang' dsea` do ír'.

Jōba' cañí'tu Tú^ Simón quiá'- dsea` do jō cajíñ'-:

—Fí'ì, guiáb- dseáng'- ñí^ 'nū' lajalé', jōba' ñí'ba' e 'neáam'baa 'nū'.

Jō ngí jō, calé' catú- cañí' Jesús quiá'- Tú^ Simón jō casí'r- dsea` do lala:

—Jmee- í^ jaléng' dsea` ì líng' lafa' jo'se^` quié- e.
 18 Jō e laba' jmítaa^ o', e ie~ lamí~ bí'bi a', guía'ba' guiá- quií'- e guo' jíé' fí' lí~ iin'^; jō dsu' mi~ tí' lí~ nídseáan'-, niní'í~ cuéé' jō dsea` jíém' niguia- guiá- quií'-, jōguí nijéíñ- 'nū' jíé' fí' lí~ ja' iin'^ guó'.

19 Jō casí'- Jesús ì Tú^ Simón do lana e lí^ laco' jmóor^ júu^ jial nijúung- dsea` do mi~ nití- í' lajō, jōguí nidsingíñ'- do lajō e lí^ laco' nijmí'gó' dsea` Fidiéé' cōo' e 'mó- quiá'r- do. Jō mi~ cangí jō, cajíng'- guí Jesús casí'r- Tú^ Simón:

—Ja` güihuín'- cōo'~ jnea~!

Ì dsea` quiá'- Jesús ì iñ~ eáang' do

20 Jō mi~ cangí e cajíng'- Jesús e júu^ na, jōba' caji'tu Tú^ Simón nir~ jō mífíng` cangáíñ- ì dsea` quiá'- Jesús ì eáang' 'neáaiñ' do e jáaiñ' do caluur', jō ì dsea` íb` cajo ì caguá` cáang' Jesús ie~ mi~ cagó'r' í' canūu, jō cajmingí'r- dsea` do e ì dseáng'- lajee' la'ó' ír' ì ni'níng- ír'. 21 Jō mi~ tí' lí~ cangáng-tu Tú^ Simón ì dsea` do, jōba' lalab cajmingí'r- Jesús jō cajíñ'-:

—Fí'ì, jō ì dseañu' ì sing' la, ¿e~ nidsingíñ-?

22 Jōba' cañí'tu Jesús calé' catú- quiá'- ì dsea` do jō casí'- reiñ':

—Jō song jnea~ iin~n e seem`bi i dseañu` la cartí mi~ nigüéeng-túu fí jmiǵüi` la calé` catú-, jōba' ¿e~ cuaiñ~ quíi- 'nu` uii~ quíi'- i dseañu` la? Lí^ 'nu`, ja` gūihuín'- cōo'~ jnea~.

²³ Jō jōb mi~ canaang` e ngí júu^ jee~ jaléng` dsea` quíi'- Dsea` Jmáang` e i dsea` i iing~ Jesús eáang` do ja` nijúuiñ-. Jō dsu' ja` cajíng'- Jesús fa' dseáng'- e ja` nijúung- i dsea` do, cō' lalaba' cajíñ'-: “Song jnea~ iin~n e seeiñ` cartí mi~ nigüéeng-túu fí jmiǵüi` la calé` catú-, jōba' ¿e~ cuaiñ~ quíi- 'nu` faco' lajō?”

²⁴ Jō i dsea` i iing~ Jesús eáang` dob cajo, í'bing' i tí' ni~ jalé' e cangojée' do jōgui jmo'r jalé' e júu^ la. Jōgui ne~baa' røø e jmang'- júu^ já'-ba' fé'r`.

²⁵ Jō jmiǵui`bi jalé' e cajmée` Jesús jíi~ laco' e silí' e fí' ni~ jì' la, jōgui faco' nilí' fí' ni~ jì' dseáng'- lajalé' e cajméer` do, jōba' jíi~ fí' jmiǵüi` ja` ni'í' jalé' e jì' jō faco' lajō.

Jō lanab cadséng- jalé' júu^ quíi'- Dsea` Jmáang` e cajme' Juan.

Jō lajōb nilí'.

Júu 'má e cacuo fidiée
New Testament in Chinantec, Comaltepec
(MX:cco:Chinantec, Comaltepec)

copyright © 2002 Wycliffe Bible Translators, Inc.

Language: Chinantec, Comaltepec

Translation by: Wycliffe Bible Translators, Inc.

Chinanteco, Comaltepec [cco], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Chinantec, Comaltepec

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 21 Feb 2024 from source files
dated 29 Jan 2022

30c6f873-0dee-5863-8883-ba3c5eaa988c